

# A Velenga Kamumu ne Isu Kristo i Herea e Mateo

## A Nita Vakalohoka

Mateo

E Mateo a apostolo i herea a Velenga Kamumu iea. E Mateo a bakovi ni bole a takis na tahuna e Isu i galea ge ramaia (9:9-13). Muri e Isu i vulakia ge ia tara apostolo, ra ri ala ravulu a polona i rua. E Mateo a bakovi o Iuda. A rana tara e Levi (Markus 2:14-15).

E Mateo i herea a raukea iea na parava ranga na nilobona senturi i taku (50-100 AD), i mata manga na kurukuruna e 60-70 AD.

E Mateo i here lakea ne huriki a kabu vona, re huriki a Iuda. Na Velenga Kamumu iea e Mateo i taki ranga ngava i tabuli na Ngava Dagi hosi, ra i bele muholi ne Isu. Na Ngava Dagi karaba e Mateo i taki a maka ngava na ngava dagi hosi i kupo hateka na buk ranga. A ni tubu na Velenga Kamumu iea, e Mateo i vakasiri e Isu i valai na kabu ne Iuda. I here tabu maea, “E Isu ia e tune David.”

E Mateo i ngaru ni vakasiri e huriki a Iuda ne Isu Kristo ia a Mesaia, ra viri a Vure i vulakia ge korimule e huriki a bakovi a ngatavine vona. E huriki a propet na Ngava Dagi hosi ri taki a Vure ge rudu vilia e Kristo, ge korimule e huriki a Israel. Na Ngava Dagi karaba, e Mesaia i manga “e Kristo.” E Mateo i here na Velenga Kamumu iea a nimadene Isu, a leho i rata, ra ri ta vona e huriki a propet na Ngava Dagi hosi i bele muholi.

---

## E Huriki a Vuhune Isu (Lukas 3:23-38)

**1** <sup>1</sup> E huriki a vuhune Isu Kristo, a hamone Davit, a hamone Abraham.  
<sup>2</sup> E Abraham e tamane Isak.  
E Isak e tamane Iakop.

---

<sup>a</sup> 1:1 Vuh 22:18; 1Sto 17:11

- E Iakop e tamane Iuda, turana e huriki e turana mai.
- 3 <sup>b</sup>E Iuda e tamane Peres rua e Sera, e kinane rua e Tamar.  
E Peres e tamane Hesron.  
E Hesron e tamane Ram.
- 4 E Ram e tamane Aminadab.  
E Aminadab e tamane Nason.  
E Nason e tamane Salmon.
- 5 <sup>c</sup>E Salmon e tamane Boas, e kinana e Rahap.  
E Boas e tamane Obed, e kinana e Rut.  
E Obed e tamane Iesi.
- 6 <sup>d</sup>E Iesi e tamane Davit, a hariki.  
E Davit e tamane Solomon, e kinana e girihine Uria.
- 7 E Solomon e tamane Rehoboam.  
E Rehoboam e tamane Abisa.  
E Abisa e tamane Asa.
- 8 E Asa e tamane Iehosapat.  
E Iehosapat e tamane Ioram.  
E Ioram e tamane Usia.
- 9 E Usia e tamane Iotam.  
E Iotam e tamane Ahas.  
E Ahas e tamane Hesekia.
- 10 E Hesekia e tamane Manase.  
E Manase e tamane Amos.  
E Amos e tamane Iosaia.
- 11 <sup>e</sup>E Iosaia e tamane Iekonaia turana e huriki e turana mai na tahuna  
e huriki a Babilon ri lakavu e huriki a Israel, ri turari ria lakea o  
Babilon.
- 12 <sup>f</sup>Muri ne huriki a Israel ri made o Babilon:  
E Iekonaia e tamane Siltel.  
E Siltel e tamane Serubabel.
- 13 E Serubabel e tamane Abiud.  
E Abiud e tamane Eliakim.  
E Eliakim e tamane Asor.
- 14 E Asor e tamane Sadok.  
E Sadok e tamane Akim.  
E Akim e tamane Eliud.
- 15 E Eliud e tamane Eleasar.  
E Eleasar e tamane Matan.  
E Matan e tamane Iakop.

<sup>b</sup> 1:3 Vuh 38:29-30; Rut 4:18-22    <sup>c</sup> 1:5 Rut 4:13-17    <sup>d</sup> 1:6 2Sam 12:24

<sup>e</sup> 1:11 2Ki 22:1-24:20; 2Sto 36:10; Jer 27:20    <sup>f</sup> 1:12 Esr 3:2

<sup>16</sup> E Iakop e tamane Iosep, e girihine Maria, ra i podea e Isu, ra ni gale e Kristo.

<sup>17</sup>E huriki e kabune Isu, i vakatubu ne Abraham i valai ne Davit, ri ala ravulu a polona i va.

Ne Davit i valai na tahuna ri dili o Babilon, ri ala ravulu a polona i va.

Pali ne Babilon i valai na tahuna e Kristoa<sup>s</sup> ni poda, ri ala ravulu a polona i va.

### E Isu Ni Poda

(Lukas 2:1-7)

<sup>18</sup> <sup>h</sup>A nipodane Isu Kristo i bele maea: E kinana, e Maria, ni habikari ne Iosep ge girihina. Pali i uka ma ru parangi ma, ni matakilaka vona i singou na Hanu Kiripiripi. <sup>19</sup>E girihina, e Iosep, a bakovi kiripiripi. I koi ni vakamaruhua na matane huriki, lakea i luhoi ni pile kapiloho kunanea. <sup>20</sup>I tabana ni luhoi ni rata mavonga, lakea a agelo ne Bakovi Dagi i bele vona na vurena, i ta maea, “Iosep, hamone Davit, naha ni mangenge ni bolena e Maria ge girihimu, a vuhuna a maki i bele vona, i valai na Hanu Kiripiripi. <sup>21</sup> <sup>i</sup> Bara i podea a koma bakovi. O vunua ge Isu, <sup>j</sup> a vuhuna bara i korimule e huriki a kabu vona na naro hale ne ria.”

<sup>22</sup> A maki nga ri bele, ge bele muholi a ngavane Bakovi Dagi i taki e huriki a propet vona hosi, i ta maea, <sup>23</sup> <sup>k</sup> “A sirula bara i singou tavula, i podea a koma bakovi, bara ni gale e Emanuel.” A pelegona a ngava e Emanuel i maea, “A Vure i made turane hita.”

<sup>24</sup> Na tahuna e Iosep i hadongo, i muri mai a ngavana agelo ne Bakovi Dagi. I tulia e Maria ge girihina, ru lakea na tanga. <sup>25</sup> <sup>l</sup>Pali i uka ma i mahita turana, i harena na tahuna e Maria i podea a koma bakovi vona. Lakea e Iosep i vunua a rana e Isu.

### A Nupesi na Nirikena Haro

**2** <sup>1</sup>E Isu ni poda o Betlehem na tabeke ne Iudea na tahuna a Hariki e Herod i matakari vonga. Muri e huriki a bakovi na lohokanga na nilahona hada to malaga na tabeke na nirike na haro, to valai o Ierusalem. <sup>2</sup> <sup>m</sup>To nana, “Avia a viri ni poda a hariki ne huriki a Iuda? Mete masia a hada vona na tabeke na nirike na haro, mete valai mete ge kavurikea.” <sup>3</sup> Na tahuna a Hariki e Herod i longoa a ngava iea, i lege a lohona. E huriki o Ierusalem ranga, i lege a lohona. <sup>4</sup> Lakea i gale palupu e huriki a prister dagi, a mari na vinara na lotu, i nana ria vona ni

<sup>s</sup> 1:17 E Kristo a nita Hibru i manga i maea, A Viri a Vure i vulakia ge korimule e huriki.

<sup>h</sup> 1:18 Luk 1:27,35 <sup>i</sup> 1:21 Luk 1:31; 2:21 <sup>j</sup> 1:21 E Isu, na nita Grik i manga e Iosua. A pelegona i manga i maea, E Bakovi Dagi i korimule hita. <sup>k</sup> 1:23 Ais 7:14 <sup>l</sup> 1:25 Luk 2:21 <sup>m</sup> 2:2 Gi 24:17

gi poda vai e Kristo. <sup>5</sup>Ri ta maea ria, “Bara ni poda na tanga e Betlehem, na tabeke ne Iudea, a vuhuna e huriki a propet hosi ri here maea:

<sup>6</sup> “Ra ioe o Betlehem na tabeke ne Iudea

i uka ma a tanga tavula o Iudea, a vuhuna

bara i pagitala vomu a matakari,

bara ia a matakari ne huriki a kabu nau, re huriki a Israel.’ ”

<sup>7</sup>Muri e Herod i gale kapiloho e huriki a mosi nga, i nana tou vona a parava to matai a hada vona. <sup>8</sup>Muri i rudu tou, to go lakea o Betlehem, i ta maea, “Moto vano, moto matakana kamumua a koma iea. Na tahuna moto matavisia, moto taki iau. Iau tara a ngaru ni lokovonga, ga kavurikea.”

<sup>9</sup>To longo lobo a ngavana hariki, to vano. Lakea a hada to masia na nirikena haro, i muga ne tou, i vano i koro polomeli na tanga i made vona a koma. <sup>10</sup>Na tahuna to masia a hada, to vivi hateka. <sup>11</sup>Na tahuna to bele na ruma, to masia a koma turana e kinana e Maria, lakea to turume puru, to kavurikea e Isu. To bole tala na tava ne tou a mahala, to vakaparua na gol, a buluka mangisipa ni gale a insens tara, a mir tara. <sup>12</sup>A Vure i ta pupukari ne tou na vurena, nahea to go hamule maia e Herod. Lakea to ramai a dala tara, to hamule lakea na robo ne tou.

### E Iosep i Ha Lakea o Egipto

<sup>13</sup>To vano pali a bakovi dagi nga, lakea a agelo ne Bakovi Dagi i bele ne Iosep na vurena, i ta maea, “O pesi rike turana koma, e kinana, moto ha lakea o Egipto. Moto made vonga. Muri bara taki matou, moto hamule valai. E Herod i matakanea a koma iea, ta ge rabalakia.”

<sup>14</sup>Lakea i pesi rike na rodo, i vango a koma rua e kinana, to ha lakea o Egipto. <sup>15</sup><sup>P</sup>To made vonga i harena na tahuna e Herod i mate. Lakea i bele muholi a ngava e Bakovi Dagi i taki hosi ne huriki a propet, i ta maea, “A gale talea o Egipto e tugu a bakovi.”

### E Herod i Rabalaki e Huriki a Koma Bakovi

<sup>16</sup>Na tahuna e huriki a mosi nga i uka ma ri hamule valai ne Herod, i madihi a hatena, a vuhuna i matakilaka vona ri tamia. I vakuku e huriki a nugumaheto ri gi rabalaki e huriki a koma bakovi o Betlehem, na tabeke tabukoi vonga, a pida ne ria i polotano na pida i rua. I lohoka vona a pida ne Isu bara i polotano na pida i rua, a vuhuna i longo a nitane huriki a bakovi na nirike na haro. <sup>17</sup>Ngane a ngava i bele muholi, ra ngava e Bakovi Dagi i taki hosi ne Ieremaia a propet, i ta maea,

<sup>18</sup> “Ni longo na tanga e Rama

---

° 2:6 Mai 5:2; Ion 7:42 ° 2:11 Sng 72:10-15; Ais 60:6 P 2:15 Hos 11:1 ¶ 2:18 Vuh 35:19; Jer 31:15

e huriki ri haloho.  
 E Resel i taringi e huriki e tuna.  
 Pali i koi ni gi luke,  
 a vuhuna e huriki e tuna  
 ri mate lobo pali.”

**To Hamule**  
*(Lukas 2:39)*

<sup>19</sup>Muri e Herod i mate, lakea a agelo ne Bakovi Dagi i bele ne Iosep o Egipto na vurena, <sup>20</sup>i ta maea, “E huriki ta ri gi rabalakia a koma ri mate pali. O pesi rike, o tuli a koma rua e kinana, moto hamule lakea na robo e Israel.”

<sup>21</sup>Lakea i pesi rike, i tuli rua to hamule lakea o Israel. <sup>22</sup>Pali i mangenge ni lakea o Iudea, a vuhuna i longoa e Arkelaus i bole a murine tamana, e Herod, i matakari a tabeke ne Iudea. A agelo ne Bakovi Dagi i bele ne Iosep na vurena, i vakalongoa, i mavonga to lakea na tabeke ne Galili. <sup>23</sup>To vano to made o Nasaret. Ngane i bele muholi a ngava na propet i ta maea, “Bara ni gale ia a koma o Nasaret.”

**E Ioanes a Mari ni Vahilolo**  
*(Markus 1:2-8; Lukas 3:1-18; Ioanes 1:19-28)*

**3** <sup>1</sup>Na tahuna iea, e Ioanes, a mari ni vahilolo, i tubu ni leho, i vara na tabeke i ngeki o Iudea. <sup>2</sup>I vara maea, “Mu pulo a vilone mua, a vuhuna a harikianga na hunu i tabukoi ge bele.” <sup>3</sup>Re Ioanes, a propet e Isaia i vakalongo muga vona, i ta maea,

“A lohona viri i gale dagi na tabeke i ngeki, i ta maea,  
 ‘Mu pelekadoa a dala ne Bakovi Dagi.

Mu pelekadoa a dala ge laho vona ge kiripiripi.’ ”

<sup>4</sup>“A varakia ne Ioanes ni rata na vuna kamel. I rea tata ia na palabele ni rata na kulina meme.” I kani a koa, a ame na robo. <sup>5</sup>E huriki lobo o Ierusalem, e huriki lobo na tabeke ne Iudea, e huriki lobo tabukoi na naru e Iordan ri lokovonga maia. <sup>6</sup>Ri taki tala a naro hale ne ria, lakea i vahilolo ria na naru e Iordan.

<sup>7</sup>“Pali na tahuna i matai e huriki a Pariseo, a Sadusi ri valai mai ia ge vahilolo ria, i taki ria, i ta maea, “Mua a tuna mata! E rei i taki mua mu gu ha vona a rongova ne Bakovi Dagi? <sup>8</sup>Mu rata a naro ge vakasiri mu pulo a narone mua. <sup>9</sup>“Naha ni luhoi mua, ge mua a hamone Abraham, mu gu malamala pali. Naha ni luhoi mavonga, a vuhuna a Vure i kara

† 2:23 Ais 11:1; 53:2; Luk 2:39; Ion 1:45    † 3:2 Mat 4:17; Mrk 1:15    † 3:3 Ais 40:3

“ 3:4 2Ki 1:8    † 3:4 A varakia ne Ioanes i manga a varakia ne Elaisa hosi.

“ 3:7 Mat 12:34; 23:33    † 3:9 Ion 8:33,39; Rom 4:12

ni pulo a kedo nga, ge ria e huriki a hamone Abraham. I vai a kanena narone mua? Mu rata taro a naro kamumu ge vakasiri mua mu pulo muholi a vilone mua. <sup>10</sup>ʔA kira i tabuli tabukoi pali na vuhuna kai. A kai i uka kanena kamumu, bara ni tolo puru, ni rungani.

<sup>11</sup>ʔ “Iau a vahilolo mua na naru a vuhuna mu pulo a vilone mua. Pali a bakovi tara bara i luve muri nau i tuhaka hateka nau. Iau i uka ma a bakovi kamumu ga bole polo a vahapolo vona. Na tahuna i valai, bara i vahilolo mua na Hanu Kiripiripi, a kanono. <sup>12</sup>Ngane i tabukoi bara i kalipida e huriki a bakovi kamumu, a bakovi hale, i manga a bakovi i leho na hania na vit i kalipida a vit, a luluna. Bara i bole e huriki a bakovi kamumu, i ru ria na tanga kamumu, i manga a bakovi i leho na hania i ru kadolu a vit pololilo na roho na vit. Pali bara i bole e huriki a bakovi hale, i voro rike ria na kanono, i manga a bakovi i leho na hania na vit i bole a luluna vit, i voro rike na kanono. A kanono iea, i uka a nilobona.”

### E Isu Ni Vahilolo

(Markus 1:9-11; Lukas 3:21-22; Ioanes 1:31-34)

<sup>13</sup>Muri e Isu i pea e Galili i lakea na naru e Iordan, e Ioanes ge vahiloloa. <sup>14</sup>Pali e Ioanes i hehe, i ta maea, “I navai ga vahilolo ioe? Ioe a viri bara o vahilolo iau.”

<sup>15</sup>Pali e Isu i koli, “O rata kunanea, a vuhuna i kamumu tu gu rata lobo a maki e Bakovi Dagi i taki tu gu rata.” Lakea e Ioanes i longo, i vahiloloa.

<sup>16</sup>ʔE Ioanes i vahilolo loba e Isu, lakea e Isu i malaviriri kunana i pea a naru. A hunu i mata ka, lakea i masia a Hanuna Vure i puru valai manga a balu, i toka langa vona. <sup>17</sup><sup>b</sup>Lakea a lohona viri i ta valai na hunu, i ta maea, “Iea e tugu a hategu. A vivi hateka vona.”

### A Hanitu i Tonia e Isu

(Markus 1:12-13; Lukas 4:1-13)

**4** <sup>1</sup><sup>c</sup> Na parava tara a Hanu Kiripiripi i rudua e Isu ge lakea na tabeke i ngeki, a hanitu ge tonia vonga. <sup>2</sup><sup>d</sup>E Isu i peremu a maki ni kani na parava i ravulu va, a rodo i ravulu va. Lakea i vitolo. <sup>3</sup>A bakovi ni toni e huriki i bele vona, i takia, “Ge ioe a tuna Vure, o taki a kedo nga ri gi mapulo ri gi manga a bret.”

<sup>4</sup>ʔE Isu i koli, “A ngava ni here puru na Hinere, i ta maea, ‘A bakovi i uka ma ge mahuri na maki ni kani kunana. A bakovi bara i mahuri na tahuna i longototo a ngava lobo na Vure.’ ”

<sup>ʔ</sup> 3:10 Mat 7:19; Luk 13:6-9    <sup>ʔ</sup> 3:11 Ion 1:26-27,33; Apo 1:5    <sup>a</sup> 3:16 Ion 1:32

<sup>b</sup> 3:17 Sng 2:7; Ais 42:1; Mat 12:18; 17:5; Luk 9:35    <sup>c</sup> 4:1 Hib 2:18; 4:15    <sup>d</sup> 4:2 Nim 34:28

<sup>e</sup> 4:4 Vin 8:3

<sup>5</sup>Muri a hanitu i tulia e Isu, i vakapesi langeda na mapana roho na Vure o Ierusalem, <sup>6</sup>*f*i takia, “Ge ioe a Tuna Vure, o to raga, a vuhuna a ngava ni here puru na Hinere i maea,

‘A Vure bara i rudu e huriki a agelo vona, ri valai ri matakari ioe.

Ri gi bole rike ioe na limane ria,  
ma ge padi a vahamu a kedo.’”

<sup>7</sup>*g*Lakea e Isu i koli mule, i ta maea, “Ni here puru tabu na Hinere, i ta maea,

‘Naha ni tonia e Bakovi Dagi, a Vure vomu.’”

<sup>8</sup>Muri a hanitu i tuli tabua e Isu, ru lakea na mapana lolo dagi tara. I vakasiria vona a tanga lobo na malala, a bagetua ne ria. <sup>9</sup>Lakea a hanitu i takia, “Ioe bara o turume puru, o vasileki nau, bara habi vomu a maki lobo nga.”

<sup>10</sup>*h*Lakea e Isu i takia, “Satan, o ha nau! A ngava ni here puru na Hinere i maea, ‘O kavurikea e Bakovi Dagi, a Vure vomu, o ramai kunana ia.’”

<sup>11</sup>Muri a hanitu i ha taroa. I valai ngane e huriki a agelo ri tuhorua.

#### **E Isu i Vakatabu ni Vara**

*(Markus 1:14-15; Lukas 4:14-15; Ioanes 4:3,43-45)*

<sup>12</sup>*i*Na tahuna e Isu i longoa a velengane Ioanes ni ru dili na bavi, i hamule lakea o Galili. <sup>13</sup>I malaga o Nasaret, i vano i made o Kapernaum, a tanga tabukoi na darilomu na malala ne huriki a kabu ne Sebulun e Naptali. <sup>14</sup>Ngane i bele muholi a ngava ni taki polo na propet, e Isaia, i ta maea,

<sup>15</sup>*j*“E huriki ri made na malala ne huriki a Sebulun, e huriki a Naptali, a dala i pori lakea na dari, na tabeke tara na naru e Iordan, a robo e Galili, ra i made vona e huriki i uka ma ria a Iuda,

<sup>16</sup>e huriki ri made na uvo  
ri masia a nipara dagi;  
e huriki ri made na maniru na matenga,  
a nipara i parai ria.”

<sup>17</sup>*k*Ngane e Isu i vakatabu ni vara maea, “Mu pulo a vilone mua. A harikianga na hunu i tabukoi ge bele.”

#### **E Isu i Gale e Huriki a Murimuri**

*(Markus 1:16-20; Lukas 5:2-11; Ioanes 1:35-42)*

<sup>18</sup>Na parava tara, e Isu i lalaho na gagana Darilomu e Galili, i matai e maki tari rua, e Simon (a rana tara e Petrus), turana e tarina e Andreas.

<sup>f</sup> 4:6 Sng 91:11-12   <sup>g</sup> 4:7 Vin 6:16   <sup>h</sup> 4:10 Vin 6:13   <sup>i</sup> 4:12 Mat 14:3; Mrk 6:17;  
Luk 3:19-20   <sup>j</sup> 4:15-16 Ais 9:1-2   <sup>k</sup> 4:17 Mat 3:2; 10:7

Ru ru a vuko, a vuhuna rua a tahodari. <sup>19</sup>Lakea e Isu i gale rua, i ta maea, “Muru valai, muru muri nau. Ga tovo marua ni tuli valai nau e huriki a bakovi, i manga a hini ngane muru lakavu a manu.” <sup>20</sup>Ru malaviriri kunana ru pea a vuko ne rua, ru muri maia.

<sup>21</sup>I laho lokovonga, i matai tabu e maki tarina rua, e Iakop e Ioanes. Ru made na aga turane tamane rua, e Sebedi, to hono a vuko. Lakea e Isu i gale rua. <sup>22</sup>Ru malaviriri kunana ru pea e tamane rua na aga, ru ramaia e Isu.

### E Isu i Vakamahuri e Huriki Ri Giloa

*(Lukas 6:17-19)*

<sup>23</sup><sup>l</sup>Muri e Isu i lakea na maka tanga na tabeke ne Galili, i dili na maka roho na vaponga, i vara e huriki na Velenga Kamumu na harikianga na hunu. I vakamahuri e huriki lobo ri tahoka a gilanga. <sup>24</sup><sup>m</sup>A velengana ni longo na tanga lobo na tabeke ne Siria, lakea e huriki ri tuli valai ne Isu e huriki ri giloa na gilanga vilihaliha, e huriki ri tahoka a nimadihi dagi, e huriki i dili ne ria a hanitu, e huriki ri matemate, e huriki a beu. Ri tuli valai vona, i kori ria lobo. <sup>25</sup><sup>n</sup>E huriki lobo o Galili, o Dekapolis, o Ierusalem, o Iudea, na tabeke tara ne Iordan, ri muri vona.

### E Isu i Tovo e Huriki

*(Lukas 6:20-23)*

**5** <sup>1</sup>Ngane e Isu i matai e huriki ri muri vona ri ala kupo, lakea i sike na gagana lolo, i made puru. E huriki a murimuri vona ri valai maia, <sup>2</sup>lakea i vakatubu ni tovo ria, i ta maea,

<sup>3</sup> <sup>o</sup> “E huriki ri ngaru hateka a Vure ge korimule ria, ri gi vivi, a vuhuna a Vure ge habi ne ria a harikianga na hunu.

<sup>4</sup> <sup>p</sup> “E huriki ri tangi ngane ri gi vivi, a vuhuna a Vure ge luke ria.

<sup>5</sup> <sup>q</sup> “E huriki ri vakakiroko mule ria ri gi vivi, a vuhuna a malala lobo bara ne ria.

<sup>6</sup> <sup>r</sup> “E huriki ri ngaru hateka ni ratena a maki lobo i kamumu na matana Vure ri gi vivi, a vuhuna a Vure ge kori kamumu ria.

<sup>7</sup> “E huriki a bakovi ni dodo ri gi vivi, a vuhuna a Vure ge dodo ria.

<sup>8</sup> “E huriki i malamala a hatene ria ri gi vivi, a vuhuna a Vure ge made turane ria.

<sup>9</sup> “E huriki ri rata e huriki ri valemu, ri gi vivi,

<sup>1</sup> 4:23 Mat 9:35; Mrk 1:39; Apo 10:38    <sup>m</sup> 4:24 Mrk 6:55    <sup>n</sup> 4:25 Mrk 3:7-8

<sup>o</sup> 5:3 Ais 57:15    <sup>p</sup> 5:4 Ais 61:2-3; Kap 7:17    <sup>q</sup> 5:5 Sng 37:11    <sup>r</sup> 5:6 Ais 55:1-2



a vuhuna a Vure ge gale ria e huriki e tuna.

<sup>10</sup> “E huriki ni vakamadihi vakaroro a vuhuna ri malamala, ri gi vivi, a vuhuna a Vure ge habi ne ria a harikianga na hunu.

<sup>11</sup> “Na tahuna e huriki ri ratapile a rane mua, ri vakamadihi vakaroro mua, ri biu tavula mua a vuhuna mu ramai iau, mu vivi. <sup>12</sup> “Mu vivi hateka, a vuhuna a Vure ge kona dagi hateka mua meli na hunu. E huriki a propet hosi, ria ranga, e huriki ri vakamadihi ria, a vuhuna ri ramai iau.

### A Sol, a Nipara na Malala (Markus 9:50; Lukas 14:34-35)

<sup>13</sup> “Mua a sol na malala. Pali a sol, ge lobo a namina, ni gi bole mule tabu navai a namina? Bara ni vuroki, i laho langa vona e huriki, a vuhuna i uka lehona.

<sup>14</sup> “<sup>v</sup>“Mua a nipara na malala. A tanga meli na kupona i uka ma ge kapiloho. <sup>15</sup> “<sup>w</sup>I uka ma si namia a lam, muri si gi kavitagua na ulo. Bara si ru polomeli na dede ge parai e huriki lobo na ruma. <sup>16</sup> “<sup>x</sup>I mavonga kunana a naro kamumu ne mua ge parai e huriki a bakovi a ngatavine, ri gi matai, ri gi kavurikea e Tamane mua na hunu.

### A Vinara na Vure

<sup>17</sup> “<sup>y</sup>“Naha ni luhoi ga valai ni vakalobo a vinara, a ngava ne huriki a propet. Iau a valai i uka ma ga vakalobo a vinara. A valai ga rata a ngavana vinara, a ngavane huriki a propet ri gi bele muholi. <sup>18</sup> “<sup>z</sup>A taki muholi mua, a hunu a malala bara ru lobo. Pali i uka tara hinere kiroko ni here pololilo na vinara ge lobo, bara i vano i harena na nilobona maki lobo. <sup>19</sup> “<sup>a</sup>E rei a viri i longotaroa tara ngava kiroko nau, i tovo e huriki ranga ri gi longotaroa, bara ni gale a bakovi tavula na harikianga na hunu. Pali e huriki ri muri mai, ri tovo a ngava lobo nau bara ni gale a bakovi dagi pololilo na harikianga na hunu. <sup>20</sup> A taki mua, a narone mua ge malamala na narone huriki a Pariseo, e huriki a mari na vinara na lotu. Ge uka, i uka ma mu gu dili na harikianga na hunu.

### A Nihinihate (Lukas 12:57-59)

<sup>21</sup> “<sup>b</sup>“Mu longo pali a vinara tara ne Moses i maea, ‘Naha ni rabalaki a viri. A Vure bara i pelekado e huriki ri rabalaki a viri.’ <sup>22</sup> “<sup>c</sup>Pali iau a taki mua, e rei a viri i tahatea e turana, a Vure bara i pelekadoa. I muholi, e

---

<sup>s</sup> 5:10 1Pe 3:14    <sup>t</sup> 5:11 1Pe 4:14    <sup>u</sup> 5:12 2Sto 36:16; Apo 7:52    <sup>v</sup> 5:14 Ion 8:12;  
9:5    <sup>w</sup> 5:15 Mrk 4:21; Luk 8:16; 11:33    <sup>x</sup> 5:16 Epe 5:8-9; 1Pe 2:12    <sup>y</sup> 5:17 Rom 3:31  
<sup>z</sup> 5:18 Luk 16:17; 21:33    <sup>a</sup> 5:19 Iak 2:10    <sup>b</sup> 5:21 Nim 20:13; Vin 5:17    <sup>c</sup> 5:22 1Ion 3:15

rei a viri i ratapilea a rane turana bara i pesi na kot ne huriki a Iuda. Pali e rei a viri i ta maea, 'Ioe a manga,' bara i puru na kanono na imperno.

<sup>23 d</sup> "I mavonga, na tahuna o habi a nihabi vomu na dede, pali o longovisia e turamu tara i tahoka a ngava vomu, <sup>24 o</sup> pe taro vonga na dede a nihabi vomu. O hamule maia e turamu, muru pelekado taro a ngava. Muri o valai o habi a nihabi vomu.

<sup>25</sup> "Na tahuna a viri i padi virihi ioe na ngava, o toni ni pelekado malaviriri a ngava, na tahuna muru tabana ni laho lakea na kot. Bara i uka, bara i turari ioe lakea na mari ni pelekado. A mari ni pelekado bara i habi ioe na limana tagari, bara ri ru dili ioe na bavi. <sup>26 A</sup> taki muholi ioe, i uka ma go pagitala, ge harena na tahuna o koli mule lobo a maki vona."

### Naha Ni Ngutu

<sup>27 e</sup> "Mu lohoka vona a vinara i ta maea, 'Naha ni mole.' <sup>28</sup> Pali iau a taki mua, e rei a viri i ngutu kunana na matana a ngatavine, i rata pali a vilo na molenga na hatena. <sup>29 f</sup> A matamu tara ge rata ioe go rata a rabu hale, o sigi talea, o vurokia. I kamumu a tabeke tara na kakaimu ge velu, pali a kakaimu lobo i uka ma ni gi voro puru na imperno. <sup>30 A</sup> limamu tara ge vakaboru ioe na rabu hale, o palakudua o vurokia. I kamumu a tabeke tara na kakaimu ge velu, pali a kakaimu lobo i uka ma ni gi voro puru na imperno.

### Naha Ni Vapile na Parangia

*(Mateo 19:9; Markus 10:11-12; Lukas 16:18)*

<sup>31 g</sup> "A vinara tara ne Moses mu longoa i maea, 'E rei a viri i ngaru ni pilea e girihina ge habia vona a raukea na nivapile.' <sup>32 h</sup> Pali iau a taki mua, e rei a bakovi i pile tavulea e girihina, re girihina i uka ma i mole, i ratea ge ratea a naro na molenga. Pali e rei a bakovi i parangi a ngatavine ni pile, a bakovi iea tara i mole.

### Naha Ni Kaba

<sup>33 i</sup> "A ngava tara na vinara mu longoa i maea, 'Na tahuna o kaba, naha ni pulo tabu a ngavamu. O ramai lobo a ngava o kaba vona ne Bakovi Dagi.'

<sup>34 j</sup> "Pali iau a taki mua, naha ni kaba. Naha ni kurahia a Hunu, a vuhuna a hunu a gula hariki na Vure. <sup>35 k</sup> Naha ni kurahia a malala, a vuhuna ia a maki a Vure i ru langa a vahana vona. Naha ni kurahia e

<sup>d</sup> 5:23 Mrk 11:25    <sup>e</sup> 5:27 Nim 20:14; Vin 5:18    <sup>f</sup> 5:29 Mat 18:9; Mrk 9:47

<sup>g</sup> 5:31 Vin 24:1-4; Mrk 10:4    <sup>h</sup> 5:32 1Ko 7:10-11    <sup>i</sup> 5:33 Levi 19:12; Gi 30:2; Vin 23:21

<sup>j</sup> 5:34 Ais 66:1; Mat 23:22; Iak 5:12    <sup>k</sup> 5:35 Sng 48:2; Ais 66:1

Ierusalem, a vuhuna ia a vuhutanga na Hariki Dagi. <sup>36</sup>Naha ni kurahia a gimu, a vuhuna o keru go ratea tara vumu ge kato o ge kea. <sup>37</sup>A ngava o taki kunana ge ‘emi,’ e ‘uka.’ A ngava ranga bara o taki, i valai kunana na hanitu.

### Naha Ni Koli a Naro Hale

(Lukas 6:29-30)

<sup>38</sup><sup>l</sup> “Mu longoa tara vinara ne Moses i maea, ‘A viri i biputua a ngimu, o koli, o biputua a ngina. A viri ge sigi talea a matamu, o koli, o sigi talea a matana.’ <sup>39</sup>Pali iau a taki mua, naha ni gegea a bakovi hale. A viri tara ge ubi a garemumu, o tabalahehe, ge ubi ioe na garemumu tara. <sup>40</sup>A viri tara ge vakapesi ioe na kot ge bolea a padirodo vomu, o habia vona tabu a varakia vomu. <sup>41</sup>A nugumaheto ge vakuku ioe go laho turana na marava i taku, go kaloho polo a maki vona, o laho turana na marava ge rua. <sup>42</sup>O habi na viri i nongi a maki vomu. Naha ni vakatoku na viri i ngaru ni bole taro vomu ranga maki.

### O Ngaru a Pile Vomumu

(Lukas 6:27-28,32-36)

<sup>43</sup><sup>m</sup> “Mu longo pali a ngava i maea, ‘Mu ngaru e huriki e turane mua, mu marikoi e huriki a pile ne mua.’ <sup>44</sup>”Pali iau a taki mua, mu ngaru e huriki a pile ne mua, mu vasileki ne huriki ri vakamadihi vakaroro mua. <sup>45</sup>Bara mu rata mavonga, bara ni gale mua e huriki e tune Tamane mua meli na hunu, a vuhuna i ratea a haro i para langa ne huriki lobo: e huriki a bakovi malamala, e huriki a bakovi hale. I habi a vala ne huriki lobo: e huriki a bakovi malamala, e huriki a bakovi hale. <sup>46</sup>Mua bara mu ngaru kunana e huriki ri ngaru mua, a ra maki kamumu mu gu bolea? E huriki a bakovi ni bole a takis, ria ranga ri ngaru kunana e huriki ri ngaru ria. <sup>47</sup>Pali mua, mu gu tagui kunana e huriki e turane mua, a narone mua ge rangi navai a narone huriki ranga? E huriki na uvo, ria ranga ri rata mavonga. <sup>48</sup><sup>o</sup>”Mu laho malamala liu, a vuhuna e Tamane mua meli na hunu i malamala liu.”

### Mu Tuhori a Matasia

**6** <sup>1</sup><sup>p</sup>Muri e Isu i ta maea, “Na tahuna mu rata a naru kamumu, naha ni vakasiri. Mu rata kapiloho. Bara mu vakasiri, i uka ma mu gu bole a mapane mua ne Tamane mua na hunu. <sup>2</sup>Na tahuna mu habi a maki na matasia, naha ni rudu mugea a viri ge vaki a tavure ge vakalongo e huriki. E huriki a tabele rua ri rata mavonga pololilo na roho na vaponga,

<sup>1</sup> 5:38 Nim 21:24; Levi 24:20; Vin 19:21 <sup>m</sup> 5:43 Levi 19:18 <sup>n</sup> 5:44 Nim 23:4-5; Luk 23:34; Apo 7:60; Rom 12:14,20 <sup>o</sup> 5:48 Levi 19:2; Vin 18:13 <sup>p</sup> 6:1 Mat 23:5

polovavo na dala. Ri ngaru e huriki ri gi kavurike ria. A taki muholi mua, ri bole lobo pali a mapane ria. <sup>3</sup>Pali mua, na tahuna mu habi a maki na matasia, mu ratea i uka ma ge lohoka vona e huriki a turane mua. <sup>4</sup>Mu habi kapiloho ne huriki a matasia. Muri e Tamane mua, ra i matai a maki ni rata kapiloho, bara i kona mua.

**A Nivasileki**  
(*Lukas 11:2-4*)

<sup>5</sup>“Na tahuna mu vasileki, naha ni rata manga e huriki a tablele rua. Na tahuna ri vasileki, ri pesi pololilo na roho na vaponga, o na harena dala, ri ngaru ni gi matai. A taki muholi mua, a mapane ria ri bole loboa pali. <sup>6</sup>Na tahuna o vasileki, o dili na ruma, o tukaria a logo, o vasileki ne Tamamu, ra i made kapiloho. Muri e Tamamu, ra i matai a maki lobo ni rata kapiloho, bara i kona ioe. <sup>7</sup>Na tahuna mu vasileki, naha ni ta tavulavula manga e huriki a bakovi i uka ma ria a Iuda ri rata. Ri pahaluhoi ta a Vure ge longo ria na tahuna ri rata a ngava i kupo. <sup>8</sup>“Naha ni ramai a narone ria, a vuhuna e Tamane mua i lohoka vona a maki mu ngaru. Na tahuna i uka ma mu takia ma, i lohoka vona pali.

<sup>9</sup>I mavonga, mu vasileki maea:

“Tamane mia meli na hunu,  
mi ngaru e huriki ri gi togoa a ramu,

<sup>10</sup>‘a harikianga vomu ge valai.

A ningaru vomu ni gi

ramai koea na malala, i manga a hini ni rata meli na hunu.

<sup>11</sup>O habi a maki ni kani ne mia ge karea a parava mona.

<sup>12</sup>“O puga vuroki a naro hale ne mia,

i manga a hini mi puga a naro hale ne huriki ri rata hale mia.

<sup>13</sup>“Naha ni tuli mia mi gi dili na nitoni.

O korimule mia na bakovi hale.”<sup>w</sup>

<sup>14</sup><sup>x</sup>“Na tahuna mu lohople a naro hale ni rata virihi mua vona, e Tamane mua na hunu tara bara i puga vuroki a naro hale ne mua. <sup>15</sup>Pali mua i uka ma mu gu lohople a naro hale ne huriki, e Tamane mua tara i uka ma ge puga vuroki a naro hale ne mua.

**A Niperemu**

<sup>16</sup><sup>y</sup>“Na tahuna mu peremu, nahea mu gu mata vitoloka i manga e huriki a tablele rua ri rata. Ri rata ria i malulu a matane ria ri gi vakasiri e huriki ta ri pile a kinani. A taki muholi mua, a mapane ria ri bole loboa

---

<sup>q</sup> **6:5** Mat 23:5; Luk 18:10-14    <sup>r</sup> **6:7** 1Ki 18:25-29    <sup>s</sup> **6:8** Mat 6:32    <sup>t</sup> **6:10** Luk 22:42

<sup>u</sup> **6:12** Mat 18:21-35    <sup>v</sup> **6:13** Luk 22:40; Ion 17:15; 2Tes 3:3; 2Tim 4:18; Iak 1:13

<sup>w</sup> **6:13** Abakovihale, re Satan.    <sup>x</sup> **6:14** Mrk 11:25-26    <sup>y</sup> **6:16** Ais 58:5-9

pali. <sup>17</sup>Pali mua, na tahuna mu peremu mu vahilolo a matane mua, mu biri a gine mua na nibiri, <sup>18</sup>i uka ma ni gi matakilaka vona mu peremu. E Tamane mua, ra i made kapiloho, i matai a maki mu rata kapiloho, bara i kona mua.

### **A Mahala na Hunu**

*(Lukas 12:33-34)*

<sup>19</sup><sup>z</sup> “Naha ni ru kadolu a mahala na malala. Koea na malala a madume, a dedu bara ri ratapile a mahala ne mua, a bakovi na panahoa bara i dili i panaho. <sup>20</sup><sup>a</sup> Mu ru kadolu a mahala na hunu. Meli na hunu, i uka madume a dedu ri gi ratapile a maki. I uka a bakovi na panahoa ge dili ge panaho. <sup>21</sup>A hatemu bara i lakea mai kunana a tabeke o ru a mahala vomu vona.

### **A Matane Hita**

*(Lukas 11:34-36)*

<sup>22</sup>“A matana viri i manga a nipara na kakaina. Na tahuna a matamu i kamumu, a nipara i kori a kakaimu lobo. <sup>23</sup>Pali na tahuna a matamu i hale, a kakaimu lobo bara i made na uvo. Pali a matamu i uka ma ge habi tabu a nipara vomu, bara o made na uvo dagi.

### **Naha Ni Leho na Bakovi Dagi Ge ala Rua**

*(Lukas 16:13)*

<sup>24</sup>“I uka tara viri ge vora na bakovi ala rua, a vuhuna bara i koi vona tara, i ngarua tara. Bara i habi a hatena na bakovi tara, i biu a bakovi tara. I uka tara viri ge vora varago na Vure, a moni.

### **Naha Ni Loho Lege**

*(Lukas 12:22-31)*

<sup>25</sup><sup>b</sup> “I mavonga a taki mua naha ni luhoi lege lae vona a nimade ne mua, a maki mu gu kani, a maki mu gu ninu. Naha ni luhoi lege lae vona a kakaine mua, a ra maki mu gu rodo. A maki dagi a nimahuri, a maki kiroko a maki ni kani. A maki dagi hateka a kakaina viri, a maki kiroko a varakia. <sup>26</sup><sup>c</sup> Mu matai a maka kadirovo, i uka ma ri varo a maki ni kani, i uka ma ri mirio kilala. Ri uka roho ni ru kadolu a maki ni kani. Pali e Tamane mua na hunu i vakani ria. Mua ranga, bara i vakani mua, a vuhuna a Vure i ngaru hateka mua na maka kadirovo. <sup>27</sup>A naro ni luhoi lege, i uka ma ge kori ioe go mahuri malaku. <sup>28</sup>“Pali i navai mu luhoi lege lae na maki mu gu rodo? Mu matai a maka hurumade. I uka

<sup>z</sup> 6:19 Iak 5:1-3    <sup>a</sup> 6:20 Mat 19:21; Luk 18:22    <sup>b</sup> 6:25 Pili 4:6; 1Tim 6:6-8; 1Pe 5:7

<sup>c</sup> 6:26 Mat 10:29-31; Luk 12:6-7

ma ri leho kilala, i uka ma ri rahi kilala a varakia. <sup>29</sup>dPali a taki mua, a hurumade nga ri bagetu keke hateka, ri kamumu hateka na bagetua ne Solomon, ra hosi i bagetu kamumu hateka. <sup>30</sup>A Vure i vakabagetu a maka hurumade ri tabuli popote kunana, muri ri mate. Pali mua ranga, a Vure bara i vakabagetu mua. A bagetua ne mua bara i kamumu hateka na bagetua na hurumade. Ra mua, i uka ma mu luhoi tora hatekea a Vure. <sup>31</sup>I mavonga, naha ni loho lege lae mu gu ta maea, 'A ra mi gi kania?' o 'A ra mi gi nua?' o 'A ra mi gi rodoa?' <sup>32</sup>eE huriki i uka ma ria a Iuda ri nunu muri mai a maka maki nga. Pali e Tamane mua meli na hunu i lohoka vona mu ngaru a maki nga. <sup>33</sup>fNaha ni luhoi a maki nga. Mu luhoi taro a harikianga vona, muri a maki nga ranga bara ni habi. <sup>34</sup>I mavonga, naha ni luhoi lege lae na a ra maki ge bele kuduvi. A parava kuduvi bara i tahoka a maregoa vona. Mu luhoi kunana a parava mona."

### Naha Ni Pelekado a Viri

(Lukas 6:37-38,41-42)

**7** <sup>1</sup>g "Naha ni pelekado a viri, lakea e Bakovi Dagi i uka ma ge pelekado mua. <sup>2</sup>hBara i pelekado mua ge manga a hini mu pelekado e huriki ranga. A naro mu rata virihi e huriki ranga, a Vure tara bara i rata virihi mua vona. <sup>3</sup>I navai o masia a muku na matane turamu, pali o mata kepa vona a bokona kai i koro na matamu ke? <sup>4</sup>Go taki navia e turamu, 'Ga kuri tala a muku na matamu,' pali a matamu i vona a bokona kai dagi? <sup>5</sup>Ioe a bakovi na taminga! O bole tala taro a bokona kai na matamu, muri bara o matai kamumu, o kuri tala a muku na matane turamu.

<sup>6</sup>"Naha ni habi na ligo a maki na Vure, bara i kara mate ioe. Naha ni vuroki lakea na boro a kepe ne mua, bara i paha loi.

### Mu Nana, Mu Matakana, Mu Tutulidi

(Lukas 11:9-13)

<sup>7</sup>i "Mu nana a maki mu ngaru, lakea a Vure bara i habi ne mua. Mu matakana a maki mu ngaru, lakea a Vure bara i kori mua mu gu bole. Mu tutulidi, a Vure bara i talea a logo, bara mu dili. <sup>8</sup>jMu rata mavonga, a vuhuna e huriki ri nana a maki, bara ri bole visi. E huriki ri matakana a maki, bara ri matavisi. E huriki ri tutulidi, bara ri dili visi.

<sup>9</sup>"E rei ne mua, ge ngaru a bret e tuna, ge habi a kedo vona? <sup>10</sup>O ge ngaru a manu e tuna, ge habi a mata vona? <sup>11</sup>k Mua e huriki a bakovi hale, pali mu matakari kamumu e huriki e tune mua. E Tamane mua meli

<sup>d</sup> 6:29 1Ki 10:4-7; 2Sto 9:3-6    <sup>e</sup> 6:32 Mat 6:8    <sup>f</sup> 6:33 1Ki 3:11-14; Sng 37:4,25; Rom 14:17

<sup>g</sup> 7:1 Rom 2:1; 1Ko 4:5; Iak 4:11-12    <sup>h</sup> 7:2 Mrk 4:24    <sup>i</sup> 7:7 Mrk 11:24; Ion 14:13; 15:7; 16:23-24    <sup>j</sup> 7:8 1Ion 3:22; 5:14-15    <sup>k</sup> 7:11 Iak 1:17

na hunu i kamumu liu. Pali i navai mu luhoia i uka ma ge habi a maki kamumu ne huriki ri nanea? <sup>12</sup> I mavonga, a ra naro mu ngaru e huriki ri gi rata virihi mua vona, mua ranga mu rata. A ngava iea kunana ia a vuhuna a vinara ne Moses, a nitane huriki a propet.

### A Logo Kiroko, a Logo Dagi

(Lukas 13:24)

<sup>13</sup> “Mu dili na logo bala holo, a vuhuna a dala na vuranga i bola, a logo vona i ngavaka. <sup>14</sup> Pali a dala na nimahuri vakaroro i kiroko, a logo vona i bala holo. E huriki ala propote kunana bara ri matavisia.

### A Kanena Kai

(Lukas 6:43-44; 13:25-27)

<sup>15</sup> <sup>m</sup> “Mu matadoko vona e huriki a nitamina propet. Ri tamilalu ni rata a rabu kamumu, pali ri ngaru ni ratapile mua. Ri manga a kaugara i tamilalu ni made madoru, ge lakavu a sipsip. <sup>16</sup> <sup>n</sup> Mu matai a rabune ria, bara mu matakilala ria. I uka ma si pasi a vuana vao na barakau. I uka ma si gi pasi a kanena kulu na ngatavinekou. <sup>17-18</sup> A kai kamumu i uka ma ge vakabele a kanena ge hale. Bara i vakabele kunana a kanena i kamumu. A kai hale i uka ma ge vakabele a kanena ge kamumu. Bara i vakabele kunana a kanena i hale. <sup>19</sup> <sup>o</sup> A kai lobo i uka ma ri vakabele a kanena i kamumu, bara ni tolo vuroki, ni voro rike na kanono. <sup>20</sup> <sup>p</sup> I mavonga kunana, mu matai a rabune huriki a nitamina propet, bara mu matakilala ria. <sup>21</sup> <sup>q</sup> Naha ni luhoi e huriki lobo ri gale iau e ‘Bakovi Dagi, Bakovi Dagi’ ri gi dili na harikianga na hunu. E huriki bara ri dili, re huriki ri ramai a ningaru ne Tata na hunu. <sup>22</sup> Na nilobona parava e huriki ala kupo bara ri taki iau, ri ta maea, ‘Bakovi Dagi, Bakovi Dagi, mi rata na ramu a nita propet. Mi lili tala e huriki a hanitu na ramu. Mi rata a maka nivakasiri i kupo.’ <sup>23</sup> <sup>r</sup> Pali iau ga ta kavakava ne ria, ga ta maea, ‘I uka ma lohoka ne mua. Mu malele ha nau, mua e huriki a mari ni putu puru a vinara.’

### Ni Hae a Roho

(Lukas 6:47-49)

<sup>24</sup> “E huriki ri longo a nitagu, ri longototo, ri manga a bakovi i tahoka a niluhoi kamumu, i hae a roho vona langa na kedo. <sup>25</sup> Muri a vala i boru, i tua a meka. A vilu i pori, i pulua a roho. Pali i uka ma i mapuka, a vuhuna a butuna i pesi langa na kedo.

<sup>1</sup> 7:12 Mat 22:39-40; Luk 6:31; Rom 13:8-10    <sup>m</sup> 7:15 Mat 24:24; Apo 20:29; 2Pe 2:1

<sup>n</sup> 7:16 Gal 5:19-22; Iak 3:12    <sup>o</sup> 7:19 Mat 3:10; Luk 3:9; Ion 15:6    <sup>p</sup> 7:20 Mat 12:33

<sup>q</sup> 7:21 Luk 6:46; Iak 1:25    <sup>r</sup> 7:23 Sng 6:8; 2Tim 2:19

<sup>26</sup>“Pali a viri i longo a ngavagu, pali i longotaro, i manga a bakovi i uka niluhoi kamumu. I hae langa na hire a roho vona. <sup>27</sup>Muri i boru a vala, i tua a meka. A vilu i pori, i pulua a ruma, lakea i mapuka, i tangi pahumu puru.”

<sup>28</sup>E Isu i ta lobo, lakea e huriki ri turutu vona a nivara vona, <sup>29</sup><sup>a</sup> vuhuna i uka ma i vara manga e huriki a mari na vinara na lotu. I vara manga a bakovi i tahoka a nitora.

### A Bakovi i Giloa na Patala (Markus 1:40-42; Lukas 5:12-14)

**8** <sup>1</sup>Na tahuna e Isu i raga na lolo, a bakovi ala kupo hateka ri muri vona. <sup>2</sup>A bakovi tara i ratapilea a patala i valai, i turume puru na matane Isu, i ta maea, “Bakovi Dagi, ioe bara o ngaru, o vakamatapado iau.”

<sup>3</sup>Lakea e Isu i toto talea a limana, i padoia, i ta maea, “Iau a ngaru. O matapado.” I malaviriri kunana i malaharuri vona a patala. <sup>4</sup>Muri e Isu i takia, “Naha ni takia tara viri. O vano o vakasiri ioe na prister. Muri o habi a nihabi vomu, i manga a hini e Moses i taki hosi. Lakea e huriki ri gi matakilaka vona ioe ni vakamatapado pali.”

### A Vora na Ubu (Lukas 7:1-10)

<sup>5</sup>Na tahuna e Isu i dili o Kapernaum, a ubu na tara na nugumaheto i valai vona, i takia ge koria, <sup>6</sup>i ta maea, “Bakovi Dagi, a vora nau a pea na tanga. I mate a limana a vahana, i bole a nimadihi dagi.”

<sup>7</sup>Lakea e Isu i takia, “Ga lokovonga, ga vakamahuria.”

<sup>8</sup>Pali a ubu i koli i ta maea, “Bakovi Dagi. I uka ma iau a bakovi kamumu go valai na ruma nau. O ta kunana, bara i mahuri a vora nau. <sup>9</sup>A ta maea, a vuhuna iau a longototo e huriki a bakovi dagi nau. E huriki a nugumaheto a matakari ria, ria ranga ri longototo iau. Bara takia a viri tara ge vano, bara i vano kunana. O a takia ge valai, bara i valai kunana. A takia a vora nau ‘o ratea a maki iea,’ bara i rata kunanea.”

<sup>10</sup>Na tahuna e Isu i longoa a ngavana bakovi iea, i turutu. Lakea i taki e huriki ri muri vona, i ta maea, “A taki muholi mua, i uka ma a masia ma tara bakovi o Israel ge luhoi torea a Vure ge manga a bakovi iea.” <sup>11</sup><sup>v</sup>A taki mua, e huriki ala kupo i uka ma ria a Iuda bara ri valai na tabeke lobo na malala, bara ri made turane Abraham, e Isak, e Iakop na habu na harikianga na hunu. <sup>12</sup><sup>w</sup>Pali e huriki a Iuda, ra ri made muga na

---

<sup>s</sup> 7:29 Mrk 1:22; Luk 4:32    <sup>t</sup> 8:4 Levi 14:1-32; Mat 9:30; Luk 17:14    <sup>u</sup> 8:10 A ubu na tara na nugumaheto a bakovi o Rom. I uka ma ia a Iuda. I mavonga e Isu i turutu vona a niluhoi dagi vona.    <sup>v</sup> 8:11 Luk 13:29    <sup>w</sup> 8:12 Mat 22:13; 25:30; Luk 13:28



harikianga bara ni tono tala na uvo. Bara ri tangi, i vaheri mavonga a ngine ria a vuhuna i madihi a hatene ria.”

<sup>13</sup>Muri i takia a ubu, i ta maea, “O hamule! Bara i bele manga a hini o luhoi tora ge bele.” Na kilala iea kunana, a vora vona i tavaga.

### **E Lahuane Petrus**

*(Markus 1:29-34; Lukas 4:38-41)*

<sup>14</sup>Muri e Isu i lakea na ruma ne Petrus. Na tahuna i bele, i masia e lahuane Petrus, a ngatavine, i mahita na kiri, i rongo a kulina. <sup>15</sup>Lakea i padoia a limana ngatavine, i lobo a gilanga vona. Lakea a ngatavine iea i pesi rike, i vakatubu ni gutu a maki ni kani ne Isu.

<sup>16</sup>Na malunga ni tuli valai vona e huriki i dili ne ria a hanitu. I taki e huriki a hanitu ri gi ha, lakea ri ha. I vakamahuri e huriki ri giloa. <sup>17</sup>Na naro iea kunana i bele muholi a nita i herea a propet e Isaia hosi, i ta maea,

“I korimule hita na gilanga,  
i vakamahuri hita.”

### **A Naro Ni Muri Mai e Isu**

*(Lukas 9:57-60)*

<sup>18</sup>Na tahuna e Isu i matai e huriki ala kupo ri pesi haluia, i taki e huriki a murimuri vona ri gi rike na aga, ri gi polo lakea na tabeke tara na darilomu. <sup>19</sup>Muri tara mari na vinara na lotu i valai vona i ta maea, “Mari ni tovo. I vai a hini go lakea vona, ga muri mai ioe kunana.”

<sup>20</sup><sup>y</sup>Lakea e Isu i koli i ta maea, “A kaugara i tahoka a dupina i mahita vona. A kadirovo i tahoka a nuna i mahita vona. Pali a Tuna Bakovi i uka ruma ge mahita vona.”<sup>z</sup>

<sup>21</sup><sup>a</sup>Muri a murimuri tara i takia, “Bakovi Dagi, ga vano taro, ga tanua e tata.”

<sup>22</sup>Pali e Isu i koli maea, “E huriki ri made na uvo ri manga e huriki a viri ri mate pali. O taparaki ria ri gi tanu e huriki a viri ne ria. Pali ioe, o muri mai iau.”

### **E Isu i Vakamalilo a Dari**

*(Markus 4:36-41; Lukas 8:22-25)*

<sup>23</sup>Muri e Isu i rike na aga turana e huriki a murimuri vona. <sup>24</sup>I bele vakaturutu ne ria vavo na dari a vala, a vilu dagi. I bolu hateka a dari, i dili na aga. Pali e Isu i mahita. <sup>25</sup>E huriki a murimuri vona ri vangoa, ri ta maea, “Bakovi Dagi, o korimule hita, ma ga si gi pasiri!”

<sup>x</sup> 8:17 Ais 53:4    <sup>y</sup> 8:20 2Ko 8:9    <sup>z</sup> 8:20 O matai a hanuna kaugara ne Lukas 9:58.

<sup>a</sup> 8:21 1Ki 19:20

<sup>26</sup><sup>b</sup>E Isu i koli, i ta maea, “I navai mu mangenge? I uka ma mu luhoi tora hateka.” Muri i pesi rike i tahate a vilu a dari, ru pasi valo puru, a dari i malilo liu.

<sup>27</sup>Ri turutu, ri vanana, “Ia a bakovi navai? A vilu a dari ru longototoa.”

**E Isu i Kori a Bakovi ala Rua**  
(Markus 5:1-17; Lukas 8:26-37)

<sup>28</sup>Ngane e Isu i bele na tabeke tara na Darilomu e Galili, na robo ne huriki a Gadare. Na tahuna i bele, i pugai a bakovi ala rua, ru pagitala na murine huriki ri mate. A bakovi nga, i dili ne rua a hanitu. E huriki ri mangenge ni polo vonga, a vuhuna ru rata tuhare hateka. <sup>29</sup><sup>c</sup>Lakea ru gale dagi, ru nanea, “Tuna Vure, a ra go ratea ne mia? A parava a Vure ge pelekado mia i tabana. Pali i navai o valai malaviriri go vakamadihi mia?” <sup>30</sup>A kabuna boro i kani tabukoi. <sup>31</sup>Lakea e huriki a hanitu ri nana torea e Isu, ri ta maea, “Ioe go lili tala mia, o rudu mia mi gi dili na kabuna boro nga.”

<sup>32</sup>Lakea e Isu i ta maea, “Mu vano!” Lakea e huriki a hanitu ri pagitala ne rua, ri dili na kabuna boro. Lakea a maka boro ri nunu puru mai a gali, ri to na darilomu, ri pasiri. <sup>33</sup>E huriki a matakari na boro ri ha. Ri nunu lakea na tanga, ri vakalongo e huriki vonga a maki i bele na bakovi ala rua nga, ra i pagitala ne rua a hanitu. <sup>34</sup>Muri e huriki na tanga dagi ri pagitala ri gi masia e Isu. Na tahuna ri masia, ri tonoa ge pe a tabeke ne ria, ge vano.

**A Bakovi Vaha Mate**  
(Markus 2:2-12; Lukas 5:18-26)

**9** <sup>1</sup><sup>d</sup>Muri e Isu i rike na aga, i pasi polo na darilomu, i bele na tanga vona. <sup>e</sup><sup>2</sup>Na tahuna i made vonga, e huriki a bakovi ranga ri kaloho vilia vona a bakovi i mate a vahana, i mahita na moke. Na tahuna i matai ria ri luhoi tora ia, i takia a vaha mate, “O tugu. Naha ni luhoi lege. A puga vuroki a naro hale vomu.”

<sup>3</sup>Lakea e huriki a mari na vinara na lotu ri luhoi maea, “Ra bakovi iea, i hale hateka, i pahaluhoi ta ia a Vure.”

<sup>4</sup><sup>f</sup>E Isu i lohoka na niluhoi ne ria, lakea i ta maea, “I navai mu luhoi hale? <sup>5</sup>I vai a ngava kavakava ga takia? Ga ta maea, ‘A puga vuroki a naro hale vomu,’ o ga ta maea, ‘O pesi rike o laho?’ <sup>6</sup><sup>g</sup>Pali ngane ga vakasiri mua, a Tuna Bakovi i tahoka a nitora koea na malala ni puga vuroki a naro hale.” Muri i takia a vaha mate, i ta maea, “O pesi rike, o bolea a moke vomu, o lakea na tanga.”

---

<sup>b</sup> 8:26 Mat 14:31; Sng 89:9    <sup>c</sup> 8:29 Mrk 1:24; Luk 4:41    <sup>d</sup> 9:1 Mat 4:13    <sup>e</sup> 9:1 Atanga vona, e Kapernaum    <sup>f</sup> 9:4 Luk 9:47; Ion 2:25    <sup>g</sup> 9:6 Ion 17:2

<sup>7</sup>Lakea i pesi rike, i lakea na tanga. <sup>8</sup>Na tahuna e huriki ri masia a naro iea, ria lobo ri mangenge, lakea ri kavurikea a Vure, ra viri i habi a nitora.

**E Isu i Galea e Mateo**  
(*Markus 2:13-14; Lukas 5:27-28*)

<sup>9</sup>Muri e Isu i malaga, i laho lokovonga. I masia a bakovi tara, a rana e Mateo, i mamade na roho na takis. Lakea e Isu i takia, “O muri nau.” Lakea e Mateo i pesi rike, i muri maia.

<sup>10</sup>Muri e Isu i vano, i kani na ruma ne Mateo. E huriki a bakovi ni bole a takis, e huriki a bakovi hale, ri valai, ri kani turane Isu, e huriki a murimuri vona. <sup>11</sup><sup>h</sup>Na tahuna e huriki a Pariseo ri masia, ri nana e huriki a murimuri vona, ri ta maea, “I navai a mari ni tovo ne mua i kani turana e huriki a bakovi ni bole a takis, e huriki a bakovi hale?”

<sup>12</sup>Na tahuna e Isu i longoa a ninana iea, i ta maea, “E huriki i uka ma ri giloa i uka ma ri gi matai a dokta. E huriki ri giloa kunana bara ri masia. <sup>13</sup><sup>i</sup>Mu vano mu luhoi kado taroa a nitana Vure iea: ‘I uka ma a ngaru a nihabi. A ngaru a rabu ni dodo.’ Iau a valai i uka ma ga gale mua e huriki mu luhoi ta mu malamala mu gu pulo a vilone mua. A valai ga gale e huriki ri naro hale ri gi pulo a vilone ria.”

**A Rabu ni Peremu**  
(*Markus 2:18-22; Lukas 5:33-39*)

<sup>14</sup><sup>j</sup>Muri e huriki a murimuri ne Ioanes ri valai, ri nanea e Isu, “I navai mia turana e huriki a Pariseo mi peremu, pali e huriki a murimuri vomu i uka ma ri peremu?”

<sup>15</sup>E Isu i koli, i ta maea, “Ri gi tangi navai e huriki ri valai na habu na parangia? Pali na tahuna a bakovi i parangi karaba ni tuli tala ne ria, bara ri peremu.

<sup>16</sup>“I uka ma si gi bolea a mavidana lavalava karaba si gi rahi karia a hini i marape na matutu na varakia. Bara si rata mavonga, na tahuna si loi a varakia, a mavidana lavalava karaba bara i hoho, i turapea a matutuna varakia, muri bara i ratea a hini mavida i ngavaka. <sup>17</sup>I uka ma si gi guru dili a vain karaba na matutuna buroi ni rata na kulina meme.<sup>k</sup> Bara si rata mavonga, bara i mapoda a kulina meme, i maguru tala a vain. A vain karaba bara ni guru dili na buroi karaba, lakea a vain, a buroi bara ru kamumu varago.”

**E Isu i Vakamahuri a Koma**  
(*Markus 5:22-43; Lukas 8:41-56*)

<sup>18</sup>I uka ma i vakalobo ma a nitana, i valai tara matakari na roho na vavonga, i turume puru na ngalane Isu i togoa, i ta maea, “E tugu a ngatavine i mate ngane kunana. O valai o padoia, ge mahuri mule.”

---

<sup>h</sup> 9:11 Luk 15:2    <sup>i</sup> 9:13 Hos 6:6; Mat 12:7    <sup>j</sup> 9:14 Luk 18:12    <sup>k</sup> 9:17 A buroi ne huriki a Iuda ni rata na kulina me.

<sup>19</sup>Lakea e Isu i pesi rike i vano turana. E huriki a murimuri vona, ria ranga ri lokovonga.

<sup>20</sup>Na tahuna ri lalaho lokovonga, a ngatavine tara, i pori vona a dara na pida i ravulu a polona i rua, i laho valai muri ne Isu, i padoi a ngutuna varakia vona. <sup>21</sup>I rata mavonga, a vuhuna i luhoi maea, “Iau ga padoi kunanea a varakia vona, bara tavaga.”

<sup>22</sup>Ngane e Isu i matagege, i masia, i ta maea, “Naha ni luhoi lege. O tavaga a vuhuna o luhoi tora iau.” Malaviriri kunana, i lobo a gilanga vona.

<sup>23</sup>Na tahuna e Isu i bele na ruma na matakari, i matai e huriki ri haloho, <sup>24</sup>lakea i taki ria, “Mu ha. A koma i uka ma i mate. I mahita kunana.” Lakea ri nongo vakia. <sup>25</sup>Ni tonono tala lobo e huriki, muri i dili, i nugua a limana a koma ngatavine, lakea i mahuri mule. <sup>26</sup>A velengana ni longo na tanga lobo na tabeke iea.

### A Kepa ala Rua

<sup>27</sup><sup>m</sup>E Isu i malaga tabu, i laho lokovonga. Lakea a bakovi ala rua ru kepa, ru muri vona ru gale tala, ru ta maea, “O hamone Davit, o dodo maria.”

<sup>28</sup>Na tahuna i dili na ruma, a kepa nga ru valai vona, lakea i nana rua, “Muru luhoi iau a kara ni vakamatapara marua?”

Lakea ru koli, “Bakovi Dagi, i muholi.”

<sup>29</sup>Muri i padoi a matane rua i ta maea, “Ge bele manga a hini muru luhoi ge bele.” <sup>30</sup><sup>a</sup>Lakea ru mata para. E Isu i taki tora rua, i ta maea, “Naha ni vakalongoa tara viri na maki i bele ne marua.” <sup>31</sup>Pali ru vano, ru vakalongo lae na tabeke iea a maki i bele ne rua.

<sup>32</sup>Na tahuna ru vano, a bakovi i dili vona a hanitu, i ngavarubu, ni tuli valai ne Isu. <sup>33</sup><sup>o</sup>Lakea e Isu i lili talea a hanitu. Muri a bakovi iea i vakatubu ni ta. E huriki ri made turane Isu ri turutu, ri ta maea, “I uka tara maki maea ge bele hosi o Israel!”

<sup>34</sup><sup>p</sup>Pali e huriki a Pariseo ri ta maea, “I lili tala e huriki a hanitu na nitora na hariki na hanitu.”

### I Uka Vora

<sup>35</sup><sup>q</sup>E Isu i lakea na tanga dagi, a tanga kiroko lobo, i tovo e huriki pololilo na roho na vaponga. I vara e huriki na Velenga Kamumu na harikianga na Vure. I vakamahuri e huriki lobo ri giloa. <sup>36</sup><sup>r</sup>Na tahuna i matai e huriki, i dodo ria, a vuhuna a niluhoi ne ria i varoru, ri uka

<sup>1</sup> 9:21 Mat 14:36    <sup>m</sup> 9:27 Mat 20:29-34    <sup>n</sup> 9:30 Mat 8:4    <sup>o</sup> 9:33 Mrk 2:12

<sup>p</sup> 9:34 Mat 12:24; Mrk 3:22; Luk 11:15    <sup>q</sup> 9:35 Mat 4:23; Mrk 1:39    <sup>r</sup> 9:36 Gi 27:17; 1Ki 22:17; Sek 10:2; Mat 14:14; Mrk 6:34

nitora. Ri manga a maka sipsip ri uka matakari. <sup>37</sup>Muri i taki e huriki a murimuri vona, “A maki ni kani na hania i kupo hateka, pali e huriki a bakovi ni mirio i uka ma ri ala kupo hateka. <sup>38</sup>Lakea mu nanea a tahona hania ge rudu valai tabu ranga bakovi ri gi mirio.”

**E Huriki a Apostolo**  
(*Markus 3:13-19; Lukas 6:12-16*)

**10** <sup>1</sup>Muri e Isu i gale palupu e huriki a murimuri vona ala ravulu a polona i rua, i habi a nitora ne ria ni lili vuroki a hanitu, ni vakamahuri e huriki ri giloa.

<sup>2</sup>A rana e huriki a apostolo ala ravulu a polona i rua ra nga: e Simon (a rana tara e Petrus), e tarina e Andreas. E Iakop e Ioanes, rua e tune Sebedi. <sup>3</sup>E Pilip rua e Bartolemeus. E Tomas rua e Mateo (a bakovi ni bole a takis). E Iakop e tune Alpius, e Tadeus. <sup>4</sup>E Simon a hamone Silot, e Iudas Iskariot, ra viri i habi e Isu na limane huriki a bakovi hale.

**E Isu i Rudu Tala e Huriki a Apostolo**  
(*Markus 6:7-13; Lukas 9:1-5*)

<sup>5</sup>E Isu i rudu tala a apostolo nga ala ravulu a polona i rua, i taki tora ria, i ta maea, “Naha ni lakea mai e huriki i uka ma ria a Iuda. Naha ni dili na tanga ne huriki a Samaria. <sup>6</sup>“Mu lakea mai kunana e huriki a kabu ne Israel. Ri manga a kabuna sipsip ri velu na robo. <sup>7</sup>“Mu vara maea, ‘A harikianga na hunu i valai tabukoi pali.’ <sup>8</sup>“Mu vakatavaga e huriki ri giloa, mu vakamahuri mule e huriki ri mate, mu vakamatapado e huriki ri tahoka a patala, mu lili tala e huriki a hanitu. A habi tavula a nitora ne mua, lakea mua ranga, mu kori tavula e huriki. <sup>9</sup>“Na tahuna mu vano, naha ni bole a gol, a silva, a moni. <sup>10</sup>“Naha ni bole a hole. Naha ni bole a varakia ge rua. O bole ge taku kunana. Naha ni bole a vahapolo, a kodo. Mu laho pa, a vuhuna a vora bara ni vakani.

<sup>11</sup>“E rei a tanga dagi o a tanga kiroko mu dili vona, mu matakanea tara bakovi kamumu. Mu made turana bakovi iea kunana, i vano i harena na tahuna mu pea a tanga iea. <sup>12</sup>“Na tahuna mu bele na ruma, mu tagui e huriki vonga. <sup>13</sup>A tahona ruma ge rata kamumu mua, mu nanea a Vure ge rata kamumua. Pali a tahona ruma i uka ma ge rata kamumu mua, a Vure i uka ma ge rata kamumua. <sup>14</sup>“E rei a tanga i uka ma i tagui mua, i uka ma ri longo a ngavane mua, mu pe a tanga iea, mu biua, mu kurudu pasi a habulo na vahane mua, a vuhuna ri biu mua. <sup>15</sup>“A taki mua, na tahuna a Vure i pelekado e huriki, a nimadihi bara i bolea e huriki na

---

<sup>9</sup> 9:37 Luk 10:2    <sup>1</sup> 10:1 Mrk 6:7; Luk 9:1    <sup>u</sup> 10:6 Jer 50:6    <sup>v</sup> 10:7 Mat 3:2; 4:17;  
Luk 10:9,11    <sup>w</sup> 10:9 Luk 10:4    <sup>x</sup> 10:10 Luk 10:7; 1Ko 9:14    <sup>y</sup> 10:12 Luk 10:5-6  
<sup>z</sup> 10:14 Luk 10:10-12; Apo 13:51    <sup>a</sup> 10:15 Mat 11:24; Iud 7

tanga iea bara i dagi hateka na nimadihi i bolea e huriki na tanga e Sodoma, e Gomora.

**E Huriki Bara Ri Vakamadihi Mua**  
(Markus 13:9-13; Lukas 21:12-17)

<sup>16 b</sup>“A rudu tala mua manga a tuna sipsip ri laho na kurukuruna kabu na kaugara. I mavonga, mu mamata, mu made madoru manga a balu. <sup>17 c</sup>Mu matadoko ne huriki a bakovi. Bara ri vakapesi mua na ngava. Bara ri hotu mua pololilo na maka roho na vaponga. <sup>18</sup>Bara ri turari mua mu pesi na matane huriki a matakari, a hariki a vuhuna mu ramai iau. I mavonga e huriki nga, turana e huriki i uka ma ria a Iuda, bara mu vakalongo ria vona a maki mu matai iau a rata, a ngava a taki. <sup>19</sup>Na tahuna ri lakavu mua, naha ni loho lege lae na maki mu gu taki o mu gu ta navai. A Vure bara i habi ne mua a ngava bara mu taki na tahuna iea, <sup>20 d</sup>a vuhuna a ngava mu gu taki, i uka ma ga ngavane mua. A Hanune Tamane mua bara i ta polo ne mua.

<sup>21 e</sup> “E maki tari rua, a viri tara bara i habi e turana na limane huriki a pile, ri gi rabalakia. A bakovi bara i lohoplea e tuna. E huriki a koma bara ri lohople e tamane ria, e kinane ria, bara ri rudu ni gi rabalaki. <sup>22</sup>E huriki a bakovi a ngatavine bara ri marikoi ne mua, a vuhuna mu ramai iau. Pali e rei a viri i pesi tora mavonga ni ramai iau, a Vure bara i korimulea. <sup>23</sup>Na tahuna a tanga tara i vakamadihi mua, mu ha taroa, mu lakea na tanga tara. A taki muholi mua, i uka ma mu gu paha lobo ma a tanga o Israel, a Tuna Bakovi bara i valai pali.

<sup>24-25 f</sup> “A murimuri i uka ma ge rangia a viri i tovoa. A ra maki i bele vona a mari ni tovo, bara i bele na murimuri vona. A vora tara, i uka ma i rangia a matakari vona. A ra maki i bele na matakari, bara i bele na vora vona. I mavonga, na tahuna e huriki ri taki iau, a tahona ruma, ta iau e Belsabub, mua ranga, bara ri taki mua a kabu nau, ta mua e Belsabub.

**Mu Mangenge na Vure Kunana**  
(Lukas 12:2-7)

<sup>26 g</sup> “Naha ni mangenge ne ria. A maki lobo ni rata kapiloho bara i bele kavakava. A maki lobo ni ruhulolo bara ni taki tala. <sup>27</sup>A ngava a taki mua na uvo, mu vakalongo na hini palala. A ngava ni reme mua vona, mu pesi na mapana roho mu vakalongo e huriki vona. <sup>28 h</sup>Naha ni mangenge

<sup>b</sup> 10:16 Luk 10:3; Rom 16:19    <sup>c</sup> 10:17-20 Mrk 13:9-11; Luk 12:11-12;

21:12-15    <sup>d</sup> 10:20 Ion 14:26    <sup>e</sup> 10:21 Mai 7:6; Mat 10:35; Mrk 13:12; Luk 21:16

<sup>f</sup> 10:24-25 Mat 9:34; 12:24; Mrk 3:22; Luk 6:40; 11:15; Ion 13:16; 15:20    <sup>g</sup> 10:26 Mrk 4:22; Luk 8:17    <sup>h</sup> 10:28 Iak 4:12

ne huriki a bakovi. Ria bara ri rabalaki kunana a kakaine mua. Pali a hanune mua, ri keru ni rabalakia. A viri bara mu mangenge vona, a Vure, a vuhuna i kara ia ge ratapile a kakaine mua, a hanune mua na imperno. <sup>29</sup>A tuna sisu i rua bara ni habi ni gi kona na 10 toea kunana. Pali ri mate na tahuna e Tamane mua i taki ri gi mate vona. <sup>30</sup>Mua ranga, i gi lobo pali a lilina vune mua. <sup>31</sup><sup>i</sup>Naha ni mangenge. A Vure i ngaru hateka mua na maka sisu i kupo.

### Naha Ni Maruhu ne Isu

(Lukas 12:8-9)

<sup>32</sup>“I mavonga, e rei a viri i taki e huriki a bakovi ne ia a murimuri nau, iau tara bara taki tala na matane Tata, ne ia a murimuri nau. <sup>33</sup><sup>j</sup>Pali e rei a viri i lavuni nau na matane huriki a bakovi, iau tara bara lavuni vona na matane Tata na hunu.

<sup>34</sup>“Naha ni luhoi a valai ga rata e huriki ri gi valemu. Iau a valai i uka ma ga habi a nivalemu. A valai ga rata e huriki ri gi vaubi. <sup>35</sup><sup>k</sup>A valai ga rata:

‘A bakovi ge gimana e tamana.

A ngatavine ge gimana e kinana.

A ngatavine ge gimana e kana ngatavine.

<sup>36</sup>E huriki a kabu kabu bara ri vagima.’

<sup>37</sup>“E rei a viri i ngaru e tamana e kinana, a ningaru vona i dagi hateka na hini i ngaru iau, i uka ma i kara ia ge ia a murimuri nau. A viri i ngaru hatekea e tuna, a ningaru vona i dagi hateka na hini i ngaru iau, i uka ma i kara ia ge ia a murimuri nau. <sup>38</sup><sup>l</sup>Pali e rei a viri i uka ma i kalohoa a kai tavalavala vona, i uka ma i ramai iau, i keru ge ia a murimuri nau. <sup>39</sup>E rei a viri i ha taro iau, ne vona ni korimule a kulina, bara i velu. Pali e rei a viri i mate a vuhuna i ramai iau, bara i bole a nimahuri vakaroro.

### A Mapana Leho

(Markus 9:41)

<sup>40</sup><sup>m</sup> “E rei a viri i tagui mua, i tagui iau. E rei a viri i tagui iau, i taguia a viri i rudu iau a valai. <sup>41</sup>E rei a viri i taguia a propet, a vuhuna ia a propet, a Vure bara i habia vona a mapana propet. E rei a viri i taguia a bakovi malamala, a vuhuna ia a bakovi malamala, a Vure bara i habia vona a mapana bakovi malamala. <sup>42</sup>E rei a viri i vakaninu na naru piu e huriki a murimuri tavula nau, a taki muholi mua, a Vure bara i rata kamumua.”

<sup>i</sup> 10:31 Mat 6:26    <sup>j</sup> 10:33 Mrk 8:38; Luk 9:26; 2Tim 2:12    <sup>k</sup> 10:35-36 Mai 7:6

<sup>l</sup> 10:38-39 Mat 16:24-25; Mrk 8:34-35; Luk 9:23-24; 17:33; Ion 12:25    <sup>m</sup> 10:40 Mrk 9:37; Luk 10:16; Ion 13:20

**E Ioanes Rua e Isu**  
(Lukas 7:18-35)

**11** <sup>1</sup>I vara lobo e huriki a murimuri vona ala ravulu a polona i rua, muri i malaga, i laho lae na maka tanga na tabeke ne Galili, i totovo e huriki.

<sup>2</sup>Na tahuna e Ioanes, a mari ni vahilolo, i made na bavi, i longo a velengana maka maki e Kristo i rata, lakea i rudu e huriki a murimuri vona <sup>3</sup>ri gi nanea, “Ra ioe, ioe kunana a viri a Vure i taki ge rudu vilia, o mi gi davea a viri tara?”

<sup>4</sup>E Isu i koli, i ta maea, “Mu hamule, mu vakalongoa e Ioanes vona a maki mu longo, a maki mu matai. <sup>5</sup>”E huriki a kepa ri matapara, e huriki a beu ri laho tabu, e huriki ri tahoka a patala ri matapado, e huriki ri vou ri longo mule tabu, e huriki ri mate ri mahuri mule tabu, a Velenga Kamumu ni vakalongo ne huriki a matasia. <sup>6</sup>E huriki ri matai a maki a rata, pali i uka ma ri koi nau, a Vure bara i rata kamumu ria.”

<sup>7</sup>Na tahuna e huriki a murimuri ne Ioanes ri vano, e Isu i vakatubu ni taki e huriki ne Ioanes, i ta maea, “Ra viri mu dili maia na tabeke i ngeki, i uka ma ia a bakovi ni ta viliha lae, ge manga a pagana viro i bole lelea a vilu. <sup>8</sup>I uka ma i bagetu na varakia kabakaba. E huriki ri bagetu na varakia kabakaba ri tahoka a mahala i kupo, ri made na ruma hariki. <sup>9</sup>A viri mu vano mu gu masia, a propet. A taki muholi mua, e Ioanes i uka ma ia a propet tavula kunana. <sup>10</sup>”Hosi ni vakalongo muga vona na hinere, i ta maea,

‘Ga rudua a vinuru nau ge muga vomu,  
ge pelekadoa a dalamu.’

<sup>11</sup>“A taki muholi mua, i uka tara viri i bele koea na malala ge rangia e Ioanes a mari ni vahilolo. Pali a viri i manga a bakovi tavula pololilo na harikianga na hunu i rangia e Ioanes. <sup>12</sup>”Na tahuna e Ioanes, a mari ni vahilolo, i vakatubu a leho vona, i valai i harena mona, a harikianga na hunu i koru malaviriri na nitora na Vure. E huriki a bakovi ni rata tuhare ri vaubi maia. <sup>13</sup>A nitane huriki a propet, a nitana vinara ri vakalongo muga pali, i valai i harena na tahuna e Ioanes i bele. <sup>14</sup>”Re Ioanes, ia a propet a Vure i takia ge vakaru vilia, re Elaisa. Mu longo mai, o i uka? <sup>15</sup>E rei a viri i ngaru ni longokilalea a ngavagu, ge longo kamumu, ge luhoi kado.”

<sup>16</sup>Muri e Isu i ta maea, “E huriki na tahuna mona ri manga e huriki a koma ri made na maket. E huriki a koma ranga ri gale, ri ta maea,

<sup>17</sup>‘Mi sigi a kude,

---

<sup>n</sup> 11:5 Ais 35:5-6; 61:1    <sup>o</sup> 11:10 Mal 3:1; Luk 1:76    <sup>p</sup> 11:12-13 Luk 16:16    <sup>q</sup> 11:14 Mal 4:5; Mat 17:10-13; Mrk 9:11-13



pali mu koi ni raulo.  
 Mi dua,  
 pali mu koi ni tangi.’

<sup>18</sup>“A ta maea, a vuhuna ri masia e Ioanes i uka ma i kani, i uka ma i ninu, lakea ri ta maea, ‘I dili vona a hanitu.’ <sup>19</sup>‘Pali na tahuna ri masia a Tuna Bakovi i kani, i ninu, ri ta maea, ‘Ia a bakovi ni kani hateka, ni ninu hateka. I turana e huriki a bakovi ni bole a takis, e huriki a mari ni rata a naro hale.’ Pali e huriki ri ramai a niluhoi kamumu na Vure, ri vakasiri manga a niluhoi kamumu vona i muholi.”

**A Tanga i Uka Ma Ri Pulo a Vilo**  
*(Lukas 10:13-15)*

<sup>20</sup>Muri e Isu i tahate e huriki na tanga ranga. I tahate ria, a vuhuna ri matai a nivakasiri i kupo ne Isu, pali i uka ma ri pulo a vilone ria. <sup>21</sup><sup>s</sup>Lakea i ta maea, “Mua e huriki a bakovi a ngatavine o Korasin, o Betsaida, a Vure bara i ratapile mua! A maka nivakasiri a rata na tanga ne mua, bara ni rata hosi o Tair, o Sidon, bara ri pulo malaviriri a vilone ria, ri rodo a mohu, ri voro tapa mule ne ria a habulo. <sup>22</sup>A taki mua, na parava a Vure ge pelekado e huriki vona, a nimadihi mu gu bolea bara i dagi hateka na nimadihi bara ri bolea e huriki na tanga e Tair e Sidon. <sup>23</sup>‘Mua e huriki a bakovi a ngatavine o Kapernaum, naha ni luhoi a Vure ge bole rike mua na hunu. I uka liu! Bara i voro puru mua na tanga ne huriki ri mate pali. A maka nivakasiri a rata na tanga ne mua, bara ni rata hosi o Sodoma, a tanga iea bara i tabana mona. <sup>24</sup>“A taki mua, na parava a Vure ge pelekado e huriki vona, a nimadihi mu gu bole bara i dagi hateka na nimadihi bara ri bole e huriki na tanga e Sodoma.”

**Mu Valai Nau Mu Malo**  
*(Lukas 10:21-22)*

<sup>25</sup><sup>v</sup>Muri e Isu i ta maea, “O Tata, ioe a Bakovi Dagi na hunu a malala. A kavurike ioe, a vuhuna o vakasiri a nitamu ne huriki a bakovi tavula, pali o ruhuloloa a nitamu ne huriki ri luhoi ta ri lohoka hateka. <sup>26</sup>I muholi, o Tata, o rata mavonga a vuhuna i kamumu na matamu.

<sup>27</sup><sup>w</sup> “E Tata i ru na limagu a maki lobo. I uka tara viri ge lohoka nau, ra iau e Tuna. E Tata kunana i lohoka nau. E Tata tara i uka tara viri ge lohoka vona. Iau e Tuna kunana a lohoka vona. Na tahuna iau a vulaki e huriki ranga, bara vakasiria e Tata ne ria.

<sup>r</sup> 11:19 Mat 9:10    <sup>s</sup> 11:21-22 Ais 23; Ese 26:1-28:26; Jol 3:4-8; Amo 1:9-10; Sek 9:2-4

<sup>t</sup> 11:23 Vuh 19:24-28; Ais 14:13-15    <sup>u</sup> 11:24 Mat 10:15; Luk 10:12    <sup>v</sup> 11:25 1Ko 1:26-29

<sup>w</sup> 11:27 Mat 28:18; Ion 1:18; 3:35; 10:15; 17:2

28<sup>x</sup> “E rei a viri i tahoka a nimava i kupo, o valai nau, ga habi a nimalo vomu. 29-30 Tu gu kalohoa a binole nau, a vuhuna a binole nau i uka ma i mava. O longo ga tovo ioe, a vuhuna iau a bakovi madoru, i uka ma a bakovi ni bibi rike mule iau. Ga habi a nimalo na hanumu.”

### A Bakovi Dagi na Parava Nimalo

(Markus 2:23-28; Lukas 6:1-5)

**12** <sup>1</sup>Muri e Isu i lalaho na hania na vit na Parava Nimalo. <sup>2</sup>E huriki a murimuri vona ri vitolo, lakea ri vakatubu ni pasi ranga vit, ri kani. <sup>2</sup><sup>a</sup>Na tahuna e huriki a Pariseo ri masia, ri takia e Isu, “O mata lakea! E huriki a murimuri vomu ri rata a maki a vinara i ta pupukari vona na Parava Nimalo.”

<sup>3</sup><sup>b</sup>E Isu i koli, i ta maea, “Ra mua, i uka ma mu gi a naro i ratea hosi e Davit? Na parava tara e Davit turana tara vona ri vitolo. <sup>4</sup><sup>c</sup>Lakea e Davit i dili na roho na Vure, i bole a bret, i kani, i habi ne huriki a turana, ria ranga ri kani. A bret iea a nihabi na Vure. A vinara i taki e huriki a prister kunana ri gi kani. <sup>5</sup><sup>d</sup>I uka ma mu gi na nitana vinara? E huriki a prister ri leho na roho na Vure, ri leho na Parava Nimalo, pali ri uka ngava vona. <sup>6</sup><sup>e</sup>A taki mua, a viri i rangi a roho na Vure i made koea ngane. <sup>7</sup><sup>f</sup>A nitana Vure i ta maea, ‘I uka ma a ngaru a nihabi. A ngaru a rabu ni vadodo.’ Mua bara mu longokilalea a ngava iea, i uka ma mu gu padi virihi e huriki a bakovi malamala. <sup>8</sup>A Tuna Bakovi, ia a Bakovi Dagi na Parava Nimalo.”

### E Isu i Vakamahuri a Viri

(Markus 3:1-6; Lukas 6:6-11)

<sup>9</sup>I pe a hini nga, i lokovonga i dili na roho na vaponga. <sup>10</sup><sup>g</sup>A bakovi tara i made vonga, i malai a limana. Ri matakana a ngava ri gi padi virihia e Isu vona, lakea ri nanea, “I ta navai a vinara, ni gi vakamahuri a viri na Parava Nimalo, o i uka?”

<sup>11</sup><sup>h</sup>Lakea e Isu i koli, i ta maea, “A sipsip vomu ge boru puru na lovo na Parava Nimalo, bara o lalu talea. <sup>12</sup>Pali na matana Vure, a bakovi i kamumu hateka na sipsip! I mavonga, i kamumu si gi kori a viri na Parava Nimalo.”

<sup>13</sup>Muri i takia a bakovi, “O toto talea a limamu.” Lakea i toto talea a limana i tavaga liu, i manga a limana tara. <sup>14</sup><sup>i</sup>Pali e huriki a Pariseo ri pagitala, ri vapopo, ri matakanea a dala ri gi rabalakia e Isu vona.

<sup>x</sup> 11:28 Jer 31:25   <sup>y</sup> 12:1 Vin 23:25   <sup>z</sup> 12:1 A Parava Nimalo ne huriki a Iuda na Sarere.   <sup>a</sup> 12:2 Nim 20:10   <sup>b</sup> 12:3-4 1Sam 21:1-6   <sup>c</sup> 12:4 Levi 24:5-9   <sup>d</sup> 12:5 Gi 28:9-10  
<sup>e</sup> 12:6 Mat 12:41-42   <sup>f</sup> 12:7 Hos 6:6; Mat 9:13   <sup>g</sup> 12:10 Luk 14:3   <sup>h</sup> 12:11-12 Luk 14:5  
<sup>i</sup> 12:14 Ion 5:16

### A Vure i Rudua e Isu

15 E Isu i lohoka vona a ningaru ne huriki a Pariseo, lakea i pea a tanga iea. E huriki ala kupo ri muri vona. I vakamahuri e huriki lobo ri giloa.

16<sup>j</sup> Pali i taki tora ria nahea ri gi vakalongo e huriki, ne ia e rei muholi.

17 I rata mavonga, ge bele muholi a ngava a Vure i ta polo na propet e Isaia, i maea:

18<sup>k l</sup> “Mu masia a vora nau, a vulakia.

Ia a hategu, a vivi hateka vona.

Bara vakatorea na Hanugu,

ge vakalongo e huriki i uka ma ria a Iuda, na dala ga korimule ria vona.

19 I uka ma ge hehe a viri, i uka ma ge tahate.

A lohona i uka ma ni gi longo na kuru tanga.

20 A tabuka i maroro, i popote ge maputu, i uka ma ge raputua.

A lam i keru ni para, i poko kunana, i uka ma ge tutu matea.

Bara i leho i vano i harena na tahuna e huriki ri matakilaka vona a dala ge korimule e huriki vona.

21 E huriki lobo na malala bara ri pasimata vona, ge korimule ria.”

### E Satan

(Markus 3:20-30; Lukas 11:14-23; 12:10)

22 Muri ni tuli valai vona a bakovi tara i dili vona a hanitu, i kepa, i ngavarubu. Lakea e Isu i vakamahuria, i ta, i mata para. 23 E huriki ri masia, ri turutu, ri vanana maea, “Ra bakovi iea, a viri si davea, a hamone Davit?”

24<sup>m</sup> Pali na tahuna e huriki a Pariseo ri longo a ngavane huriki, ri ta maea, “Ra bakovi iea, i lili tala a hanitu na nitora ne Belsabub, a hariki ne huriki a hanitu.”<sup>n</sup>

25 E Isu i lohoka na niluhoi ne ria, lakea i ta maea, “E huriki na harikianga tara, ri vaubi mule ne ria, bara ri vapida, i lobo tavula a harikianga iea. E rei a tanga, o e rei a kabu ri vaubi mule, bara ri vapida, i lobo tavula a tanga, o a kabu iea. 26 I mavonga kunana, e Satan bara i lili tala mule ia, a harikianga vona bara i lobo tavula. 27 Mu taki iau ta a lili tala a hanitu na nitora ne Belsabub. Pali e huriki a murimuri ne mua, a ni tora ne e rei ri lili tala a hanitu? Ngane e huriki a murimuri ne mua bara ri vakasiri mua mu varoru. 28<sup>o</sup> Pali iau a lili tala e huriki a hanitu na nitora na Hanuna Vure. I vakasiri manga a harikianga na Vure i bele pali ne mua.

<sup>j</sup> 12:16 Mat 8:4; Mrk 3:12    <sup>k</sup> 12:18-21 Ais 42:1-4    <sup>l</sup> 12:18 Mat 3:17    <sup>m</sup> 12:24 Mat 9:34; 10:25    <sup>n</sup> 12:24 E Belsabub, a rana tara e Satan.    <sup>o</sup> 12:28 Apo 10:38; 11on 3:8

<sup>29</sup>“E rei ge dili tavula na roho na bakovi hateka, ge panaho a mahala vona? Bara i kolo tata taroa a bakovi hateka, muri bara i panaho na ningaru vona. <sup>30</sup><sup>p</sup>A viri i uka ma i leho turagu, i ratapilea a leho nau. A viri i uka ma i leho turagu ni tuli e huriki ri gi valai na Vure, i lili e huriki i uka ma ri gi valai na Vure. <sup>31</sup><sup>q</sup>A taki mua, a Vure bara i puga vuroki a naro hale na viri i rata virihia e turana, a naro hale na viri i ta hale na Vure. Pali a viri i ta hale na Hanu Kiripiripi, a Vure i uka ma ge puga a naro hale vona. <sup>32</sup>E rei a viri i ta hale na Tuna Bakovi, a Vure bara i puga vuroki a naro hale vona. Pali e rei a viri i ta hale na Hanu Kiripiripi, a Vure i uka ma ge puga vuroki a naro hale vona ngane, i uka ma ge puga vuroki muri ma.

### A Kai Hale, a Kai Kamumu

*(Lukas 6:43-45)*

<sup>33</sup><sup>r</sup> “A kai kamumu, a kanena i kamumu. A kai hale, a kanena i hale. A kai si matakilalea na kanena kunana. <sup>34</sup><sup>s</sup>Mua e huriki a tuna mata. A narone mua i hale, lakea a ngavane mua, ria ranga ri hale. A ngava si taki i valai pololilo na hatene hita. <sup>35</sup>A bakovi kamumu i taki a ngava kamumu, a vuhuna a hatena i kamumu. A bakovi hale i taki a ngava hale, a vuhuna a hatena i hale. <sup>36</sup>A taki mua, na parava a Vure ge pelekado e huriki vona, bara i nana e huriki a bakovi a ngatavine na ngava hale lobo ri rata, lakea bara ri koli. <sup>37</sup>A ngavamu ge kamumu, a Vure bara i taki ioe a bakovi malamala. A ngavamu ge hale, a Vure bara i taki ioe a bakovi hale.”

### A Kilakila ne Iona

*(Markus 8:11-12; Lukas 11:29-32)*

<sup>38</sup><sup>t</sup>Muri e huriki a Pariseo, a mari na vinara na lotu ri nanea, “Mari ni tovo, mi ngaru ni masia a nivakasiri ge ratea.”

<sup>39</sup><sup>u</sup>Pali e Isu i koli, “E huriki na tahuna mona, ri hale hateka, ri ha taroa a Vure i manga a ngatavine i ha taroa e kakaina, i mole lae. Ri ngaru ni matai a nivakasiri! Pali i uka ma mu gu masia tara nivakasiri. A nivakasiri i taku kunana bara mu masia, a ni vakasiri ne Iona a propet. <sup>40</sup><sup>v</sup>E Iona i made pololilo na kavutuna manu dagi na parava i tolu, a rodo i tolu. I mavonga kunana, a Tuna Bakovi bara i tabuli pololilo na bobona malala na parava i tolu, a rodo i tolu. <sup>41</sup><sup>w</sup>Hosi e huriki a bakovi a ngatavine o Ninive ri longoa a vinara ne Iona, ri pulo a vilone ria. Pali iau a dagi hateka ne Iona, a vara mua, pali i uka ma mu pulo a vilone

---

<sup>p</sup> 12:30 Mrk 9:40; Luk 9:50    <sup>q</sup> 12:31 Hib 6:4-6    <sup>r</sup> 12:33 Mat 7:16-20    <sup>s</sup> 12:34 Mat 3:7; 15:18; Luk 3:7; 6:45    <sup>t</sup> 12:38 Mat 16:1; Luk 11:16; Ion 6:30    <sup>u</sup> 12:39 Mat 16:4; Mrk 8:12  
<sup>v</sup> 12:40 Iona 1:17    <sup>w</sup> 12:41 Iona 3:5

mua. I mavonga, muri ma na tahuna a Vure ge pelekado e huriki, e huriki a Ninive bara ri pesi rike, ri taki mua mu velu pali. <sup>42</sup>xHosi a hariki ngatavine o Siba i havai valai ge longo a niluhoi kamumu ne Solomon. Iau a dagi hateka ne Solomon, pali mua i uka ma mu longototo a niluhoi kamumu nau. Lakea muri ma na tahuna a Vure ge pelekado e huriki, a hariki ngatavine iea bara i pesi rike, i taki mua mu velu pali.

### A Hanitu i Hamule Valai

(Lukas 11:24-26)

<sup>43</sup>“Na tahuna a hanitu i pagitala na bakovi, bara i lakea na tabeke i ngeki, i matakana a tabeke ge malo vona. Pali na tahuna i uka ma i matavisia a tabeke tara ge malo vona, <sup>44</sup>bara i ta maea, ‘Ga hamule lakea na ruma a pea.’ Na tahuna i bele, i masia a ruma ni kovo tala, ni rata kamumu. <sup>45</sup>yMuri i vano i tuli valai a hanitu ala polorua ri hale hateka, lakea ri dili, ri made vona. Muga, a nimadena bakovi i hale. Pali ngane a nimadena i hale liu. Bara i bele mavonga ne mua e huriki a bakovi hale.”

### E Rei e Kinane Isu e Turane Isu?

(Markus 3:31-35; Lukas 8:19-21)

<sup>46</sup>E Isu i tabana ni ta turane huriki, e kinana e tarina mai ri pesi polovavo, ri ngaru ni ta turana. <sup>47</sup>Lakea a viri tara i vakalongoa, “E kinamu e tarimu mai ri pesi polovavo, ri ngaru ni ta turamu.”

<sup>48</sup>E Isu i koli, “E rei e nana, e rei e tarigu mai?” <sup>49</sup>I vakasiri lakea ne huriki a murimuri vona, i ta maea, “E huriki nga e nana e tarigu mai. <sup>50</sup>zA viri i muri mai a ningaru ne Tata na hunu, ia e turagu, e kurabagu, e nana.”

### A Nita Vakakika na Viri i Varo a Vit

(Markus 4:1-9; Lukas 8:4-8)

**13** <sup>1</sup>Na parava iea kunana e Isu i pagitala na ruma, i vano i made na dahana darilomu. <sup>2</sup>aE huriki ala kupo hateka ri valai, ri pesi haluia, lakea i rike na aga, i pasi polovavo popote. Pali e huriki lobo ri made na lavu. <sup>3</sup>Muri e Isu i taki ria na nita vakakika i kupo. I ta maea, “A bakovi ni leho na hania i varo a vutuna vit. <sup>4</sup>Na tahuna i voro lae a vutuna vit, a vutuna ranga ri boru puru na dala, lakea a maka kadirovo ri kani poi.

<sup>5</sup>“A vutuna vit ranga ri boru langa na tabeke i kedokedo, na tabeke i uka ma i tahoka hateka a malala. Ri koru malaviriri, a vuhuna a malala i tabuli polomeli kunana. <sup>6</sup>Pali na tahuna a haro i rike, i hu ria, ri malai, a vuhuna i uka ma i puru hateka a kana ria.

x 12:42 1Ki 10:1-10 y 12:45 2Pe 2:20 z 12:50 Rom 8:29 a 13:2 Luk 5:1-3

<sup>7</sup>“A vutuna vit ranga ri boru na tabeke i vona a barakau. A vit i vua, pali a barakau i kae lobi ria.

<sup>8</sup>“Pali a vutuna vit ranga ri boru langa na malala kamumu, ri lua, ri vakabele a kanene ria i 100 ranga, i 60 ranga, i 30 ranga. <sup>9</sup>E rei a viri i ngaru ni longokilalea a ngavagu, ge longo kamumu, ge luhoi kado.”

### I Navai e Isu i Ta Vakakika Kunana?

*(Markus 4:10-12; Lukas 8:9-10)*

<sup>10</sup>Muri e huriki a murimuri ri valai vona, ri nanea, “I navai o ta vakakika kunana ne huriki?”

<sup>11</sup>E Isu i koli, i ta maea, “A Vure i habi a lohokanga ne mua, mu gu lohoka vona a maki kapiloho na harikianga na Vure. Pali i uka ma i habi a lohokanga ne ria. <sup>12</sup><sup>b</sup>E rei a viri i tahoka a maki pali, bara ni habi tabu ranga ge tahoka ge kupo. Pali e rei a viri i uka ma i tahoka a maki, bara ni bole vuroki vona a maki popote i tahoka. <sup>13</sup>A ta vakakika ne ria a vuhuna, ‘Ri matai, pali i uka ma ri matakilala. Ri longo, pali i uka ma ri longokilala.’

<sup>14</sup><sup>c</sup> “Re huriki nga, ri ratea i bele muholi a nitane Isaia a propet i maea, ‘Bara mu longo balaka kupo, pali i uka ma mu gu longokilala. Bara mu matai balaka kupo, pali i uka ma mu matakilala.

<sup>15</sup>Ri putungingi. Ri siki kari a talingane ria. Ri mata kopu. Bara i uka, bara ri matakilala a maki ri matai, ri longokilala a ngava ri longo, bara i padi a hatene ria, ri pulo a vilone ria, lakea iau bara vakamahuri ria.’

<sup>16</sup><sup>d</sup>Pali a Vure i rata kamumu mua, mu matakilala a maki a rata, mu longokilala a ngavagu. <sup>17</sup>A taki muholi mua, e huriki a propet, a bakovi malamala hosi ri ngaru hateka ni matai a maki mu matai ngane, pali i uka ma ri matai. Ri ngaru ni longo a maki mu longo ngane, pali i uka ma ri longo.

### A Pelegona Viri i Varo a Vit

*(Markus 4:13-20; Lukas 8:11-15)*

<sup>18</sup>“Ngane mu longo ga tuvevea a pelegona nivakakika na viri i varo a vutuna vit. <sup>19</sup>A vutuna vit i boru na dala i manga e huriki ri longoa a ngava na harikianga, pali i uka ma ri longokilalea. E Satan i valai, i bole vuroki a ngava ni ru na hatene ria.

<sup>20</sup>“A vutuna vit i boru langa na hini kedokedo i manga a bakovi i longo a ngava, lakea i luhoi tora malaviriri kunanea, i vivi vona. <sup>21</sup>Pali i uka ma i pesi tora tabaka, a vuhuna i uka kana. Na tahuna a maregoa i bele,

<sup>b</sup> 13:12 Mat 25:29; Mrk 4:25; Luk 8:18; 19:26    <sup>c</sup> 13:14-15 Ais 6:9-10; Ion 12:40; Apo 28:26-27    <sup>d</sup> 13:16-17 Luk 10:23-24

o na tahuna e huriki ri vakamadihi vakaroroa a vuhuna i ramai a nitagu, i malaviriri kunana i pea.

<sup>22</sup> e “A vutuna vit i boru langa na barakau i manga a bakovi i longoa a ngava, pali i luhoi hateka a nimadena. A ningaru dagi vona ni bole a mahala i kupo i tamia. A niluhoi nga ru kavitagua a ngava muholi, i uka ma i vakabele a kanena.

<sup>23</sup> “Pali a vutuna vit i boru na malala kamumu i manga a bakovi i longoa a ngava, i longokilalea. I vakabele a kanena vit i kupo hateka na vit ni varo muga. I ranga ri vakabele i ravulu tolu (30). I ranga ri vakabele i ravulu polotara (60). I ranga ri vakabele i ravulu mule ma a murina balaka taku (100).”

### A Nivakakika na Kukuni

<sup>24</sup> E Isu i taki tabua tara nita vakakika, “A harikianga na hunu i manga a bakovi i varo a vutuna vit na hania. <sup>25</sup> Na rodo, na tahuna e huriki ri mahita, i valai a pile vona, i varo dili turana vit a kukuni. Muri i vano ia. <sup>26</sup> A vit i kuru rike, i pura. A kukuni ranga ri rike.

<sup>27</sup> “Muri e huriki a voravora na bakovi iea ri valai, ri takia, ‘Bakovi dagi, mi luhoi ta o varo kunana a vit na hania. Pali ri valai vai a kukuni nga?’

<sup>28</sup> “Lakea a tahona hania i ta maea, ‘I varo a pile nau.’ Lakea e huriki a voravora ri takia, ‘Pali mi gi vano mi gi pasi vuroki.’

<sup>29</sup> “Pali i koli, i ta maea, ‘I uka. Na tahuna mu pasi vuroki a kukuni, bara mu pasi ruru turana vit. <sup>30</sup> Mu dava. Muri ma na tahuna e huriki ri gi mirio, bara taki ria ri gi pasi vuroki muga a kukuni, ri gi kolo palupu, ri gi rungani. Muri bara ri mirio a vit, ri bole lakea na roho na vit.’ ”

### A Nivakakika na Vutuna Mastad (Markus 4:30-32; Lukas 13:18-19)

<sup>31</sup> E Isu i taki tabua tara nivakakika, i ta maea “A harikianga na hunu i manga a vutuna mastad, ni varo na hania. <sup>32</sup> A vutuna mastad i kaka kiroko liu na maki lobo ni varo na hania. Pali na tahuna i kuru rike i langui a maki lobo ni varo na hania. I manga tabu a kai. A maka kadirovo ri hae a nune ria na rahana.”

### A Nivakakika na Is (Lukas 13:20-21)

<sup>33</sup> Muri e Isu i taki tabua tara nivakakika, i ta maea, “A harikianga na hunu i manga a is i bole a ngatavine i pulo turana kabukuna plaoa, muri i pugaga i dagi.”

---

<sup>e</sup> 13:22 Luk 12:16-21; 1Tim 6:9-10,17

**E Isu i Ta Vakakika Kunana**  
(Markus 4:33-34)

<sup>34</sup>E Isu i uka ma i ta kavakava ne huriki. I taki ria na nita vakakika kunana.  
<sup>35</sup><sup>f</sup>I rata mavonga ge bele muholi a nita hosi ne huriki a propet, i ta maea,  
“Na tahuna a ta turane ria, ga ta vakakika.  
Ga vakalongo ria na ngava ni ruhulolo hosi na nidoko na malala.”

**A Pelegona Nivakakika**

<sup>36</sup>Muri e Isu i pe e huriki, i dili na ruma. E huriki a murimuri vona ri valai vona ri takia, “O tuveve poloa ne mia a nivakakika na kukuni na hania.”  
<sup>37</sup>Lakea e Isu i koli, i ta maea, “A Tuna Bakovi a viri i varo a vutuna vit. <sup>38</sup>A hania i manga a tanga lobo na malala. A vutuna vit i manga e huriki a bakovi a ngatavine a Vure i matakari ria. A kukuni i manga e huriki a bakovi a ngatavine e Satan i matakari ria. <sup>39</sup>A pile, ra i varo a kukuni, i manga e Satan. A parava na nimirio i manga a nilobona parava. E huriki ri mirio ri manga e huriki a agelo.  
<sup>40</sup><sup>g</sup>A kukuni ni pasi vuroki, ni rungani, bara ni rata mavonga e huriki a bakovi hale na nilobona parava. <sup>41</sup><sup>h</sup>A Tuna Bakovi bara i rudu e huriki a agelo vona ri kope tala na harikianga vona e huriki a bakovi ri longotaro a vinara nau, a maki lobo i rata e huriki ri rata a naro hale. <sup>42</sup><sup>i</sup>Bara ri voro rike ria na kanono dagi, lakea bara ri tangi, i madihi a hatene ria, ri karatata mavonga a ngine ria. <sup>43</sup><sup>j</sup>E huriki a bakovi malamala bara ri para manga a haro pololilo na harikianga ne Tamane ria. E rei a viri i ngaru ni longokilalea a ngavagu, ge longo kamumu, ge luhoi kado.

**A Nivakakika na Mahala Ni Ruhulolo**

<sup>44</sup>“A harikianga na hunu i manga a tava ni tanu na malala. A bakovi tara i keli a malala, i matavisia a tava. Muri i ru mule tabua. I vivi hateka, lakea i vano i habi a maki lobo vona ni gi kona. I bole a moni, i konea a tabekena malala iea, ge ne vona a tava ni tanu vonga.

**A Nivakakika na Mahala**

<sup>45</sup>“A harikianga na hunu i manga a bakovi tara i matakana a mahala kamumu. <sup>46</sup>Na tahuna i matavisia a viri kamumu hateka, i vano i habi a maki lobo vona ni gi kona, muri i konea a mahala.

**A Nivakakika na Vuko**

<sup>47</sup>“A harikianga na hunu i manga a vuko ni ru na darilomu, i koro vona a manu legelege. <sup>48</sup>Na tahuna a vuko i vonu, e huriki a tahodari ri valai,

<sup>f</sup> 13:35 Sng 78:2    <sup>g</sup> 13:40 Ion 15:6    <sup>h</sup> 13:41 Mat 24:31; 25:31; Mrk 13:27

<sup>i</sup> 13:42 Mat 8:12    <sup>j</sup> 13:43 Dan 12:3



ri lalu rikea na lavu. Muri ri made puru ri tahoni dili na kulopi a manu kamumu, ri vuroki a manu hale. <sup>49</sup>Na nilobona parava bara i mavonga kunana. E huriki a agelo ri gi valai, ri gi kalipida e huriki a bakovi malamala, e huriki a bakovi hale. <sup>50</sup><sup>k</sup>Bara ri voro rike na kanono dagi e huriki a bakovi hale, lakea bara ri tangi, i madihi a hatene ria, ri karatata mavonga a ngine ria.”

### A Ngava Hosi, a Ngava Karaba

<sup>51</sup>Lakea e Isu i nana ria, “Ra ngava a taki. Mu longokilala o i uka?”  
Ri ta maea ria, “Mi longokilala.”

<sup>52</sup>Lakea e Isu i taki ria i ta maea, “I mavonga, e huriki a mari na vinara na lotu ri tovo vona a harikianga na hunu, ri manga a tahona ruma i bole tala na tava vona a mahala karaba, a mahala hosi.”

### A Propet i Uka Ma Ni Togo (Markus 6:1-6; Lukas 4:16-30)

<sup>53</sup>Na tahuna i taki lobo a nita vakakika nga, i laho lokovonga. <sup>54</sup><sup>l</sup>I bele na tanga vona, i dili na roho na vaponga, i vakatubu ni vara e huriki. E huriki vonga ri turutu vona, ri vanana, “Ra bakovi iea, i bolea vai a lohokanga? I bole vai a nitora ni rata a nivakasiri? <sup>55</sup><sup>m</sup>Si lohoka vona a koma iea. E tamana a bakovi ni hae a ruma kunana. E kinana e Maria. E huriki e tarina mai e Iakop, e Iosep, e Simon, e Iuda. <sup>56</sup>E huriki e kurabana, ria ranga ri made koea turane hita. Pali i bole vai a lohokanga, a nitora nga?” <sup>57</sup><sup>n</sup>Lakea ri marikoi vona. Muri e Isu i taki ria, “A propet ni togo na tanga lobo. Pali e huriki a bakovi a ngatavine na tanga vona i uka ma ri togoa.”

<sup>58</sup>Lakea i uka ma i rata a nivakasiri i kupo vonga, a vuhuna i uka ma ri luhoi torea.

### E Ioanes a Mari ni Vahilolo i Mate (Markus 6:14-29; Lukas 3:19-20; 9:7-9)

**14** <sup>1</sup>Na tahuna iea a hariki e Herod<sup>o</sup> i longo a velengane Isu, <sup>2</sup>lakea i taki e huriki a vora vona i ta maea, “Ra bakovi iea, e Ioanes a mari ni vahilolo, i pesi rike mule na matenga! I mavonga i tahoka a nitora ni rata a nivakasiri.”

<sup>3-5</sup><sup>p</sup> I ta mavonga, a vuhuna i rabalakia hosi e Ioanes. A nimatene Ioanes i bele maea: e Ioanes i tahatea e Herod na hini i parangi tabu e Herodias, e girihine tukana, e Pilip. I takia, i ta maea, “A vinara i ta

<sup>k</sup> 13:50 Mat 13:42; Luk 13:28    <sup>l</sup> 13:54 Ion 7:15    <sup>m</sup> 13:55 Ion 6:42    <sup>n</sup> 13:57 Ion 4:44  
<sup>o</sup> 14:1 A rana hariki iea, e Herod Antipas, e tune Herod, ra hariki hosi i toni ni rabalakia e Isu na tahuna e Isu ia a koma kiroko (Mateo 2:16-18).    <sup>p</sup> 14:3-5 Mat 21:26

pupukari vona go parangi vona e girihine turamu.” I mavonga, e Herod i ngaru ni rabalakia e Ioanes, pali i mangenge e huriki, a vuhuna ri luhoia e Ioanes a propet. Lakea i rudu vakuku e huriki a nugumaheto, ri lakavu kunanea e Ioanes, ri kolo tatea, ri ru dilia na bavi.

<sup>6</sup>Na parava e Herod ni poda vona, i ratea a habu dagi. E tune Herodias a ngatavine i raulo. Na tahuna e Herod i masia, i vivi hateka, <sup>7</sup>lakea i kaba i ta muholi vona ge habia vona a ra maki i ngarua. <sup>8</sup>E kinana koma i voro dili a ngava vona, ge ta maea, “A ngaru go rabalakia e Ioanes a mari ni vahilolo, o ru na sika a mapana, o habia nau.” <sup>9</sup>Na tahuna a hariki i longoa, i dodo. Pali i vakuku ni gi rabalaki e Ioanes, ri gi bole vilia a gina, a vuhuna i kaba pali na matane huriki ri valai na habu. <sup>10</sup>Lakea ri palakudua a lohona Ioanes pololilo na bavi. <sup>11</sup>Ri rua na sika a gina, ri bole lakea na sirula. A sirula i bolea, i habia ne kinana. <sup>12</sup>Muri e huriki a murimuri ne Ioanes ri bolea a podana, ri tanua. Muri ri vano ri vakalongoa e Isu.

### **E Isu i Vakani e Huriki**

*(Markus 6:31-44; Lukas 9:10-17; Ioanes 6:1-13)*

<sup>13</sup>Na tahuna e Isu i longoa a velengane Ioanes i mate, i malaga, i rike na aga ta ge lakea na tabeke i ngeki. Pali na tahuna e huriki ri longoa a hini i vano, ri malaga na tanga lobo, ri laho pololilo ri gi buloa. <sup>14</sup>Na tahuna e Isu i bele, i matai ria, i dodo ria, i vakamahuri e huriki ri giloa.

<sup>15</sup>I malunga liu ngane, lakea e huriki a murimuri vona ri takia, ri ta maea, “I malunga liu pali. A tabeke si made vona i ngeki. O rudu e huriki ri gi hamule lakea na tanga, ri gi kona a maki ni kani.”

<sup>16</sup>Pali e Isu i koli, i ta maea, “Nahea ri gi hamule. Mu vakani ria.”

<sup>17</sup>Ri koli, ri ta maea, “Mi tahoka kunana a bret i lima, a manu i rua.

<sup>18</sup>Lakea e Isu i ta maea, “Mu bole valai nau.” <sup>19</sup><sup>q</sup>Muri i taki e huriki ri gi made puru na varili. I bole a bret i lima, a manu i rua, i mata rike na hunu i kavurikea a Vure. Muri i kevea a bret, i habi ne huriki a murimuri vona ri veru ne huriki. <sup>20</sup>E huriki lobo ri kani, ri maru. Muri e huriki a murimuri vona ri tahoni dili na kulopi i ravulu a polona i rua a kalavana maki ni kani ri kani kaleva. <sup>21</sup>E huriki a bakovi ri kani ri ala rangale lima (5,000). Pali e huriki a ngatavine, a koma i uka ma ni gi.

### **E Isu i Laho Langa na Dari**

*(Markus 6:45-52; Ioanes 6:16-21)*

<sup>22</sup>Muri e Isu i rudu e huriki a murimuri vona ri gi rike na aga, ri gi muga lakea na tabeke tara na darilomu. Pali i made mule ia, ge ru polo kamumu e huriki. <sup>23</sup><sup>r</sup>E huriki lobo ri vano pali, lakea i sike kikeri na lolo

---

<sup>q</sup> 14:19 Mat 15:35-39; Mrk 8:6-10    <sup>r</sup> 14:23 Luk 6:12; 9:28

i vasileki. I rodo ngane a hini, i tabana ni made kikeri vonga. <sup>24</sup>Pali e huriki a murimuri ri rike pali na aga, ri pasi tala basi pali. A vilu i pori valai muga, ru vahori a aga.

<sup>25</sup>Na malabeonga ngane, e Isu i laho langa na dari, i laho pori mai ria.

<sup>26</sup>Na tahuna e huriki a murimuri ri masia i laho langa na darilomu ri mangenge, ri haloho, a vuhuna ri pahadakia ta a hanitu.

<sup>27</sup>Pali e Isu i malaviriri kunana i taki ria, “Naha ni mangenge, mu tuhaka! Iau kunana.”

<sup>28</sup>Lakea e Petrus i ta maea, “Bakovi Dagi, ge ioe muholi, o taki iau ga laho langa na dari, ga laho lakene mai ioe.”

<sup>29</sup>Lakea e Isu i koli, i ta maea, “O valai.”

E Petrus i page raga na aga, i laho langa na dari, i lakea mai e Isu.

<sup>30</sup>Pali na tahuna i masia a vilu i pori hateka, i mangenge, i vakatubu ni pasiri. Lakea i gale tala, i ta maea, “Bakovi Dagi, o korimule iau!”

<sup>31</sup>‘Lakea e Isu i malaviriri kunana i nugua, i takia, “A niluhoi vomu i kiroko hateka. I navai o lohorua?”

<sup>32</sup>Na tahuna ru rike na aga, i pasi puru a vilu. <sup>33</sup>Lakea e huriki ri made na aga ri kavurikea, ri ta maea, “Muholi hateka, ioe a Tuna Vure.”

### E Isu i Vakamahuri e Huriki o Genesaret

*(Markus 6:53-56)*

<sup>34</sup>Ri polo kudua a darilomu, ri bele o Genesaret. <sup>35</sup>E huriki a bakovi vonga ri matakilalea e Isu, lakea ri vakaru a ngava ne huriki na tabeke iea, ri bole valai ne Isu e huriki ri giloa. <sup>36</sup>“Ri nana tora ia ri gi padoi kunanea a harena varakia vona. E huriki lobo ri padoia, ri tavaga.

### A Vinara ne Huriki a Gare Hosi

*(Markus 7:1-13)*

**15** <sup>1</sup>Na parava tara e huriki a Pariseo, a mari na vinara na lotu ri pea e Ierusalem ri valai ri gi masia e Isu. Ri nanea, <sup>2</sup>“E huriki a murimuri vomu, i navai ri longotaro a vilo ne huriki a gare hosi? I uka ma ri loi taro a limane ria muga ni kani!”

<sup>3</sup>E Isu i koli, i ta maea, “Pali mua, i navai mu longotaro a vinara na Vure mu gu muri mai a vilo hosi? <sup>4</sup>‘A Vure i vakuku maea, ‘Mu togo e kinane mua e tamane mua.’ I ta maea tabu, ‘E rei a viri i harogi e tamana e kinana, ni gi rabalaki.’

<sup>5</sup>“Pali mua mu taki ta a viri ge takia e tamana e kinana, ge ta maea, ‘A kinori ta ga habi marua vona, a habi pali na Vure.’ Mu takia i kamumu nahea ge togo e tamana e kinana.’ <sup>6</sup>Na naro iea, mu longotaroa

<sup>s</sup> 14:26 Luk 24:37    <sup>t</sup> 14:31 Mat 8:26; Mrk 4:39    <sup>u</sup> 14:36 Mat 9:20-21    <sup>v</sup> 15:4 Nim 20:12; 21:17; Vin 5:16

a nitana Vure, mu gu ramai kunana a narone mua. <sup>7</sup>Mua e huriki a tabele rua! E Isaia i ta muholi na tahuna i taki virihi mua na nita propet i ta maea,

<sup>8</sup> w “ ‘Re huriki nga, ri taki ta ri togo iau,  
pali i uka ma ri ngaru muholi iau.

<sup>9</sup> Ri kavurike tavula iau;  
ri tovo e huriki na vinara tavula na bakovi, ri takia ta a vinara na Vure.’ ”

### A Naro Hale i Bele na Hatena Viri

*(Markus 7:14-23)*

<sup>10</sup>Muri e Isu i gale valai e huriki, i ta maea, “Mu talangaki valai, mu longokilalea a nitagu. <sup>11</sup>xA maki i dili na ngavana bakovi i uka ma i ratea ge katoki na matana Vure. A maki i ratea i katoki na matana Vure, a maki i pagitala na ngavana.”

<sup>12</sup>Muri e huriki a murimuri vona ri vakalongoa, ri ta maea, “E huriki a Pariseo ri longoa a nitamu, i madihi a hatene ria vona.”

<sup>13</sup>Pali e Isu i koli mule, i ta maea, “A maki lobo e Tata na Hunu i uka ma i varo, bara ni lipu tala. <sup>14</sup>yNaha ria. Ri ngaru ni vakasiri a dala ne huriki, pali ri manga a kepa. Pali a kepa, bara i toni ni tulia a kepa, rua varago bara ru boru puru na lovo.”

<sup>15</sup>Muri e Petrus i ta maea, “O tuveve poloa ne mia a pelegona nivakakika.”

<sup>16</sup>Lakea e Isu i taki ria, “Ra mua, i uka ma mu longokilala ma a nitagu? <sup>17</sup>I kavakava. A maki i dili na ngavamu bara i puru na kavutumu, muri i pagitala na kakaimu. <sup>18</sup>Pali a ngava i pagitala na ngavana viri i valai na hatena, i ratea i katoki. <sup>19</sup>A maki hale nga ri pagitala na hatena bakovi: a niluhoi hale, a naroi ni rabalaki a viri, a molenga, a panahoa, a marapusianga, a nipadimomo. <sup>20</sup>A naroi nga ri rata a bakovi i katoki na matana Vure. Pali a viri i uka ma i loi a limana muga ni kani, i uka ma i ratea ge katoki.”

### A Ngatavine o Kenan

*(Markus 7:24-30)*

<sup>21</sup>Muri e Isu i pea a tanga iea, i lakea na tabeke ne Tair, e Sidon. <sup>22</sup>A ngatavine o Kenan tara i made vonga. I valai ne Isu, i ta dagi, i ta maea, “Bakovi Dagi, hamone Davit, o dodo iau! E tugu a ngatavine i dili vona a hanitu, i ratapilea.”

<sup>23</sup>Pali e Isu i uka ma i taratotoa. Muri e huriki a murimuri vona ri taki torea, ri ta maea, “O tonoa a ngatavine iea ge vano. I gale vilihui ne teu.”

---

w 15:8-9 Ais 29:13   x 15:11 Mat 12:34   y 15:14 Luk 6:39; Rom 2:19

<sup>24</sup> Pali e Isu i koli, i ta maea, “A Vure i rudu valai iau ga kori kunana a kabu ne Israel, ri manga a maka sipsip ri velu.”

<sup>25</sup> Pali a ngatavine i turume puru na ngalana, i ta maea, “Bakovi Dagi o tuhori iau!”

<sup>26</sup> E Isu i koli, i ta maea, “I uka ma i kamumu ni gi bole a maki ni kani ne huriki a koma, ni gi voro lakea na ligo.”

<sup>27</sup> A ngatavine i koli, i ta maea, “Bakovi Dagi, o ta muholi. Pali a ligo ranga ri kani poi a momona maki ni kani.”

<sup>28</sup> Lakea e Isu i koli, i ta maea, “Ngatavine, o luhoi tora hateka iau! Ge bele manga a hini o ngarua ge bele.” I mavonga, e tuna ngatavine i tavaga malaviriri kunana.

### E Isu i Vakamahuri e Huriki

<sup>29</sup> Muri e Isu i malaga vonga, i laho na dahana Darilomu e Galili. Muri i sike na dahana lolo, i made puru. <sup>30</sup> E huriki ala kupo ri valai vona, ri tuli valai vona e huriki a vaha hale, e huriki a kepa, e huriki a beu, e huriki a ngavarubu, turana e huriki ranga. Ri taparaki ria na ngalane Isu. Lakea i vakamahuri ria lobo. <sup>31</sup> E huriki lobo ri turutu na tahuna ri matai e huriki a ngavarubu ri ta, e huriki a beu ri tavaga, e huriki a vaha hale ri laho tabu, e huriki a kepa ri matapara. Lakea ria lobo ri kavurikea a Vure ne Israel.

### E Isu i Vakani Tabu e Huriki

*(Markus 8:1-10)*

<sup>32</sup> Muri e Isu i gale palupu e huriki a murimuri vona, i ta maea, “Tau a dodo e huriki nga. Ri made turagu na parava i tolu pali. I uka ma ri kani. Pali ngane a koi ni rudu hamule ria, ma ge vurea a matane ria na dala, a vuhuna ri vitolo.”

<sup>33</sup> E huriki a murimuri ri koli, ri ta maea, “Pali si gi bole vai a bret koea na tabeke i ngeki, ge kara e huriki nga? Ri ala kupo hateka.”

<sup>34</sup> Lakea e Isu i nana ria, “I riva bret mu tahoka?”

Ri koli, ri ta maea, “Mi tahoka a bret i polorua, a manu kiroko ranga.”

<sup>35</sup> Lakea i taki e huriki ri gi made puru na malala. <sup>36</sup> Muri i bole a bret i polorua, a manu kiroko ranga, i kavurikea a Vure. I keve, i habi ne huriki a murimuri ri gi veru ne huriki. <sup>37</sup> E huriki lobo ri kani, ri maru. Muri ri tahoni na kulopi i polorua a kalavana maki ni kani. <sup>38</sup> E huriki a bakovi ri kani ri ala rangale va (4,000). A ngatavine, a koma i uka ma ni gi. <sup>39</sup> Muri e Isu i rudu e huriki ri gi hamule lakea na tanga ne ria. I rike na aga ia, i lakea na tabeke ne Magadan.

<sup>z</sup> 15:24 Mat 10:6    <sup>a</sup> 15:31 Mrk 7:37    <sup>b</sup> 15:32 Mat 14:14

### E Huriki a Pariseo

(Markus 8:11-13; Lukas 12:54-56)

**16** <sup>1</sup>Na parava tara e huriki a Pariseo a Sadusi ri valai ri gi tonia e Isu. Ri takia ge ratea tara nivakasiri, ri gi matakilaka vona i valai na Vure.

<sup>2</sup>Pali i koli, i ta maea, “Na malunga, na tahuna mu masia a hunu i vururu, mu lohoka vona bara i kara kuduvi a haro. <sup>3</sup>Pali na hatelanga, na tahuna a hunu i vururu, i hupi, mu lohoka vona bara i boru a vala. Mu matakilalea a hini, ge boru a vala, o ge kara a haro. Pali a maka maki iau a rata, i uka ma mu matakilala. <sup>4</sup>E huriki na tahuna mona, ri hale hateka, ri ha taroa a Vure i manga a ngatavine i ha taroa e kakaina, i mole lae. Ri ngaru ni matai a nivakasiri! Pali i uka ma ri gi masia tara nivakasiri. A nivakasiri i taku kunana bara ri masia, a nivakasiri ne Iona a propet.” Muri e Isu i pe ria i vano.

### A Is ne Huriki a Pariseo

(Markus 8:14-21)

<sup>5</sup>Na tahuna ri page poloa pali a darilomu, e huriki a murimuri ri longo kaburungi ni bole a bret. <sup>6</sup>E Isu i taki ria, i ta maea, “Mu matadoko vona a is ne huriki a Pariseo, a is ne huriki a Sadusi.”

<sup>7</sup>Lakea ri vakatubu ni vata, ri ta maea, “I ta maea a vuhuna i uka ma si bole valai a bret.”

<sup>8</sup>E Isu i lohoka vona a niluhoi ne ria, lakea i taki ria, i ta maea, “I uka ma mu luhoi tora hateka. I navai mu vata vona a bret i uka ma mu bole? <sup>9</sup>I uka ma mu matakilala iau ma. Mu luhoi mule a bret i lima a vakani e huriki ala rangale lima (5,000) vona. I riva a kulopi mu tahoni a kalavana maki ni kani vona? <sup>10</sup>Pali a bret i polorua a vakani e huriki ala rangale va (4,000) vona. I riva a kulopi mu tahoni a kalavana maki ni kani vona? <sup>11</sup>Pali i navai ngane mu pahaluhoi ta a taki a bret? Mu mata here vona a is ne huriki a Pariseo, a is ne huriki a Sadusi.” <sup>12</sup>Muri ri longokilalea a ngavane Isu, i uka ma i taki ria na is ni rata a bret vona. I taki ria ri gi mata here vona a nitovo ne huriki a Pariseo, a Sadusi.

### E Petrus i Taki Tala a Niluhoi Vona

(Markus 8:27-30; Lukas 9:18-21)

<sup>13</sup>Muri e Isu i luve na tabeke ne Sisaria Pilipi. I nana e huriki a murimuri vona, i ta maea, “E huriki ri luhoia a Tuna Bakovi ge ia e rei muholi?”

<sup>c</sup> 16:1 Mat 12:38; Luk 11:16    <sup>d</sup> 16:4 Mat 12:39; Luk 11:29    <sup>e</sup> 16:6 Luk 12:1

<sup>f</sup> 16:9 Mat 14:17-21    <sup>g</sup> 16:10 Mat 15:34-38

<sup>14</sup><sup>h</sup>Ri koli ri ta maea, “E huriki ranga ri taki ioe ta ioe e Ioanes a mari ni vahilolo. E huriki ranga ri taki ioe ta ioe e Elaisa. Pali e huriki ranga ri taki ioe ta ioe e Ieremaia, o a propet hosi tara.”

<sup>15</sup>Lakea i nana ria, “Pali mua? Mu luhoi iau ge iau e rei muholi?”

<sup>16</sup><sup>i</sup>E Simon Petrus i koli, i ta maea, “Ioe e Kristo, a Tuna Vure Mahuri.”

<sup>17</sup><sup>j</sup>Lakea e Isu i takia, “Simon, tune Iona, a Vure i rata kamumu ioe. I uka tara bakovi ge vakasiria vomu. E Tata na hunu kunana a viri i vakasiria vomu. <sup>18</sup><sup>k</sup>A taki ioe, ioe e Petrus. <sup>l</sup>Ga vakapesi langa na kedo iea a tara nau. A nitara na matenga i uka ma ge ratapilea. <sup>19</sup><sup>m</sup>Ga habia vomu a nitala na harikianga na hunu. A ra maki o koloa koea na malala, a Vure tara bara i koloa meli na hunu. A ra maki o puga koea na malala, a Vure tara bara i puga meli na hunu.” <sup>20</sup>Muri i ta pupukari e huriki a murimuri, nahea ri gi vakalongoa tara viri ne ia e Kristo.

### E Isu i Taki Muga Ge Mate

*(Markus 8:31–9:1; Lukas 9:22–27)*

<sup>21</sup>Na parava iea e Isu i vakatubu ni vakalongo e huriki a murimuri vona, ne ia ge sike o Ierusalem, ge bole a nimadihi i kupo na limane huriki a gare na lotu, a prister dagi, a mari na vinara na lotu. Muri bara ri rabalakia. Pali muri na parava i tolu, bara i mahuri mule.

<sup>22</sup>Pali e Petrus i tuli lakea na gaga, i vakatubu ni tahatea, i ta maea, “Bakovi Dagi, i uka! A naro iea nahea ge bele vomu!”

<sup>23</sup>Pali e Isu i mata lakea ne Petrus, i takia, “Satan, o hamule mai a bitogu! Ioe o pesi karia a dalagu. I uka ma o luhoi a maki na Vure. O luhoi kunana a maki na bakovi.”

<sup>24</sup><sup>n</sup>Muri e Isu i taki e huriki a murimuri vona, i ta maea, “E rei a viri i ngaru ni muri nau, ge lohopile a ningaru vona, ge kalohoa a kai tavalavala vona, ge ramai iau. <sup>25</sup><sup>o</sup>E rei a viri i lavuni nau, ne vona ni korimule a kulina, bara i velu. Pali e rei a viri i mate a vuhuna i ramai iau, bara i bole a nimahuri vakaroro. <sup>26</sup><sup>p</sup>Ge a ra a viri ge tahoka a mahala lobo na malala, pali ge velu a hanuna? A mahala lobo nga, i uka ma ge korimulea. <sup>27</sup><sup>q</sup>A Tuna Bakovi bara i valai na bagetuanga ne Tamana turana e huriki a agelo vona, ge habi a mapa ne huriki takutaku, ge muri mai a narone ria. <sup>28</sup>A taki muholi mua, i ranga ne mua, ra mu pepesi koea, i uka ma mu gu mate ma, bara mu masia a Tuna Bakovi i luve na harikianga vona.”

<sup>h</sup> 16:14 Mat 14:1-2; Mrk 6:14-15; Luk 9:7-8    <sup>i</sup> 16:16 Ion 6:69    <sup>j</sup> 16:17 Gal 1:15-16

<sup>k</sup> 16:18 Ion 1:42; Epe 2:20    <sup>l</sup> 16:18 A pelegona Petrus, na nita Grik i manga “kedo”.

<sup>m</sup> 16:19 Mat 18:18; Ion 20:23    <sup>n</sup> 16:24 Mat 10:38; Luk 14:27    <sup>o</sup> 16:25 Mat 10:39;

Luk 17:33; Ion 12:25    <sup>p</sup> 16:26 Mat 4:8-9    <sup>q</sup> 16:27 Sng 62:12; Snd 24:12; Mat 25:31; Rom 2:6; Kap 22:12

### E Isu i Mareli

(Markus 9:2-13; Lukas 9:28-36)

**17** <sup>1</sup>Muri na parava i polotara e Isu i tuli kunana e Petrus, e Iakop, e Ioanes e tarine Iakop, to sike na lolo dagi. <sup>2</sup> Na tahuna to made meli, e Isu i mareli na matane tou. A matana i para manga a haro, a varakia vona i kea manga a nipara. <sup>3</sup> E Moses, e Elaisa ru bele vakaturutu, ru ta turane Isu.

<sup>4</sup> Lakea e Petrus i takia e Isu, i ta maea, “Bakovi Dagi, i kamumu hateka mete valai koea. Ioe bara o ngaru, ga hae a kape ge tolu. Ne vomu tara, ne Moses tara, ne Elaisa tara.”

<sup>5</sup> Na tahuna i tabana ni ta, a bubu pangapanga i kavitagou tou. A lohona viri i ta valai na bubu, i ta maea, “A Bakovi iea e Tugu, a hategu. A vivi hateka vona. Moto longo mai a nitana.”

<sup>6</sup> Na tahuna to longoa a ngava iea, to mangenge, to boru ngala barara puru to kavitagou a matane tou. <sup>7</sup> Pali e Isu i padoi tou i ta maea, “Moto pesi rike. Naha ni mangenge.” <sup>8</sup> Na tahuna to mata rike, i uka ma to masia tara viri. E Isu kunana i pepesi vonga.

<sup>9</sup> Na tahuna to laho raga na lolo, e Isu i vakuku tou, i ta maea, “Naha ni vakalongoa tara viri vona a maki moto matai, ge vano ge harena na tahuna a Tuna Bakovi ge pesi rike mule na matenga.”

<sup>10</sup> Lakea a murimuri nga to nanea, “I navai e huriki a mari na vinara ri takia e Elaisa ge valai muga?”

<sup>11</sup> E Isu i koli i ta maea, “I muholi, a vinara i takia e Elaisa ge valai muga, ge rata karaba a maki lobo. <sup>12</sup> A taki matou, e Elaisa i valai pali. Pali i uka ma ri matakilalea. Ri rata virihi ia vona a maki lobo ri ngaru ni ratana. I mavonga kunana, a Tuna Bakovi tara bara i bole a nimadihi na limane ria.” <sup>13</sup> Muri to longokilalea a ngava i takia, i taki virihia e Ioanes, a mari ni vahilolo.

### E Isu i Kori Mule a Riau

(Markus 9:14-29; Lukas 9:37-42)

<sup>14</sup> E huriki ala kupo ri davea e Isu. Na tahuna i luve, a bakovi tara i valai, i turume puru na ngalane Isu, <sup>15</sup> i ta maea, “Bakovi Dagi, o dodoa e tugu a bakovi! I bole a nimadihi dagi. Na parava vakaroro i turutu, i boru puru. I boru langa na kanono, i boru puru na naru. <sup>16</sup> A bole lakea ne huriki a murimuri vomu, pali ri keru ni koria.”

<sup>17</sup> E Isu i koli, i ta maea, “Na tahuna mona, i uka tara viri ge luhoi torea a Vure. A narone mua i hale hateka. Ge navai? Ga hatenono mavonga ni

<sup>1</sup> 17:2 2Pe 1:16-18   <sup>5</sup> 17:5 Vin 18:15; Sng 2:7; Ais 42:1; Mat 3:17; Mrk 1:11; Luk 3:22

<sup>1</sup> 17:10 Mal 4:5   <sup>u</sup> 17:12 Mat 11:14   <sup>v</sup> 17:13 Luk 1:17



dava mua, mu gu luhoi tora iau?” Muri i takia a bakovi iea, i ta maea, “O tuli vilia e tumu.” <sup>18</sup>Muri e Isu i tahatea a hanitu. I malaviriri kunana, a hanitu i ha tala vona, i tavaga liu.

<sup>19</sup>“Muri e huriki a murimuri ri valai kapiloho ne Isu ri nanea, “I navai mi keri ni lili talea a hanitu iea?”

<sup>20</sup>“I koli, i ta maea, “A vuhuna i uka ma mu luhoi tora hateka a Vure. A taki muholi mua, bara mu tahoka a niluhoi kiroko manga a vutuna mastad, bara mu takia a lolo iea ge vano ge pesi na hini ranga, bara i longototo. I uka tara maki mu gu keria.”

**E Isu i Taki Tabu Ge Mate**  
(*Markus 9:30-32; Lukas 9:43-45*)

<sup>21-22</sup>“Na tahuna e huriki a murimuri ri vapopo o Galili e Isu i taki ria, i ta maea, “A Tuna Bakovi i tabukoi bara ni habi na limane huriki a bakovi, <sup>23</sup>ri gi rabalakia. Muri na parava i tolu, bara i mahuri mule.” Na tahuna ri longoa a ngava iea, ri dodo hateka.

**A Takis na Roho na Vure**

<sup>24</sup>“Na tahuna ri bele o Kapernaum, e huriki a bakovi ni bole a 50 toea takis na roho na Vure ri valai ne Petrus, ri nanea, “Ra mari ni tovo ne mua, i kona kilala a takis na roho na Vure, o i uka?”

<sup>25</sup>E Petrus i koli, i ta maea, “I kona.” Muri e Petrus i lakea na ruma. E Isu i ta muga, i nanea, “Simon o luhoi navai? A hariki ge bole ne rei a takis? Ge bole ne huriki e tuna, o ne huriki ranga?”

<sup>26</sup>Lakea e Petrus i koli i ta maea, “E huriki ranga bara ri kona.” Lakea e Isu i takia, “I mavonga e huriki e tuna i uka ma ri kona a takis. <sup>27</sup>Pali nahea ri gi maruhu e huriki nga. O vano, o lalu a manu na darilomu. A manu o lalu mugea, o pidea a ngavana, o bole talea a kina ge taku. Muri o vano, o kona a takis ne tarua.

**E Rei i Dagi na Harikianga na Hunu?**  
(*Markus 9:33-37; Lukas 9:46-49*)

**18** <sup>1</sup>“Muri e huriki a murimuri ri valai ne Isu, ri nanea, “E rei ge dagi hateka na harikianga na hunu?”

<sup>2</sup>Lakea i gale valai vona tara koma kiroko, i vakapesia na kurukurune ria, <sup>3</sup><sup>bi</sup> ta maea, “A taki muholi mua, e rei a viri i koi ni pulo a vilona, ge bele manga a koma kiroko iea, i uka ma ge dili na harikianga na hunu. <sup>4</sup>E rei a viri i vakakiroko ia ge manga a koma kiroko iea, bara ia a viri dagi na harikianga na hunu. <sup>5</sup>E rei a viri i tagui a koma kiroko maea na ragu, i tagui iau. <sup>6</sup>Pali e rei a viri i ratea a koma

<sup>w</sup> 17:19 Mat 10:1    <sup>x</sup> 17:20 Mat 21:21; Mrk 11:23; Luk 17:6; 1Ko 13:2    <sup>y</sup> 17:21-22 Mat 16:21

<sup>z</sup> 17:24 Nim 30:13; 38:26    <sup>a</sup> 18:1 Luk 22:24    <sup>b</sup> 18:3 Mat 19:14; Mrk 10:15; Luk 18:17

<sup>c</sup> 18:5 Mat 10:40; Luk 10:16; Ion 13:20

kiroko maea, ra i luhoi tora iau, ge dili na naro hale, bara i kamumu hateka ni gi topi na lohona a kedo dagi, ni gi voro puru na utu, ge pasiri.

<sup>7</sup>“A Vure bara i pelekado e huriki ri vakaboru e huriki na naro hale. I muholi, a nitoni bara i bele. Pali a Vure ge pelekado a viri i vakaboru e huriki. <sup>8</sup><sup>d</sup>A limamu o a vahamu ge rata ioe go rata a rabu hale, o palakudua, o vurokia. Ma ni gi voro puru ioe na kanono i nono vakaroro turana vahamu i rua, a limamu i rua. I kamumu bara o tahoka a limamu, a vahamu i taku kunana, o bole a nimahuri vakaroro. <sup>9</sup>Pali a matamu ge rata ioe go rata a naro hale, o sigi talea, o vurokia, ma ni gi voro puru ioe na kanono na imperno turana matamu i rua. I kamumu go tahoka a matamu i taku kunana, o bole a nimahuri vakaroro.

### A Nivakakika na Sipsip i Velu

*(Lukas 15:3-7)*

<sup>10</sup><sup>e</sup> “Naha ni biua tara viri ne huriki a koma kiroko nga, a vuhuna iau a taki mua, e huriki a agelo ne ria ri pesi vakaroro na matane Tata na hunu. <sup>11</sup>(-)<sup>f</sup>

<sup>12</sup>“Mu luhoi navai? A ra ge ratea a bakovi i tahoka a sipsip i ravulu mule ma a murina balaka taku (100), pali a sipsip tara i laho tala, i velu? Bara i pe puru na kupona a sipsip i 99, bara i vano ia, i matakanea a viri i velu. <sup>13</sup>A taki muholi mua, na tahuna i matavisia bara i vivi hateka vona. A nivivi vona bara i dagi hateka na maka sipsip i 99 i uka ma ri laho tala. <sup>14</sup>I mavonga kunana, e Tamane mua na hunu i uka ma i ngaru ge velu a viri tara ne huriki a viri kiroko nga.

### A Viri i Rata a Naro Hale ne Turana

<sup>15</sup><sup>g</sup>E turamu tara ge rata hale ioe, o vano o taki kapilohoa. Ia ge longo, o korimulea pali e turamu. <sup>16</sup><sup>h</sup>Ia i uka ma ge longo, o tuli tabua tara bakovi, o a bakovi ala rua, moto vano moto takia. I mavonga, ‘a ngava ni padi virihi a viri vona, a bakovi ala rua o ala tolu to go lohoka vona.’ <sup>17</sup>Ia i tabana i uka ma ge longo, mu taki talea ne huriki a tara na Vure. Ia i tabana i uka ma ge longo, mu mata taroa ge manga a bakovi i uka ma ia a Iuda, o a bakovi ni bole a takis.

<sup>18</sup><sup>i</sup> “A taki muholi mua, a ra maki mu koloa koea na malala, bara ni kolo meli na hunu. A ra maki mu puga koea na malala, bara ni puga meli na hunu.

<sup>19</sup><sup>j</sup> “A taki tabu mua, e rei ne mua ala rua koea na malala ru valongo mai a ngava, ru vasileki, e Tata na hunu bara i longo mai rua. <sup>20</sup>I

<sup>d</sup> 18:8 Mat 5:29-30    <sup>e</sup> 18:10 Hib 1:14    <sup>f</sup> 18:11 A puhu na hinere hosi ri uka ves iea: <sup>11</sup>

A Tuna Bakovi i valai ne vona ni korimule e huriki ri velu.    <sup>g</sup> 18:15 Luk 17:3; Gal 6:1

<sup>h</sup> 18:16 Vin 19:15; Ion 8:17    <sup>i</sup> 18:18 Mat 16:19; Ion 20:23    <sup>j</sup> 18:19 Mrk 11:24; Ion 15:7

mavonga, a vuhuna na tahuna a viri ala rua o ala tolu to vapopo na ragu, iau a made vonga turane tou.”

### A Nivakakika na Vora Hale

<sup>21</sup>Muri e Petrus i valai ne Isu, i nanea, “Bakovi Dagi, e turagu ge rata hale iau balaka kupo, ga puga vuroki balaka riva a naro hale vona? Ga puga balaka polorua?”

<sup>22</sup><sup>k</sup>E Isu i koli i ta maea, “I uka ma ge balaka polorua kunana. O puga vuroki a naro hale vona balaka ravulu polorua a polona i polorua (77).

<sup>23</sup>“I maea, a harikianga na hunu i manga a hariki i ngaru e huriki a vora vona ri gi koli a moni ri bole. <sup>24</sup>A bakovi i pelekado mugea, a kedo bara i koli a talent i rangale ravulu (10,000).<sup>l</sup> <sup>25</sup>Pali a bakovi iea i keru ni koli a moni vona, lakea a hariki i taki ni gi habi ni kona a bakovi iea, turana e girihina, e huriki e tuna, a maki lobo vona, ni gi koli a makoli vona.

<sup>26</sup>“A vora i tabuli puru na ngalana hariki, i nana tora ia, i ta maea, ‘O dodo iau, o hatenono. Bara koli lobo a moni vomu.’ <sup>27</sup>Lakea a bakovi dagi i dodoa a vora vona, i takia nahea ge koli a makoli vona.

<sup>28</sup>“Pali a vora iea, na tahuna i pagitala, i masia a vora turana, hosi i habi a moni vona, a denari i ravulu mule ma murina balaka taku (100).<sup>m</sup> I lakavua, i roboa a lohona, i takia, i ta maea, ‘O koli ngane a kedo a habi vomu!’

<sup>29</sup>“A vora turana i tabuli puru na ngalana, i nana tora ia, i ta maea, ‘O dodo iau, o hatenono. Bara koli mule a makoli vomu.’

<sup>30</sup>“Pali i uka ma i longo maia. I vano, i taki e huriki a tagari ri gi ru dilia na bavi, ge made vonga ge harena na tahuna i koli mule lobo a makoli vona. <sup>31</sup>Na tahuna e huriki a vora ranga ri masia, ri dodo. Ri vano, ri vakalongoa a hariki.

<sup>32</sup>“Muri a hariki i gale vilia a vora iea, i takia, ‘Ioe a vora hale! Ioe o nana tora iau, a puga vuroki a makoli lobo vomu. <sup>33</sup>Iau a dodo ioe, pali i uka ma o dodoa a vora turamu.’ <sup>34</sup><sup>n</sup>I madihi a hatena hariki, i habia na limane huriki a tagari ri gi habi a nimadihi dagi vona, ge harena na tahuna i koli mule lobo a makoli vona.

<sup>35</sup><sup>o</sup> “I mavonga kunana, e Tata na hunu bara i rata maea e huriki i uka ma ri lohople muholi a naro hale na turane ria.”

### A Nivapile na Parangia

(Markus 10:1-2; Lukas 16:18)

**19** <sup>1</sup>E Isu i taki lobo a ngava nga, muri i malaga o Galili, i lakea na robo e Iudea, na tabeke tara na naru e Iordan. <sup>2</sup>E huriki ala kupo ri muri vona, lakea i vakamahuri ria lobo.

<sup>k</sup> 18:22 Vuh 4:24; Luk 17:4    <sup>l</sup> 18:24 A moni tara ne ria a “talent”. A talent i taku i manga a mapana viri i leho na pida i ravulu a polona i lima (15).    <sup>m</sup> 18:28 A moni a denari i manga a mapana viri i leho na paravaita ku.    <sup>n</sup> 18:34 Mat 5:25-26  
<sup>o</sup> 18:35 Mat 6:15; Mrk 11:25; Epe 4:32; Kol 3:13

<sup>3</sup>E huriki a Pariseo ranga ri valai vona, ri gi tonia. Ri nanea, “A vinara i ta navai? A bakovi ge pilea e girihina na ningaru vona?”

<sup>4</sup>E Isu i koli, i ta maea, “Ra mua, i uka ma mu gi a nitana Vure? Ni here maea, na mugana maki lobo a Vure, a viri i ratarike a maki lobo, ‘i ratarike varago a bakovi a ngatavine.’ <sup>5</sup> Lakea a Vure i ta maea, ‘I mavonga, a bakovi bara i pe e tamana e kinana, i madoko turane girihina, a kakaine rua ge taku kunana.’ <sup>6</sup> Ngane i uka ma ru ala rua, ru ala taku kunana. I mavonga, nahea tara viri ge kalipida rua, a vuhuna a Vure i vakamade palupu rua.”

<sup>7</sup>Muri ri nanea e Isu, “Pali e Moses, i navai i habi a vinara hosi i taki a bakovi bara i habia ne girihina a raukea na nivapile, muri bara i totoa ge vano?”

<sup>8</sup>Lakea e Isu i koli, i ta maea, “Na mugana maki lobo i uka ma i mavonga. Pali e Moses i longo ne mua mu gu rata mavonga, a vuhuna mu kulirua hateka. <sup>9</sup> A taki muholi mua, a ngatavine i uka ma i mole, pali a bakovi i pilea, i parangi tabu a ngatavine tara, ra bakovi iea i mole.”

<sup>10</sup>Muri e huriki a murimuri ri takia, “A ngava iea ge muholi, i kamumu hateka na viri i uka ma ge parangi.”

<sup>11</sup>E Isu i koli, i ta maea, “I uka ma e huriki lobo ri gi longokilalea a ngava iea. E huriki ri gi longo maia, re huriki a Vure i kori ria ri gi longo maia. <sup>12</sup> A ta maea a vuhuna e huriki a bakovi ranga, i hopa a dolene ria, lakea i uka ma ri parangi. Pali e huriki a bakovi ranga, ni pala vuroki a dolene ria lakea i uka ma ri parangi. E huriki a bakovi ranga ri koi ni parangi, a vuhuna ri ngaru ni rata a leho na harikianga na hunu. Pali e rei a viri i kara ge longo mai a ngava iea, ge longo maia.”

### **E Huriki a Koma Kiroko** (Markus 10:13-16; Lukas 18:15-17)

<sup>13</sup>Muri ni tuli lakea ne Isu e huriki a koma kiroko, ge ru langa a limana ne ria, ge vasileki langa ne ria. Pali e huriki a murimuri ri tahate e huriki ri tuli valai e huriki a koma.

<sup>14</sup>Lakea e Isu i taki ria, i ta maea, “Naha ni hatekakari e huriki a koma. Mu taparaki ria ri gi valai nau, a vuhuna a harikianga na hunu ne vone ria e huriki a hulu nga.” <sup>15</sup>I ru langa ne huriki a koma a limana, i vakabagetu ria. Muri i malaga, i vano.

### **A Riau na Mahala** (Markus 10:17-31; Lukas 18:18-30)

<sup>16</sup>Muri a bakovi tara i valai ne Isu, i nanea, “Mari ni tovo, a ra maki kamumu ga ratea ga bole a nimahuri vakaroro?”

---

<sup>p</sup> 19:4 Vuh 1:27; 5:2    <sup>q</sup> 19:5 Vuh 2:24; Epe 5:31    <sup>r</sup> 19:7 Vin 24:1-4; Mat 5:31

<sup>s</sup> 19:9 Mat 5:32; 1Ko 7:10-11    <sup>t</sup> 19:14 Mat 18:2-3

<sup>17</sup>“E Isu i koli, i ta maea, “I navai o nana iau na a ra maki i kamumu? A viri i kamumu i ala taku kunana. Ioe bara o ngaru ni bole a nimahuri vakaroro, o muri mai a vinara na Vure i ravulu.”

<sup>18</sup>“Muri a bakovi i nana maea, “E rei a vinara ga ramaia?”

E Isu i koli, i ta maea, “Naha ni rabalaki a viri. Naha ni mole. Naha ni panaho. Naha ni tatami. <sup>19</sup>“O togo e tamamu e kinamu. O ngaru e huriki lobo i manga a hini o ngaru mule ioe.”

<sup>20</sup>A riau i koli, i ta maea, “A muri mai lobo a vinara nga. A ra maki tabu ga ratea?”

<sup>21</sup>E Isu i koli, i ta maea, “Ioe bara o ngaru ni malamala na matana Vure, o vano o habi a maki lobo vomu ni gi kona. O bole a mapana o habi ne huriki a matasia, bara o tahoka a mahala na hunu. Muri o valai o muri nau.”

<sup>22</sup>Na tahuna a riau i longoa a ngava iea, i dodo hateka, a vuhuna i tahoka hateka a mahala. I pesi rike kunana, i vano.

<sup>23</sup>Muri e Isu i taki e huriki a murimuri vona, i ta maea, “A taki muholi mua, a bakovi na mahala, i gutu hateka vona ni dili na harikianga na hunu. <sup>24</sup>A taki tabu mua, a kamel i keru ni dili na dupi na kavato. I mavonga kunana, a bakovi na mahala i uka ma ge dili na harikianga na Vure.”

<sup>25</sup>Na tahuna e huriki a murimuri ri longoa a ngava iea, ri turutu, ri nana, “Pali e rei ngane ge bole a nimahuri vakaroro?”

<sup>26</sup>“Lakea e Isu i mata lakea ne ria, i ta maea, “A maki iea, e huriki a bakovi ri keria. Pali a Vure, i uka tara maki ge keria.”

<sup>27</sup>E Petrus i koli mule, i nanea, “Mia mi pe a maki lobo ne mia, mi muri vomu! I mavonga, a ra maki mi gi bolea?”

<sup>28</sup>“E Isu i koli, i ta maea, “A taki muholi mua, muri ma na malala karaba, a Tuna Bakovi bara i made na nibagetu na gula hariki vona. Mua ranga e huriki mu muri nau, bara mu made na gula hariki i ravulu a polona i rua, bara mu pelekado a kabu ne Israel i ravulu a polona i rua. <sup>29</sup>E rei a viri i luhoi tora iau, lakea i pe a ruma vona, i pe e huriki e turana, e kurabana, e tamana, e tuna, a hania vona, iau bara koli, bara ri bole balaka kupo tabu a maki nga, turana nimahuri vakaroro. <sup>30</sup>“I kupo e huriki ri muga ngane, bara ria a iku. Pali i kupo e huriki ri iku ngane, bara ri muga.”

### E Huriki a Voravora na Hania na Vain

**20** <sup>1</sup>“A harikianga na hunu i manga a tahona malala i vuho tala ge matakana e huriki a vora ri gi leho na hania na vain vona. <sup>2</sup>I

<sup>u</sup> 19:17 Levi 18:5; Luk 10:28    <sup>v</sup> 19:18 Nim 20:13-16; Vin 5:17-20    <sup>w</sup> 19:19 Nim 20:12;

Levi 19:18    <sup>x</sup> 19:26 Jop 42:2    <sup>y</sup> 19:28 Mat 25:31; Luk 22:30; Kap 3:21

<sup>z</sup> 19:30 Mat 20:16; Luk 13:30

taki ria ge kona ria na denarius i taku.<sup>a</sup> Ri longo, lakea i rudu ria ri gi leho na hania na vain.

<sup>3</sup>“Muri na kilala i polova na hatelanga i vano tabu, ge matakana e huriki a vora. I matai e huriki a bakovi ri pesi tavula na mada, <sup>4</sup>lakea i taki ria, i ta maea, ‘Mua ranga mu valai, mu leho na hania na vain nau. Bara kona kamumu mua.’ <sup>5</sup>Lakea ri vano, ri leho.

“I rata mavonga tabu na kuru haro. I vano tabu na kilala i tolu na malunga. <sup>6</sup>Na malunga, na kilala i lima, i vano tabu. I matai e huriki ranga ri pesi tavula, lakea i nana ria, ‘I navai mu pesi tavula mavonga koea na parava iea?’

<sup>7</sup>“Ri koli, ri ta maea, ‘I uka tara viri ge taki mia mi gi leho vona.’

“Lakea i taki ria, ‘Pali. Mua ranga mu valai mu leho na hania na vain nau.’

<sup>8 b</sup>“Na malunga liu ngane, i takia a matakari na vora, i ta maea, ‘O gale palupu e huriki a vora, o kona ria. O vakatubu ne huriki ri bele muri.’

<sup>9</sup>“E huriki a vora ni bole na malunga ri valai muga ri bole a mapane ria. Ni habi ne ria takutaku a denarius i taku. <sup>10</sup>Muri e huriki ri leho muga ri valai, ni gi kona ria. Ri pahadaki ta ri gi bole a moni dagi, pali ria ranga, ri bole takutaku a denarius i taku kunana. <sup>11</sup>Na tahuna ri bole a mapane ria, ri vakatubu ni deke, <sup>12</sup>ri ta maea, ‘Re huriki nga o bole na malunga liu, ri leho kunana na kilala i taku, lakea ke o kona ria i manga o kona mia. Pali mia, mi leho tabaka, i kani mia a haro.’

<sup>13</sup>“Lakea i koli i takia a viri tara ne ria, i ta maea, ‘Turagu, iau i uka ma rata hale ioe. Muga o longo vona a denarius a taki ioe ga kona ioe vona. <sup>14</sup>O bolea a mapamu, o vano. A ningaru nau kunana a kona mua na mapa i taku. <sup>15</sup>Ra moni nga, a moni nau. I navai, go taki iau a ra ga ratea vona? I navai ke? I madihi a hatemu a vuhuna iau a hatebalala?’

<sup>16 c</sup>“I mavonga kunana, e huriki ri muri bara ri muga. E huriki ri muga bara ri muri.”

### E Isu i Taki Mugea a Nimatena (Markus 10:32-34; Lukas 18:31-33)

<sup>17</sup>E Isu i lalaho sike o Ierusalem. I tuli lakea na gaga e huriki a murimuri vona ala ravulu a polona i rua, i taki ria, i ta maea, <sup>18 d</sup>“Ngane si gi sike o Ierusalem. A Tuna Bakovi bara ni habi na limane huriki a prister dagi, a mari na vinara. Bara ri taki ni gi rabalaki ia. <sup>19</sup>Muri bara ri habia na limane huriki i uka ma ria a Iuda, ri gi padikedea, ri gi hotua, ri gi paditatea na kai tavalavala. Muri na parava i tolu, a Vure ge vakamahuri mulea.”

---

<sup>a</sup> 20:2 A moni denarius i taku a mapana viri i leho na parava i taku. <sup>b</sup> 20:8 Levi 19:13; Vin 24:15 <sup>c</sup> 20:16 Mat 19:30; Mrk 10:31 <sup>d</sup> 20:18 Mat 16:21; 17:22-23

**E Kinane Iakobus Rua e Ioanes**  
(Markus 10:35-45)

<sup>20</sup>Muri e girihine Sebedi, i tuli valai ne Isu e tuna rua. I pasike puru na ngalane Isu, i nanea ge ratea vona tara maki.

<sup>21</sup><sup>e</sup>Lakea e Isu i nanea, “A ra o ngarua?” I koli, i ta maea, “A ngaru e tugu nga ru gu made turamu na harikianga vomu. Ge made na kanemu tara, na maurimu tara.”

<sup>22</sup><sup>f</sup>E Isu i koli, i ta maea, “I uka ma moto lohoka vona a maki moto nana vona. A nimadihi i tabukoi ga bolea, i kara marua muru gu kalohoa, o i uka?”

Ru koli e maki tari rua, ru ta maea, “I kara maria.”

<sup>23</sup>Lakea e Isu i taki rua i ta maea, “I muholi hateka muru gu kalohoa a nimadihi manga iau. Pali e rei ge made na kanegu, a maurigu, i uka ma a maki nau ga habi. A gula nga e Tata i rata puru na viri i vulaki pali.”

<sup>24</sup>Na tahuna e huriki a murimuri ala ravulu ri longoa, i madihi a hatene ria. <sup>25</sup><sup>g</sup>Pali e Isu i gale palupu ria, i taki ria, “Mu lohoka vona e huriki i uka ma ria a Iuda, a hariki ne ria ri matakari hateka ria. E huriki a bakovi dagi ne ria ri rata polo mugamuga. <sup>26</sup><sup>h</sup>Pali mua, i uka ma mu gu rata mavonga. E rei a viri i ngaru ge ia a viri dagi ne mua, ge leho manga a vora ne mua. <sup>27</sup>E rei a viri i ngaru ni muga ne mua ge ia a vora ne mua, <sup>28</sup><sup>i</sup>ge manga a Tuna Bakovi. Ra Tuna Bakovi, i valai i uka ma ge vakavora e huriki. I valai ge ia a vora ne huriki, ge mate, ge konamule e huriki ala kupu.”

**E Isu i Vakamatapara a Kepa**  
(Markus 10:46-52; Lukas 18:35-43)

<sup>29</sup>Na tahuna e Isu, e huriki a murimuri vona ri pea e Ieriko, e huriki ri ala kupu ri muri vona. <sup>30</sup>A kepa ala rua ru mamade na dahana dala. Na tahuna ru longoa e Isu i laho polo, ru gale tala, ru ta maea, “O Bakovi Dagi, hamone Davit, o dodo maria!”

<sup>31</sup>Pali e huriki ri tahate rua, ri taki rua ru gu vulai. Pali ru gale hinituhana tabu, ru ta maea, “O Tune Davit, Bakovi Dagi, o dodo maria!”

<sup>32</sup>Lakea e Isu i pesi tata, i gale valai rua, i ta maea, “A ra muru ngarua?”

<sup>33</sup>Ru koli, ru ta maea, “Bakovi Dagi, miri ngaru go vakamatapara maria!”

<sup>34</sup>E Isu i dodo rua, i nugu a matane rua. Malaviriri kunana ru matapara, ru muri vona.

<sup>e</sup> 20:21 Mat 19:28; Luk 22:30    <sup>f</sup> 20:22 Mat 26:39; Ion 18:11    <sup>g</sup> 20:25 Luk 22:25-26

<sup>h</sup> 20:26 Mat 23:11; Mrk 9:35    <sup>i</sup> 20:28 Luk 22:27; Pili 2:7

### E Isu i Dili o Ierusalem

(Markus 11:1-11; Lukas 19:28-40; Ioanes 12:12-19)

**21** <sup>1</sup>Ri bele tabukoi o Ierusalem ngane, na tanga tara ni gale e Betpage, na dahana lolo e Oliva. Lakea e Isu i rudu a murimuri vona ala rua, <sup>2</sup>i taki rua, “Muru muga lakea na tanga na ngalane marua. Na tahuna muru bele, bara muru masia a donki ni kolotata turana tuna. Muru puga rua, muru lalu valai nau. <sup>3</sup>A viri tara ge nana marua, muru takia e Bakovi Dagi i tahoka a leho ne rua, lakea bara i vakaru valai malaviriri kunana.”

<sup>4</sup>A maki iea i bele, ge bele muholi a ngavana propet hosi, i ta maea,

<sup>5</sup><sup>j</sup> “Mu vakalongo e huriki ri made o Sion, mu ta maea,

‘Mu masia! A hariki ne mua i valai ngane.

A bakovi madoru. I rike na donki,

i rike na tuna donki.’ ”

<sup>6</sup>Lakea ru vano, ru ramai a ngavane Isu. <sup>7</sup>Ru lalu valai a donki turana tuna. Ru vulala langa na bitone rua a varakia ne rua, lakea e Isu i made langa. <sup>8</sup>E huriki ala kupo ri vulala na dala a varakia ne ria. E huriki ranga ri paku a rahana kai ri vahata na dala. <sup>9</sup><sup>k</sup>E huriki ri muga, e huriki ri muri ri vivi vona, ri magulu taku, ri ta maea,

“Si gi kavurikea a hamone Davit!

A Vure ge vakabagetua a viri i valai na rane Bakovi Dagi!

Si gi kavurikea a Vure Meli Liu!”

<sup>10</sup>Na tahuna ri dili o Ierusalem, e huriki lobo na tanga iea ri talulu maia, ri vanana, “E rei a bakovi iea?”

<sup>11</sup>Lakea e huriki ri laho turana ri koli, ri ta maea, “Ra bakovi iea e Isu, a propet i valai o Nasaret, na tabeke ne Galili.”

### E Isu i Lili Tala e Huriki na Roho na Vure

(Markus 11:15-19; Lukas 19:45-48; Ioanes 2:13-22)

<sup>12</sup>Ngane e Isu i dili na roho na Vure o Ierusalem, i lili tala e huriki ri vakona, ri vahabi a maki. I pulo ngalatudu a dede ne huriki ri vangoli a moni, e huriki ri vahabi a balu. <sup>13</sup><sup>l</sup>I taki ria, i ta maea, “A ngava ni here puru i ta maea, ‘A roho nau bara ni gale a roho na nivasileki,’ pali mua mu ratea a hini ri haniu vona e huriki a panaho.”

<sup>14</sup>Muri e huriki a kepa, a vaha hale ri vali vona pololilo na roho na Vure, i vakamahuri ria lobo. <sup>15</sup>Pali e huriki a prister dagi, a mari na vinara na lotu, i madihi a hatene ria na tahuna ri matai a maka maki ni turutu vona e Isu i rata, ri longo e huriki a koma pololilo na roho na Vure ri gale tala, ri ta maea, “Si gi kavurikea a hamone Davit!”

<sup>j</sup> 21:5 Sek 9:9    <sup>k</sup> 21:9 Sng 118:25-26    <sup>l</sup> 21:13 Ais 56:7; Jer 7:11



<sup>16m</sup>Lakea ri nanea e Isu, “A ngava i taki e huriki a koma kiroko, o longo?”  
I koli i ta maea, “A longo. Pali mua, a ngava ni here hosi na Hinere, mu longoa o i uka? Ni here maea:

‘E huriki a koma kiroko, a koma ri ruru, o rata ria ri kavurike ioe.’”

<sup>17</sup>Muri i pe ria, i lakea o Betani, i mahita vonga.

### A Kai a Pik i Malai

(Markus 11:12-14,20-24)

<sup>18</sup>Na hatelanga e Isu i laho hamule o Ierusalem. I vitolo. <sup>19</sup>I masia a kai a pik na dahana dala. I lokovonga maia, pali i uka kanena. A pagana kunana. Lakea i takia a kai, i ta maea, “I uka ma go vua tabu!” Malaviriri kunana, a kai i malai.

<sup>20</sup>Na tahuna e huriki a murimuri ri masia, ri turutu, ri nana, “Ra kai a pik iea, i malai malaviriri navai?”

<sup>21</sup>“E Isu i koli, i ta maea, “I muholi hateka, e rei a viri i luhoi tora, i uka ma i loho ruarua, ia tara bara i takia a kai ge malai. A maki kiroko nga. Bara i rata tabu a maka maki dagi. Bara i takia a lolo iea, ‘O malaga rike, o to na utu.’ bara i longototo. <sup>22</sup>“Mua bara mu luhoi tora, bara ni habi ne mua a maki mu vasileki vona.”

### E Rei i Habi a Nitara ne Isu?

(Markus 11:27-33; Lukas 20:1-8)

<sup>23</sup>Muri e Isu i dili na roho na Vure, i vara e huriki. E huriki a prister dagi, a bakovi dagi ri valai vona, ri nanea, “O bole vai a nitara o rata a maki nga? E rei i taki ioe go rata a maki nga?”

<sup>24</sup>E Isu i koli, i ta maea, “Ga nana taro mua. Mua bara mu koli visia a ninana iea, bara taki mua vona e rei a viri i habi nau a nitara ni rata a maki nga. <sup>25</sup>A ninana nau i maea, ra hilova ne Ioanes, i valai na Vure, o i valai na bakovi tavula kunana?”

Ri vata, ri ta maea, “Bara si takia a leho vona i valai na Vure, bara i nana, ‘Pali i navai i uka ma mu luhoi tora ia?’ <sup>26p</sup>Pali bara si takia i valai na bakovi kunana, bara si mangenge ne huriki, a vuhuna ri luhoia e Ioanes a propet.”

<sup>27</sup>Lakea ri ta maea, “I uka ma mi lohoka vona.”

Muri e Isu i ta maea, “Iau tara, i uka ma ga taki mua vona e rei a viri i habia nau a nitara ni rata a maki nga.”

### A Nivakakika na Koma ala Rua

<sup>28</sup>Muri e Isu i taki e huriki a prister dagi, e huriki a bakovi dagi nga, i ta maea, “Mu luhoi navai? A bakovi tara i tahoka e tuna bakovi ala rua. I takia a tabua i ta maea, “Tugu, mona o vano o leho na hania na vain.”

<sup>m</sup> 21:16 Sng 8:2    <sup>n</sup> 21:21 Mat 17:20; Luk 17:6; Ion 14:12; 1Ko 13:2    <sup>o</sup> 21:22 Mat 7:7-11; 18:19    <sup>p</sup> 21:26 Mat 14:5

<sup>29</sup>“A tabua i koli, i ta maea, ‘A koi.’ Pali muri i dodo, i pulo a niluhoi vona, i vano, i leho.

<sup>30</sup>“Muri e tamane rua i takia a pahamuri tabua ge leho na hania. A koma i koli, i ta maea, ‘Bakovi dagi, bara vano.’ Pali i uka ma i vano ge leho.

<sup>31</sup>“E rei ne rua i muri mai a ngavane tamane rua?” Ri koli, ri ta maea, “A tabua.”

Lakea e Isu i taki ria, “A taki muholi mua, e huriki a bakovi ni bole a takis, e huriki a ngoi bara ri dili muga ne mua na harikianga na Vure. <sup>32</sup><sup>q</sup>A ta maea, a vuhuna e Ioanes i valai i vakasiri mua vona a naro malamala, pali i uka ma mu longo maia. Pali e huriki a bakovi ni bole a takis, e huriki a ngoi ri longo maia. Pali mua, na tahuna mu matai e huriki nga ri longo maia, i uka ma mu pulo a vilone mua mu gu longo maia.”

**A Nivakakika na Vora Hale**  
(Markus 12:1-12; Lukas 20:9-19)

<sup>33</sup><sup>r</sup> “Mu longo tabu tara nivakakika: A tahona malala tara i varoa a hania na vain vona. I tura haluia na nure. I kelia a lovo, i kisia a tabeke ni paha bebe a vain vona. I haea a roho tagari. Muri i habia a hania ne huriki a bakovi ranga ri gi leho taro vona, i vano i havai na robo basi ia. <sup>34</sup>I tabukoi ngane a keva ni mirio a vain, lakea i rudu e huriki a vora vona, ri gi bole ne huriki a mari ni leho a kanena vain.

<sup>35</sup>“Pali ri lakavu e huriki a vora vona. Ri ubia tara, ri rabalakia tara, ri padimatea na kedo tara. <sup>36</sup>Muri i rudu tabu e huriki a vora ranga, ri ala kupo popote ne huriki muga. Pali e huriki a bakovi na leho ri ratapile tabu ria. <sup>37</sup>Ngane a tahona malala i rudua e tuna. I luhoi maea, ‘Bara ri togoa e tugu.’

<sup>38</sup><sup>s</sup> “Pali na tahuna ri masia e tuna, ri vata, ri ta maea, ‘A bakovi iea bara i bole a murine tamana. Si gi rabalakia, si gi bolea a hania na vain na tahuna e tamana i mate.’ <sup>39</sup>“Lakea ri lakavua, ri voro talea na hania na vain, ri bimatea.

<sup>40</sup>“Mu luhoi navai? A tahona hania na vain, ge rata navai e huriki a bakovi na leho nga na tahuna i hamule valai?”

<sup>41</sup>Ri koli ri ta maea, “Bara i rabalaki e huriki a bakovi hale nga. Muri bara i habia ne huriki a bakovi na leho ranga a hania na vain vona. Pali na tahuna na nimirio, bara ri habi mule na tahona malala ranga kanena vain.”

<sup>42</sup>“Lakea e Isu i taki ria, i ta maea, “A ngava ni here puru na Hinere, i maea,

<sup>q</sup> 21:32 Luk 3:12; 7:29-30   <sup>r</sup> 21:33 Ais 5:1-2   <sup>s</sup> 21:38 Mat 27:1   <sup>t</sup> 21:39 Hib 13:12

<sup>u</sup> 21:42 Sng 118:22-23; Rom 9:33; 1Pe 2:6-8

‘Ra kedo e huriki a mari ni hae a ruma ri marikoi vona,  
ngane i bele a vuhu kedo ni hae a ruma vona.  
A rabu iea, e Bakovi Dagi i ratea,  
i mata kamumu hateka na matane hita.’

“Ra mua, mu longo pali a ngava iea, o i uka? <sup>43</sup>I mavonga a taki mua, a harikianga na Vure bara ni bole hamule ne mua, bara ni habi ne huriki ri rata a maki a Vure i ngaru na harikianga vona. <sup>44</sup>E rei a viri i boru langa na kedo iea bara i bole a vuranga. Na tahuna a kedo iea ge boru taho a viri, bara i ubi momoa.”

<sup>45</sup>Na tahuna e huriki a prister dagi, e huriki a Pariseo ri longo a nivakakika iea, i padi ria a mana vona e Isu i taki virihi ria. <sup>46</sup>Lakea ri matakana a dala ri gi lakavua. Pali ri mangenge a vuhuna e huriki ri takia e Isu a propet.

### A Nivakakika na Habu na Parangia

(Lukas 14:16-24)

**22** <sup>1</sup>E Isu i taki tabu ria vona tara nivakakika, i ta maea, <sup>2</sup>“A harikianga na hunu i manga a hariki i rata a habu na parangia ne tuna a bakovi. <sup>3</sup>I taki puru e huriki ri gi valai na habu, lakea i rudu e huriki a vora vona, ri gi tuli valai ria. Pali e huriki a bakovi nga ri koi ni valai.

<sup>4</sup>“Muri a hariki i rudu tabu e huriki a vora ranga, i ta maea, ‘Mu vano, mu taki e huriki a taki puru ria, ri gi valai. Mu taki ria a bulmakau, a tuna bulmakau gavutuvutu ni poka pali. A rata puru lobo pali a maki ni kani. Mu taki ria ri gi valai na habu na parangia, mi gi kani.’

<sup>5</sup>“Pali i uka ma ri taratoto. Ri laho viliha. A viri tara i lakea na hania. A viri tara i vano ge rata a leho vona. <sup>6</sup>‘Pali e huriki ranga ri lakavu e huriki a vora na hariki, ri rata hale ria, ri rabalaki ria. <sup>7</sup>I mavonga, i madihi a hatena hariki, lakea i rudu e huriki a tara na nugumaheto vona ri rabalaki e huriki a bakovi hale nga, ri rungani a tanga ne ria.

<sup>8</sup>“Muri i taki e huriki a vora vona, i ta maea, ‘A habu na parangia ni rata puru. Pali e huriki a taki puru ria ri gi valai, i uka ma ria a viri kamumu ri gi valai. <sup>9</sup>I mavonga, mu laho lakea na maka dala dagi. Mu taki e huriki mu matai vonga ri gi valai.’ <sup>10</sup>Lakea e huriki a vora nga ri lakea na maka dala, ri tuli e huriki vonga. Ri tuli e huriki a bakovi hale, ri tuli e huriki a bakovi kamumu. Ria lobo ri valai na habu, i vonu a roho.

<sup>11</sup>“Pali na tahuna a hariki i valai ge matai e huriki ri bele, i masia a bakovi tara, i uka ma i rodo a varakia na habu. <sup>12</sup>Lakea i nanea, ‘Turagu, o uka a varakia na habu. O dili navai?’ Pali a bakovi iea i ngapa.

ˆ 22:6 Mat 21:35

<sup>13</sup> Lakea a hariki i taki e huriki a bolekoru vona, i ta maea, ‘Mu kolotata a limana, a vahana, mu voro talea na uvo, na tabeke a Vure i uka ma i made vona. E huriki na tabeke iea ri tangi, i vaheri mavonga a ngine ria, a vuhuna i madihi a hatene ria.’ <sup>14</sup> A ta maea, a vuhuna ni gale e huriki ala kupo, pali e huriki ni vulaki i uka ma ri ala kupo.”

### A Takis ne Kaiser

(Markus 12:13-17; Lukas 20:20-26)

<sup>15</sup> Muri e huriki a Pariseo ri vano, ri matakana a dala ri gi tamia e Isu, ge taki ranga ngava ri gi padi virihia vona. <sup>16</sup> Ri rudu e huriki a murimuri ne ria, turana e huriki a tara ne Herod. <sup>17</sup> Ri lakea vona ri ta maea, “Mari ni tovo, mi lohoka vomu, ioe a bakovi ni ta muholi, o vara muholi na narona Vure. I uka ma o mangenge vona tara viri, a vuhuna e huriki lobo ri palupulupu na matamu. <sup>17</sup> I mavonga, o taki mia, a vinara i taki si gi habi a takis ne Kaiser, o i uka? O luhoi navai?”

<sup>18</sup> Pali e Isu i lohoka vona a niluhoi hale ne ria, lakea i taki ria, “Mua e huriki a tabele rua, i navai mu ngaru ni toni iau? <sup>19</sup> Mu vakasiria nau tara moni ni kona a takis vona.” Ri habia vona a moni tara ni gale a denarius. <sup>20</sup> Muri i nana ria, “A hanune rei, a rane rei i tabuli vona?”

<sup>21</sup> Ri koli, ri ta maea, “A hanune Kaiser, a rane Kaiser i tabuli vona.” Lakea e Isu i taki ria, “Mu habi ne Kaiser a maki ne Kaiser, mu habi na Vure a maki na Vure.”

<sup>22</sup> Na tahuna ri longoa a ngavana ri turutu. Muri ri pea, ri vano.

### A Nimahurimule na Matenga

(Markus 12:18-27; Lukas 20:27-40)

<sup>23</sup> Na parava iea kunana e huriki a Sadusi ri valai ne Isu. Re huriki a Sadusi, ri taki ta i uka tara viri ge mahuri mule na matenga. Ri valai ne Isu, ri nanea, <sup>24</sup> <sup>b</sup> “Mari ni tovo, e Moses i here puru i takia a bakovi i mate, i pe purua e girihina, pali i uka e tune rua, e tarina bara i parangi tabu a havuri vona, ge vakabelea a hamona. <sup>25</sup> I tahoka e maki tarina mai ala polorua, ri made hosi turane mia. A tabua i parangi, muri i mate. Pali i uka ma i vakabele e tuna. Lakea a pahamuri tabua i parangi vona a havuri na tabua. <sup>26</sup> A ngatavine i uka ma i poda ma, i mate a pahamuri tabua. Pali re maki tari mai lobo ri parangi vona a ngatavine iea. Ria lobo ri mate. I uka tara viri ge vakabele a koma. <sup>27</sup> Ri mate lobo e huriki a bakovi, muri a ngatavine

---

<sup>w</sup> 22:13 Mat 8:12; 25:30; Luk 13:28    <sup>x</sup> 22:15 Mrk 3:6    <sup>y</sup> 22:16 E huriki a Pariseo ri marikoi e huriki a Rom ri gi matakari o Israel. E huriki a kabu ri do rikea e Herod ri ngaru e hurikia Rom ri gi matakari o Israel. E Isu bara i taki nahea ri gi kona a takis i lakea ne huriki a Rom, e huriki a kabu ne Herod bara ri padi virihia e Isu na ngava. Pali e Isu bara i taki ni gi kona a takis lakea ne huriki a Rom, e huriki a Pariseo bara ri padi virihia e Isu na ngava.    <sup>z</sup> 22:21 Rom 13:7    <sup>a</sup> 22:23 Apo 23:8    <sup>b</sup> 22:24 Vin 25:5

i mate. <sup>28</sup>O luhoi navai? Muri ma, na tahuna e huriki ri pesi rike mule na ni mate, ra ngatavine iea ge girihine rei muholi? Ria lobo ri parangi vona.”

<sup>29</sup>Pali e Isu i koli mule, i ta maea, “I uka ma mu lohoka vona a Hinere. I uka ma mu lohoka na nitora na Vure. I mavonga mu varoru. <sup>30</sup>Muri ma, na tahuna e huriki ri gi mahuri mule na matenga, i uka ma ri gi vaparangi. Bara ri made manga e huriki a agelo na hunu. <sup>31</sup>Ra ngava na ni mahurimule na matenga, a nitana Vure i vakalongo mua maea, <sup>32</sup><sup>c</sup> ‘Iau a Vure ne Abraham, ne Isak, ne Iakop.’ A Vure i uka ma ia a Vure ne huriki ri mate, ia a Vure ne huriki ri mahuri.”

<sup>33</sup>Na tahuna e huriki ri longoa a ngavana, ri turutu vona a nitovo vona.

### A Vinara Dagi

*(Markus 12:28-31; Lukas 10:25-28)*

<sup>34</sup>E huriki a Pariseo ri longoa e Isu i vakangapa e huriki a Sadusi, lakea ri vapopo, ria lobo ri lakea ne Isu. <sup>35</sup>A Pariseo tara, a mari na vinara na lotu, i tonia e Isu na ngava, i nanea maea, <sup>36</sup>“Mari ni tovo, e rei a vinara i dagi hateka na vinara lobo?”

<sup>37</sup><sup>d</sup>E Isu i koli, i ta maea, “O ngarua e Bakovi Dagi a Vure vomu na hatemu lobo, na hanumu lobo, na niluhoi vomu lobo. <sup>38</sup>A vinara iea i muga, i dagi na vinara lobo. <sup>39</sup><sup>e</sup>A vinara i muri vona, i manga tabu a viri muga, i maea: O ngarua e turamu i manga a hini o ngaru mule ioe. <sup>40</sup><sup>f</sup>A vinara i rua nga a vuhuna a vinara lobo ne Moses, a hinere lobo ne huriki a propet.”

### E Kristo e Tune Rei?

*(Markus 12:35-37; Lukas 20:41-44)*

<sup>41</sup>E huriki a Pariseo ri tabana ni pesi palupu, lakea e Isu i nana ria, <sup>42</sup><sup>g</sup> “Mu luhoi navia e Kristo? Ia a hamone rei?” Ri koli, ri ta maea, “E Kristo a hamone Davit.”

<sup>43</sup>Lakea e Isu i nana ria, “Pali e Davit, i navai i takia e Kristo a Bakovi Dagi vona? Na tahuna a Hanu Kiripiripi i dili ne Davit, i ta maea,

<sup>44</sup><sup>h</sup> ‘E Bakovi Dagi i takia a Bakovi Dagi nau, i ta maea,

“O made na limagu a kanegu,  
ge harena na tahuna ga ratapile  
e huriki a pile vomu.”’

<sup>45</sup>“E Davit i galea e Kristo e ‘Bakovi Dagi,’ pali i navai tabu ge ia a hamona?”

<sup>46</sup>E huriki a Pariseo ri keri ni kolia a ninana ne Isu. I vakatubu na parava iea ri mangenge ni nana rovi tabua e Isu.

<sup>c</sup> 22:32 Nim 3:6; Mat 8:11    <sup>d</sup> 22:37 Vin 6:5    <sup>e</sup> 22:39 Levi 19:18; Mat 7:12

<sup>f</sup> 22:40 Rom 13:10; Gal 5:14    <sup>g</sup> 22:42 Ion 7:42    <sup>h</sup> 22:44 Sng 110:1; Mat 26:64

**A Vure Ge Pelekado e Huriki**  
(*Markus 12:38-39; Lukas 11:43,46; 20:45-46*)

**23** <sup>1</sup>Muri e Isu i taki e huriki a murimuri vona, turana e huriki ri vapesihi vonga, i ta maea, <sup>2</sup>“E huriki a mari na vinara na lotu, e huriki a Pariseo ri made na murine Moses ri vara mua na vinara. <sup>3</sup><sup>i</sup>Mu longototo a vinara ne ria. Pali naha ni muri mai a vilone ria, a vuhuna i uka ma ri muri mai a ngava ri vara vona. <sup>4</sup>Ri habi a vinara ne huriki i gutu ni ramai, i manga a viri i rotu a maka galesi dagi, i vakakaloho e huriki a bakovi vona. Pali ria ri koi hateka ni tuhori popote e huriki.

<sup>5</sup><sup>j</sup>“A maki lobo ri rata, ri vakaholi kunana, e huriki ri gi matai. Ri tama na dumene ria a maka puhu na nitana hinere, ri bole na limane ria ranga. Ri rata a varakia na nivasileki ne ria i ola, i bola. <sup>6</sup>Ri ngaru ni made mugamuga na gula kamumu na habu, na gula kamumu na roho na vaponga. <sup>7</sup>Ri ngaru hateka e huriki ri gi togo ria, ri gi tagui ria na mada. Ri ngaru hateka e huriki ri gi gale ria ‘a mari ni tovo.’

<sup>8</sup>“Pali mua, nahea tara viri ge gale mua ‘a mari ni tovo,’ a vuhuna a mari ni tovo ne mua i taku kunana. Pali mua e maki turana mai. <sup>9</sup>Nahea mu gu galea tara viri na malala ge tamane mua, a vuhuna e Tamane mua i taku kunana, ra i made na hunu. <sup>10</sup>Nahea tara viri ge gale mua ‘a bakovi dagi,’ a vuhuna a Bakovi Dagi ne mua i taku kunana, re Kristo. <sup>11</sup><sup>k</sup>A viri i muga ne mua ge ia a vora ne mua lobo. <sup>12</sup><sup>l</sup>E rei a viri i bibi rike mulea, a Vure bara i vakakiroko ia. Pali e rei a viri i vakakiroko mule ia, a Vure bara i kavurikea.

<sup>13-14</sup>“Mua e huriki a Pariseo, a mari na vinara na lotu mu tabele rua hateka! A Vure bara i ratapile mua! Mu tukari a logo na harikianga na hunu, i uka tara viri ge dili. Mu koi ni dili vona, pali mu hatekakari e huriki ranga ri ngaru ni dili.<sup>m</sup>

<sup>15</sup>“Mua e huriki a Pariseo, a mari na vinara na lotu, mu tabele rua hateka! A Vure bara i ratapile mua! Mu laho lae basi, mu page poloa a dari mu gu tuli a viri ge ramai mua. Pali na tahuna i ramai mua, a rabu hale vona i rangi a rabu hale ne mua, lakea bara i puru turane mua na imperno.

<sup>16</sup><sup>n</sup>“Mu ngaru ni vakasiri e huriki na dala, pali mu kepa. A Vure bara i ratapile mua! A ngava mu takia i maea, ‘E rei a viri i ta muholi, i kaba, i kurahia a roho na Vure, a maki tavula. Pali a viri i ta muholi, i kaba,

---

<sup>i</sup> 23:3 Mal 2:7-8   <sup>j</sup> 23:5 Nim 13:9; Gi 15:38-39; Vin 6:8; Mat 6:1   <sup>k</sup> 23:11 Mat 20:26; Mrk 9:35; Luk 22:26   <sup>l</sup> 23:12 Jop 22:29; Snd 29:23; Luk 14:11; 18:14   <sup>m</sup> 23:13-14 Ves 14 i uka ma i tabuli na hinere na maka puhu hosi. I tabuli kunana na maka puhu karaba. I maea: <sup>14</sup>Mua e huriki a Pariseo, a mari na vinara na lotu mu ngava naru hateka! A Vure ge ratapile mua! Mu tami e huriki a havuri mu panaho a ruma ne ria. Mu tero kunana vona a nivasileki i ola mu rata.   <sup>n</sup> 23:16 Mat 15:14

i kurahia a gol i tabuli na roho na Vure, ge ramai a ngava i takia.’ <sup>17</sup>Mu kepa, mu manga! I vai a maki i dagi? A gol tavula, o a roho na Vure ra i ratea a gol i tabuli herehere, ge ne vona a leho na Vure?

<sup>18</sup>“Pali a ngava tara mu takia i maea, ‘A viri i kaba na dede, a maki tavula. Pali a viri i kaba na nihabi, ge ramai a ngava i takia.’ <sup>19</sup>Mu kepa! I vai a maki dagi: a nihabi, o a dede ra i ratea a nihabi i vaperesi, ge ne vona a leho na Vure? <sup>20</sup>I mavonga kunana, a viri i kaba na dede, i kaba vona turana maki i tabuli langa vona. <sup>21</sup>A viri i kaba na roho na Vure, i kaba vona turana viri i made pololilo vona. <sup>22</sup>° A viri i kaba na hunu, i kaba na gula hariki na Vure, i kaba na viri i made langa vona.

<sup>23</sup><sup>p</sup> “Mua e huriki a Pariseo, a mari na vinara na lotu, mu tabele rua hateka! A Vure ge ratapile mua! A maki lobo ne mua mu ru na naguna i ravulu, lakea mu bole talea a naguna i taku mu habia na Vure. A maka maki tavula ranga, manga a kobo mu rata mavonga. Pali mu mata taro a maka ngava dagi na vinara. Mu mata taro a naro ni rata virihi e huriki lobo ge ramai a vilone ria. Mu mata taro a naro na nidodo, a naro ni luhoi torea a Vure. I kamumu mu gu ramai a vinara kiroko. Pali naha ni longokaburungi tabu a maka vinara dagi. <sup>24</sup>Mu ngaru ni vakasiri e huriki na dala, pali mu kepa mua! Mu ramai a maka vinara tavulavula, pali mu mata kepa vona a maka vinara dagi. Mu rata mavonga, mu manga a bakovi i bole talea na kikei na naru vona a lango, pali i mata kepa vona a kamel, i todoa.

<sup>25</sup><sup>q</sup> “Mua e huriki a Pariseo, a mari na vinara na lotu, mu tabele rua hateka. A Vure ge ratapile mua! Mu ramai a vinara ni loi a tabeke polovavo na kap, a tavila. Pali a maki mu ru dili na kap, a tavila, mu bole na naro ni panaho, na naro ni raha. <sup>26</sup>Mu kepa! Mu pelekado taro a hatene mua. Muri a narone mua bara i malamala.

<sup>27</sup><sup>r</sup> “Mua e huriki a Pariseo, a mari na vinara na lotu, mu tabele rua hateka! A Vure ge ratapile mua! Mu manga a lovo ne huriki ri mate, ni kalu keakea. I mata kamumu a hini polovavo, pali a hini pololilo i vona a tuha, a berana huriki ri mate. <sup>28</sup>°I mavonga kunana e huriki ri matai mua, ri luhoi mua ta mu malamala. Pali a hini pololilo ne mua i vona a naro na tabele rua, a naro na ni longotaro a vinara na Vure.

<sup>29</sup>“Mua e huriki a Pariseo, a mari na vinara na lotu, mu tabele rua hateka! A Vure ge ratapile mua, a vuhuna mu hae a murina tuhana e huriki a propet, e huriki a bakovi malamala hosi, mu vakabagetu. <sup>30</sup>Mu rata mavonga, a vuhuna mu luhoi maea, ‘Mia bara mi made hosi na tahuna e huriki a gare ne hita ri made na malala, i uka ma mi gi kori ria, mi gi rabalaki e huriki a propet nga.’ <sup>31</sup>†I mavonga mu vakasiri mua, mua

° 23:22 Ais 66:1; Mat 5:34    P 23:23 Levi 27:30; Mai 6:8    q 23:25 Mrk 7:4

r 23:27 Apo 23:3    s 23:28 Luk 16:15    † 23:31 Apo 7:52

a hamone huriki ri rabalaki e huriki a propet. <sup>32</sup>Pali ngane mu vakalobo a leho e huriki e tubune mua ri doko hosi.

<sup>33</sup> <sup>u</sup> “Mua e huriki a mata! Mua e huriki a mata hale! A Vure ge rudu mua mu gu lakea na imperno, bara mu keru ni ha taroa. <sup>34</sup>I mavonga, ga rudu lakea ne mua e huriki a propet, e huriki a bakovi na lohokanga, e huriki a mari na vinara na lotu. Bara mu rabalaki ranga, mu paditata na kai tavalavala ranga. Bara mu lagu pololilo na roho na vaponga ranga, pali e huriki ranga bara mu lili lae ria na maka tanga. <sup>35</sup>Na naro iea kunana bara mu rare na matenga ne huriki a bakovi malamala ni rabalaki, i vakatubu na bakovi malamala e Abel, i valai i harena ne Sakarias, e tune Berekia, ra mu rabalaki na roho na Vure, na kurukuruna tabeke ni gamai, a dede. <sup>36</sup>A taki muholi mua, mua e huriki na tahuna mona bara mu bole a nimadihi, a vuhuna e huriki a bakovi nga ni rabalaki.

### E Isu i Taringia e Ierusalem

(*Lukas 13:34-35; 19:41-44*)

<sup>37</sup>“Ierusalem, Ierusalem! Mu rabalaki e huriki a propet, mu rabalaki na kedo e huriki a rudu valai ne mua. Balaka kupo a ngaru ni kalipopo palupu mua, i manga a kinana kureko i kavitagau a maka tuna na karapana, ga matakaru mua. Pali mu koi mua. <sup>38</sup>“A Vure i pea pali a roho ne mua. <sup>39</sup>Ngane a taki mua, i uka ma mu gu matai tabu iau ge harena na parava mu gu ta maea, ‘Si gi kavurikea a viri i valai na rane Bakovi Dagi.’”

### A Roho na Vure Bara Ni Ubi Puka

(*Markus 13:1-2; Lukas 21:5-6*)

**24** <sup>1</sup>E Isu i pe a roho na Vure, i laho lokovonga. E huriki a murimuru vona ri valai ri vakasiria vona a maka roho na tabeke na roho na Vure. <sup>2</sup>Lakea e Isu i koli, i ta maea, “Ra maka roho nga, a taki muholi mua, i uka tara kedo ge tabuli langa vona a kedo tara. A kedo lobo bara ni ubi puka puru.”

### A Nilobona Parava

(*Markus 13:3-13; Lukas 21:7-19*)

<sup>3</sup>Na tahuna e Isu i mamade na lolo e Oliva, e huriki a murimuru vona ri valai kapiloho vona, ri nanea, “Ra maki nga, garika ri gi bele? Ge mata navai a kilakila muga ne ioe go bele, muga na nilobona parava?”

<sup>u</sup> 23:33 Mat 3:7; 12:34; Luk 3:7    <sup>v</sup> 23:35 Vuh 4:8; 2Sto 24:20-21    <sup>w</sup> 23:38 1Ki 9:7-8; Jer 22:5    <sup>x</sup> 23:39 Sng 118:26    <sup>y</sup> 24:2 Luk 19:44



<sup>4</sup>E Isu i koli, i ta maea, “Mu mamata, nahea tara viri ge tami mua. <sup>5</sup><sup>z</sup>E huriki ala kupo bara ri valai na ragu, bara ri tami e huriki, ri ta maea, ‘Iau e Kristo.’ Lakea bara ri tami e huriki ala kupo. <sup>6</sup>Bara mu longo a ngava na vabinga, a nita viliha na vabinga. Pali naha ni turutu. A maki nga bara ri bele, pali a nilobona parava i tabana. <sup>7</sup>E huriki a kabu na robo tara bara ri vaubi turana kabu na robo tara. E huriki a tara na hariki tara bara ri vaubi turana tara na hariki tara. A pago, a vuruke bara ri bele na tabeke legelege. <sup>8</sup>Ra maki nga bara ri bele muga, i manga a nimadihi na ngatavine i pahea a koma.

<sup>9</sup><sup>a</sup> “Muri bara ni lakavu mua, ni vakamadihi mua, ni rabalaki mua. E huriki na tanga lobo bara ri marikoi ne mua, a vuhuna mu ramai iau. <sup>10</sup>Muri e huriki ala kupo bara ri lohople iau, ri vatepu, ri vahabi ria na limana pile. <sup>11</sup><sup>b</sup>E huriki a nitamina propet ala kupo bara ri bele, ri tami e huriki. <sup>12</sup>E huriki ala kupo bara ri lobo ni vangaru, a vuhuna e huriki ala kupo bara ri longotaro a vinara. <sup>13</sup><sup>c</sup>Pali e rei i pesi tora ge harena na parava i mate vona, a Vure bara i korimulea. <sup>14</sup><sup>d</sup>A Velenga Kamumu na harikianga bara ni vakalongo taro na tanga lobo na malala. Muri bara i bele a nilobona parava.

**A Maki Hale Hateka Bara i Bele**  
(Markus 13:14-23; Lukas 21:20-24)

<sup>15</sup><sup>e</sup> “I mavonga, na tahuna mu masia a bakovi i muma hateka i ratapile a maki, ra viri i takia hosi e Daniel a propet, ge pesi pololilo na roho na Vure. E rei a viri i gia a nita iea ge longokilala. <sup>16</sup>Na tahuna mu masia a maki iea ge bele, mu ha. E huriki ri made o Iudea ri gi ha sike na lolo. <sup>17</sup><sup>f</sup>E rei a viri i pesi polomeli na mapana roho vona, nahea ge dili na ruma ge bole a maki vona. Ge ha pa kunana. <sup>18</sup>E rei a viri i leho na hania, nahea ge hamule na tanga ge bole a varakia vona. Ge ha pa kunana. <sup>19</sup>E huriki a ngatavine ri singou, e huriki a ngatavine ri vakaruru a koma kiroko, bara ri marego hateka na parava iea! <sup>20</sup>Mu vasileki nahea ge bele a maki iea na tahuna na malangia o na Parava Nimalo.

<sup>21</sup><sup>g</sup>Na parava iea a nimadihi dagi hateka bara i bele. A nimadihi dagi maea i uka ma i bele hosi, i vakatubu na ni doko na malala, i valai i harena mona. Pali a nimadihi dagi maea i uka ma ge bele tabu muri ma. <sup>22</sup>Bara a Vure i uka ma ge vakakapo a parava nga, e huriki lobo bara ri mate. Pali a Vure bara i vakakapo ria, ge korimule e huriki a bakovi a ngatavine i vulaki ria. <sup>23</sup><sup>h</sup>I mavonga, nahea mu gu longo mai e huriki a bakovi ri ta maea, ‘Mata valai! E Kristo ia koea,’ o ‘Mata lakea! E Kristo

<sup>z</sup> 24:5 Mat 24:23-24; 1Ion 2:18    <sup>a</sup> 24:9 Mat 10:22    <sup>b</sup> 24:11 Mat 24:5,24; 1Ion 4:1

<sup>c</sup> 24:13 Mat 10:22    <sup>d</sup> 24:14 Mat 28:19    <sup>e</sup> 24:15 Dan 9:27; 11:31; 12:11    <sup>f</sup> 24:17 Luk 17:31

<sup>g</sup> 24:21 Dan 12:1    <sup>h</sup> 24:23 Mat 24:5

ia lake!' Naha ni longo mai ria, <sup>24</sup><sup>i</sup>a vuhuna e huriki a nitamine kristo, a nitamina propet bara ri bele, ri rata a maka nivakasiri dagi, a maki dagi ni turutu vona, ri ngaru ni tami e huriki. Bara i kara ria, bara ri tami tabu e huriki a bakovi a ngatavine a Vure i vulaki ria. <sup>25</sup>Mu longo kamumu. Iau a vakalongo muga mua pali. <sup>26</sup><sup>i</sup>I mavonga, na tahuna ri taki mua, 'Oi! Ia lilo na robo!' naha ni dili mai ia. O a viri tara ge ta maea, 'Oi! I made kapiloho lilo!' naha ni longo mai ia. <sup>27</sup><sup>k</sup>Na tahuna a Tuna Bakovi ge valai, bara i luve kavakava manga a vila. A vila i maravila na nirike na haro, i para lobo vona a hini i lakea na nirolona haro. <sup>28</sup><sup>i</sup>Na hini i tabuli vona a podana viri, a maka pangopangokaba bara ri vapopo.

**A Tuna Bakovi Bara i Hamule Valai**  
(Markus 13:24-27; Lukas 21:25-28)

<sup>29</sup><sup>m</sup> "A nimadihi dagi i lobo, malaviriri kunana a haro bara i maparavunu, a keva tara i uka ma ge para. A maka hada bara ri mapasi, a maka nitora na hunu bara ni polu. <sup>30</sup><sup>n</sup>Muri a kilakila na Tuna Bakovi bara i bele na hunu. E huriki a kabu lobo na malala bara ri tangi. Muri bara ri masia a Tuna Bakovi i pesi langa na bubu, i puru valai na hunu turana nitora, a nipara dagi. <sup>31</sup><sup>o</sup>Muri a tavure bara i tangi dagi na tahuna i rudu e huriki a agelo vona ri gi bole sike palupu na tabeke lobo na malala e huriki a bakovi a ngatavine i vulaki ria. Bara ri bole ria na tabeke lobo, i vakatubu na tabeke tara na malala, i vano i lakea na tabekena tara.

**Mu Bole a Lohokanga na Kai a Balele**  
(Markus 13:28-31; Lukas 21:29-33)

<sup>32</sup>"Mu bole a lohokanga vona a kai a balele. Na tahuna i tahoka a totona a rahana, i lubu a pagana, bara mu pasimata vona a tahuna na haro i tabukoi. <sup>33</sup>I mavonga kunana na tahuna mu matai a maki nga ri bele, bara mu lohoka vona a Tuna Bakovi i valai tabukoi hateka pali. <sup>34</sup><sup>PA</sup>taki muholi mua, e huriki a bakovi a ngatavine na tahuna iea i uka ma ri gi mate ma, bara i bele taro a maka maki nga. <sup>35</sup><sup>A</sup>hunu a malala bara ru lobo, pali a nitagu bara i tabuli vakaroro.

**A Parava a Kilala i Uka Ma Ni Lohoka Vona**  
(Markus 13:32-37; Lukas 17:26-30; 17:34-36)

<sup>36</sup><sup>r</sup> "I uka tara viri ge lohoka vona a parava, a kilala ge bele vona a maki nga. E huriki a agelo na hunu i uka ma ri lohoka vona a parava

---

<sup>i</sup> 24:24 Vin 13:1-3; 2Tes 2:8-9; Kap 13:13-14    <sup>j</sup> 24:26 Luk 17:23-24    <sup>k</sup> 24:27 Mat 24:37-39  
<sup>l</sup> 24:28 Luk 17:37    <sup>m</sup> 24:29 Ais 13:10; 34:4; Ese 32:7; Jol 2:10,31; 2Pe 3:10; Kap 6:12-13  
<sup>n</sup> 24:30 Dan 7:13; Sek 12:10; Kap 1:7    <sup>o</sup> 24:31 1Ko 15:52; 1Tes 4:16    <sup>p</sup> 24:34 Mat 16:28  
<sup>q</sup> 24:35 Mat 5:18    <sup>r</sup> 24:36 Apo 1:7; 1Tes 5:1-2

iea. A Tuna Vure tara i uka ma i lohoka vona. E Tamana kunana i lohoka vona a parava iea. <sup>37</sup>A niluve na Tuna Bakovi bara i manga kunana a niluve na marungulolo hosi na tahuna e Noa i made na malala. <sup>38</sup>Muga na marungulolo e huriki ri kani, ri ninu, ri vaparangi, i vano i harena na tahuna e Noa i dili na agarungu. <sup>39</sup>Ri made manga manga kunana, muri a marungulolo i bele vakaturutu, ria lobo ri mate. Bara i mavonga kunana na tahuna a Tuna Bakovi i valai. <sup>40</sup>Na parava iea, a bakovi ala rua bara ru leho na hania. A viri tara bara ni bole. A viri tara bara i made mule. <sup>41</sup>A ngatavine ala rua bara ru ubi momo a vit, ru gu rata a bret vona. A viri tara bara ni bole. A viri tara bara i made mule. <sup>42</sup>U mavonga mu mamata, a vuhuna i uka ma mu lohoka vona a parava ge valai vona e Bakovi Dagi. <sup>43</sup>U Mu luhoia a ngava iea: A tahona ruma bara i lohoka vona a ra kilala ge valai vona a bakovi ni panaho, bara i matapara mavonga, i uka tara viri ge pukea a ruma vona. <sup>44</sup>I mavonga kunana mu matapara, a vuhuna a Tuna Bakovi bara i valai vakaturutu. Bara i valai na tahuna i uka ma mu luhoi ge valai vona.

### A Vora Kamumu, a Vora Hale

(Lukas 12:42-46)

<sup>45</sup>“E rei ngane ge ia a voravora ge moro, ge rata kamumu a leho lobo a bakovi dagi vona i takia ge rata? A bakovi dagi vona bara i takia ge matakari e huriki a vora ranga, ge habi ne ria a maki ni kani na parava vakaroro. <sup>46</sup>Muri, na tahuna a bakovi dagi i hamule valai, i masia a bolekoru iea i rata kamumu a leho vona, bara i rata kamumu hatekea. <sup>47</sup>U A taki muholi mua, bara i ru ia ge matakari a mahala lobo vona. <sup>48</sup>Pali a vora iea bara ia a bakovi hale, bara i taki mulea, i ta maea, ‘A bakovi dagi nau i uka ma ge valai malaviriri.’ <sup>49</sup>Lakea i vakatubu ni ubi e huriki a vora turana, i kani i ninu turana e huriki a bakovi ni ninu. <sup>50</sup>Ra bakovi dagi vona, bara i valai vakaturutu na parava a vora i pahaluhoi ta i uka ma ge valai vona. Bara i luve na kilala a vora i pahadaki ta i uka ma ge luve vona. <sup>51</sup>Lakea a bakovi dagi bara i tolo pilea ra vora iea. Muri bara i ru turane huriki a tabele rua. Ra tanga iea, e huriki bara ri tangi, i vaheri mavonga a ngine ria, a vuhuna i madihi a hatene ria.

### A Sirula ala Ravulu

**25** <sup>1x</sup> “Na tahuna iea a harikianga na hunu bara i manga a sirula ala ravulu ri bole a lam ne ria, ri vano ri gi tagui a bakovi i parangi karaba. <sup>2</sup>A sirula ala lima ri manga manga, pali a sirula ala lima ri lohoka. <sup>3</sup>E

<sup>s</sup> 24:37 Vuh 6:5-8    <sup>t</sup> 24:39 Vuh 7:21-23    <sup>u</sup> 24:42 Mat 25:13    <sup>v</sup> 24:43 Luk 12:39-40;  
Kap 16:15    <sup>w</sup> 24:47 Mat 25:21,23    <sup>x</sup> 25:1 Luk 12:35; Kap 19:7

huriki a sirula manga manga ri bole a lam, pali i uka ma ri bole a karasin. <sup>4</sup>E huriki a sirula ri lohoka ri guru na ulo a lingena karasin, ri bole turana lam ne ria. <sup>5</sup>A bakovi i parangi karaba i uka ma i valai malaviriri, lakea e huriki a sirula ri matatulu, ri mahita. <sup>6</sup>Na kuru rodo ngane, a bakovi tara i gale tala, i ta maea, 'A bakovi i parangi karaba i valai ngane! Mu valai mu tagui ia!'

<sup>7</sup>"Lakea ri hadongo, ri kisi a lam ne ria. <sup>8</sup>E huriki a sirula manga manga ri nongi a karasin ne huriki a sirula lohoka, ri ta maea, 'Mu habi ne mia ranga karasin. I para hoho a lam ne mia.'

<sup>9</sup>"Pali ri koli ria, ri ta maea, 'I uka. A karasin i uka ma i kara hita lobo. Mu vano mu lakea ne huriki ri habi a karasin, mu kona ranga ge ne mua.'

<sup>10</sup>"Na tahuna ri vano ri gi kona a karasin, a bakovi i parangi i bele. Lakea e huriki a sirula, ra ri tahoka a karasin a lam ne ria, ri dili turana na habu na parangia. Muri a logo ni tukari.

<sup>11</sup><sup>y</sup> "Muri e huriki a sirula manga manga ri hamule valai, ri ta maea, 'Bakovi dagi! Bakovi dagi! O talea a logo!'

<sup>12</sup><sup>z</sup> "Pali a bakovi dagi i koli, i ta maea, 'Muholi hateka, i uka ma a lohoka ne mua.'

<sup>13</sup><sup>a</sup> "I mavonga, mu mamata, a vuhuna i uka ma mu lohoka vona a parava o a kilala e Bakovi Dag i ge valai vona.

#### A Voravora ala Tolu

(Lukas 19:11-27)

<sup>14</sup>"Mu mamata, a vuhuna na tahuna a Tuna Bakovi ge hamule valai, bara i manga a bakovi tara i havai. I gale palupu e huriki a vora vona, i vakasiri tou vona a mahala vona to go matakari. <sup>15</sup><sup>b</sup>I vaveru ne tou a moni, i muri mai a lohokanga ne tou. I habi na vora tara moni gol i 5,000. I habi na vora tara moni gol i 2,000. I habi na viri tara moni gol i 1,000. Muri i vano, i havai. <sup>16</sup>A viri i bole a moni gol i 5,000 i vano, i rata a leho vona, i vakabele tabu a moni gol i 5,000. <sup>17</sup>A viri i bole a moni gol i 2,000 i vano, i rata a leho vona, i vakabele tabu a moni gol i 2,000. <sup>18</sup>Pali a viri i bole a moni gol i 1,000 i keli a malala, i tanu vonga a moni na bakovi dagi vona.

<sup>19</sup>"I tabaka ngane, a bakovi dagi i hamule valai, i pelekado turane tou a moni i habi ne tou muga. <sup>20</sup>A vora i habi a moni gol i 5,000 vona i bole valai tabu a moni i 5,000, i ta maea, 'Bakovi dagi. Ra moni i 5,000 o habi nau, ngane a vakabele tabu a moni i 5,000.'

<sup>21</sup><sup>c</sup> "Lakea a bakovi dagi i koli, i ta maea, 'Kamumu hateka. Ioe a vora kamumu. O rata kamumu vakaroro a leho lobo a habi vomu! Ngane go matakari a maki ge kupo, a vuhuna o matakari kamumu a leho kiroko iea. O valai o vivi turagu!'

<sup>y</sup> 25:11 Luk 13:25-27    <sup>z</sup> 25:12 Mat 7:23    <sup>a</sup> 25:13 Mat 24:42    <sup>b</sup> 25:15 Rom 12:6

<sup>c</sup> 25:21 Mat 24:45-47; Luk 16:10

<sup>22</sup>“A vora i bole a moni i 2,000, ia tara i valai, i ta maea, ‘Bakovi dagi, ra moni i 2,000 o habi nau, a vakabele tabu a moni i 2,000.’

<sup>23</sup>“Lakea a bakovi dagi i koli, i ta maea, ‘Kamumu hateka. Ioe a vora kamumu. O rata kamumu vakaroro a leho lobo a habi vomu! Ngane go matakari a maki ge kupo, a vuhuna o matakari kamumu a leho kiroko iea. O valai o vivi turagu!’

<sup>24</sup>“Muri a vora i bole a moni i 1,000 i valai, i ta maea, ‘Bakovi dagi, a lohoka vomu ioe a bakovi hateka. O mirio na hania i varo e huriki ranga. <sup>25</sup>Lakea a mangenge, a kelua a malala, a tanu vonga a moni vomu i 1,000. O mata valai, a moni vomu nga.’

<sup>26</sup>“A bakovi dagi i koli, i ta maea, ‘Ioe a vora hale, ioe a malai! O lohoka vona iau a mirio na hania i varoa e huriki ranga. <sup>27</sup>Pali i navai i uka ma o ru dili na roho na tava a moni nau? Na tahuna a hamule valai, bara bole mule turana a moni ranga ni ru langa tabu vona.

<sup>28</sup>“Muri a bakovi dagi i ta maea, ‘Mu bole mulea vona a moni i 1,000, mu habi na viri i tahoka a moni i 10,000. <sup>29</sup><sup>d</sup>Mu rata mavonga, a vuhuna a viri i tahoka a maki pali bara ni habi tabu ranga, ge tahoka a maki i kupo. Pali e rei a viri i uka ma i tahoka a maki, a maki popote vona i tahoka pali bara ni bole hamule vona. <sup>30</sup><sup>e</sup>Mu bolea a vora hale iea, mu voro talea na uvo. Ra hini nga, e huriki ri gi haloho, i vaheri mavonga a ngine ria, a vuhuna i madihi a hatene ria.’

### A Tuna Bakovi Ge Pelekado e Huriki

<sup>31</sup><sup>f</sup>Muri e Isu i ta maea, “Na tahuna a Tuna Bakovi ge luve turana nipara dagi, ge valai turana e huriki a agelo vona, bara i made na gula hariki vona. <sup>32</sup><sup>g</sup>E huriki na tanga lobo bara ri pesi na matana. Bara i vakalipida e huriki na tara i rua, i manga a matakari na sipsip i vakalipida a maka sipsip, a meme. <sup>33</sup>Bara i ru na limana a kanena e huriki a sipsip. Bara i ru na limana a maurina e huriki a meme. <sup>34</sup>Muri a Hariki bara i taki e huriki ri pesi na limana a kanena, ‘Mu valai, mua e huriki e Tata i vakabagetu mua. Mu bolea a harikianga, ra ni rata puru ne mua na tahuna i ratarike a hunu a malala. <sup>35</sup><sup>h</sup>Mu bolea a harikianga, a vuhuna hosi na tahuna a vitolo mu habi a maki ni kani nau. Na tahuna a marohu mu habi a naru nau. Na tahuna iau a mosi mu tagui iau. <sup>36</sup>Na tahuna a uka maki ni rodo, mu habi a varakia nau. Na tahuna a giloa mu matakari iau. Na tahuna a dili na bavi mu valai mu gosi iau.’

<sup>37</sup>“Muri e huriki a bakovi a ngatavine malamala bara ri nanea, ‘Bakovi Dag, garika mi matai ioe o vitolo mi vakani ioe? Garika o marohu mi habi a naru vomu? <sup>38</sup>Garika mi matai ioe o made manga

<sup>d</sup> 25:29 Mat 13:12; Mrk 4:25; Luk 8:18    <sup>e</sup> 25:30 Mat 8:12; Luk 13:28    <sup>f</sup> 25:31 Mat 16:27; 19:28    <sup>g</sup> 25:32 Ese 34:17; Kap 20:11-13    <sup>h</sup> 25:35 Ais 58:7

mosi mi tagui ioe? Garika mi matai ioe o uka a varakia, mi habi a varakia vomu? <sup>39</sup>Garika mi matai ioe o giloa, o dili na bavi mi vano mi gosi ioe?’

<sup>40</sup><sup>i</sup> “A Hariki bara i koli, i ta maea, ‘A taki muholi mua, a ra maki mu rata virihi e huriki a turagu matasia vona, mu rata virihi iau.’

<sup>41</sup><sup>j</sup> “Muri bara i taki e huriki ri pesi na limana a maurina, i ta maea, ‘Mu ha nau. A Vure i ruduraha mua. Mu vano, mu puru na kanono i nono vakaroro. Ra kanono iea, ni tunu puru ge puru vona e Satan turana e huriki a agelo vona, re huriki a hanitu. <sup>42</sup>Hosi na tahuna a vitolo i uka ma mu vakani iau. Na tahuna a marohu i uka ma mu habi a naru nau. <sup>43</sup>Na tahuna iau a mosi, i uka ma mu tagui iau. Na tahuna a uka varakia i uka ma mu habi a varakia nau, ga rodo. Na tahuna a giloa, a dili na bavi i uka ma mu gosi iau.’

<sup>44</sup> “Muri ria ranga bara ri nanea, ‘Bakovi Dagi, garika mi matai ioe o vitolo, o marohu, o uka murina ni mahita, o uka varakia, o giloa o dili na bavi, lakea i uka ma mi kori ioe?’

<sup>45</sup> “E Bakovi Dagi bara i koli, i ta maea, ‘A taki muholi mua, a maki i uka ma mu rata virihi e huriki a turagu matasia vona, i uka mu rata virihi iau vona.’

<sup>46</sup><sup>k</sup> “Muri bara ri vano, ri bole a nimadhi vakaroro. Pali e huriki ri malamala bara ri bole a nimahuri vakaroro.”

### **E Huriki a Prister Ri Ngaru ni Rabalakia e Isu** (*Markus 14:1-2; Lukas 14:1-2; Ioanes 11:45-53*)

**26** <sup>1</sup>E Isu i taki lobo a ngava nga, muri i taki e huriki a murimuri vona, i ta maea, <sup>2</sup><sup>l</sup> “Mu lohoka vona a Habu na Nipagepolo bara i bele muri na parava i rua. Na parava iea a Tuna Bakovi bara ni habi na limane huriki a pile. Muri bara ri paditatea na kai tavalavala.”

<sup>3</sup>Na tahuna iea e huriki a prister dagi, e huriki a gare ri vapopo na roho dagi na prister dagi tara, a rana e Kaipas. <sup>4</sup>Ri varodo a ngava ri gi lakavu kapilohoa e Isu, ri gi rabalakia. <sup>5</sup>Lakea ri ta maea, “Nahea si gi ratea na habu ra naro iea, ma ge vaubi e huriki.”

### **E Isu Ni Biri o Betani** (*Markus 14:3-9; Ioanes 12:1-8*)

<sup>6</sup>E Isu i made o Betani, na ruma e Simon, ra bakovi hosi i ratapilea a patala. <sup>7</sup><sup>m</sup>E Isu i made na dede, lakea a ngatavine tara i valai vona, i bolea a ulo ni rata na kedo a alabasta. A ulo i vona a nibiri mangisipa ni kona na moni dagi. I guru langea na gine Isu.

<sup>i</sup> 25:40 Snd 19:17; Mat 10:42; Mrk 9:41    <sup>j</sup> 25:41 Mat 7:23    <sup>k</sup> 25:46 Dan 12:2; Ion 5:29

<sup>l</sup> 26:2 Nim 12:1-27; Mat 20:18    <sup>m</sup> 26:7 Luk 7:37-38

<sup>8</sup>Na tahuna e huriki a murimuri ri masia a ngatavine i rata mavonga, ri kanikaha, ri ta maea, “I navai i guru tavulea a mangisipa iea? <sup>9</sup>Ra mangisipa iea, bara ni habi na viri tara, bara i konea na moni dagi, lakea a moni bara ni habi ne huriki a matasia.”

<sup>10</sup>Pali e Isu i lohoka vona a nitane ria, lakea i taki ria, “I navai mu padimomoa a ngatavine iea? A naro i ratea nau i kamumu hateka. <sup>11</sup>E huriki a matasia bara ri made vakaroro turane mua. Pali iau i uka ma ga made vakaroro turane mua. <sup>12</sup>Na tahuna i guru a mangisipa langa na gigu, i kisi puru iau, bara ni tanu. <sup>13</sup>A taki muholi mua, na tanga lobo na malala ni vara vona a Velenga Kamumu muri ma, a naro i ratea a ngatavine iea bara ni vakalongo, e huriki ri gi luhoi mule ia.”

### E Iudas

*(Markus 14:10-11; Lukas 22:3-6)*

<sup>14</sup>Muri e Iudas Iskariot, ra turane huriki a murimuri ala ravulu a polona i rua, i lakea ne huriki a prister dagi, <sup>15</sup>i ta maea, “Iau ga habia na limane mua e Isu, pali a ra maki mu gu habia nau?” Lakea ri konea na moni silva i ravulu tolu (30). <sup>16</sup>I vakatubu vonga e Iudas i virokanea a dala ge habia e Isu na limane huriki a pile.

### E Isu i Kani Turana e Huriki a Murimuri

*(Lukas 22:7-14,21-23; Ioanes 13:21-30)*

<sup>17</sup>Na mugana parava na Habu na Bret i uka Is, e huriki a murimuri ri valai ne Isu, ri nanea, “I vai a hini o ngaru mi gi rata puru a maki ni kani vomu, go luhoi mulea a Habu na Nipagepolo?”

<sup>18</sup>E Isu i koli, i ta maea, “Mu dili na tanga dagi, mu masia a bakovi tara. Mu takia, ‘A mari ni tovo i ta maea, a parava nau i valai tabukoi. Ga ratea a Habu na Nipagepolo na ruma vomu turana e huriki a murimuri nau.’ ” <sup>19</sup>Lakea e huriki a murimuri ri muri mai a ngavane Isu, ri vano ri rata puru a maki ni kani na Habu na Nipagepolo.

<sup>20</sup>Na rodo i made na dede turana e huriki a murimuri ala ravulu a polona i rua, ri kani. <sup>21</sup>Na tahuna ri kakani, e Isu i taki ria, “A taki muholi mua, a viri tara ne mua bara i habi iau na limane huriki a pile.”

<sup>22</sup>Ri longoa a ngava iea, ri dodo. Lakea ria takutaku ri nanea, “Bakovi Dagi, ma ge iau?”

<sup>23</sup>E Isu i koli, i ta maea, “Ra viri i lutu puru a bret na kap nau, bara i habi iau ne huriki a pile. <sup>24</sup>A Tuna Bakovi bara i mate, i manga a nita ni here puru hosi. Pali ra bakovi i habia na limane huriki a pile, a Vure bara i ratapilea! Bara i kamumu hateka e kinana i uka ma ge podea hosi.”

<sup>25</sup>Muri e Iudas, ra viri bara i habia e Isu ne huriki a pile, i ta maea, “Mari ni tovo, ma ge iau?”

<sup>n</sup> 26:11 Vin 15:11   <sup>o</sup> 26:15 Sek 11:12; Ion 11:57   <sup>p</sup> 26:17 Nim 12:14-20   <sup>q</sup> 26:23 Sng 41:9

E Isu i koli i ta maea, “I manga a hini o taki.”

#### A Bret a Vain

(Markus 14:22-26; Lukas 22:15-20; 1 Korin 11:23-25)

<sup>26</sup>Na tahuna ri kakani, e Isu i bolea a bret, i kavurikea a Vure, i kevea, i habi ne huriki a murimuri, i ta maea, “A bret iea a bobogu. Mu bolea, mu kania.”

<sup>27</sup>Muri i bole rikea a kap na vain, i kavurikea a Vure. I habia ne ria, i ta maea, “Mua lobo mu ninu vona, <sup>28</sup>ʳa vuhuna a vain iea a daragu, ge pori nau ne vona ni vakatorea a ngava muholi a Vure i rata karaba turane huriki. Ge pori ne vona ni puga vuroki a naro hale ne huriki ala kupo.

<sup>29</sup>A taki mua, iau i uka ma ga ninu tabu a vain, bara i vano i harena na parava a ninu a vain karaba turane mua na harikianga ne Tata.”

<sup>30</sup>ʳi kalolo lobo a linge vasileki, muri ri lakea na lolo e Oliva.

#### E Petrus Bara i Nana Rovi ne Isu

(Markus 14:27-31; Lukas 22:31-34; Ioanes 13:36-38)

<sup>31</sup>ʳNa tahuna ri bele vonga, e Isu i taki e huriki a murimuri vona, i ta maea, “A maki ge bele nau na rodo iea bara i rata mua lobo mu ha taro iau, a vuhuna a ngava ni here puru na Hinere i ta maea,

‘Ga rabalakia a matakari na sipsip,  
bara ri ha viliha a maka sipsip.’

<sup>32</sup>ʳ “Pali na tahuna ga mahuri mule, bara muga lakea o Galili.”

<sup>33</sup>Lakea e Petrus i koli, i ta maea, “E huriki lobo bara ri matai a maki i bele vomu, bara ri ha. Pali iau i uka ma ga ha.”

<sup>34</sup>ʳE Isu i koli, i ta maea, “A taki muholi ioe, na rodo iea kunana, muga na kureko ge tangi, bara o nana rovi iau balaka tolu.”

<sup>35</sup>E Petrus i koli, i ta maea, “Iau i uka ma ga nana rovi ioe. Bara mate turamu!” E huriki a murimuri lobo, ria ranga ri ta mavonga.

#### E Isu i Vasileki o Getsemani

(Markus 14:32-42; Lukas 22:39-46)

<sup>36</sup>E Isu i tuli e huriki a murimuri vona, ri lakea na tabeke ni gale e Getsemani. Na tahuna ri bele, i taki ria, “Mu made koea mu dava iau. Ga lakea taro, ga vasileki.” <sup>37</sup>I tuli kunana e Petrus, e tune Sebedi ala rua. E Isu i vakatubu ni dodo, ni luhoi lege, <sup>38</sup>ʳlakea i taki tou, “Iau a dodo hateka, a nidodo i popote ge rata iau ga mate. Moto made koea, moto matapara, moto mamata turagu.”

ʳ 26:28 Nim 24:8; Jer 31:31-34; Sek 9:11; 1Ko 10:16    ʳ 26:30 Luk 22:39;

Ion 18:1    ʳ 26:31 Sek 13:7; Ion 16:32    ʳ 26:32 Mat 28:7,16    ʳ 26:34 Mat 26:69-75

ʳ 26:38 Ion 12:27



<sup>39</sup>I laho lokovonga popote i tabuli ngalatudu, i vasileki, “O Tata, ioe bara o ngaru, o bole vurokia nau a nimadihi dagi iea ta ge valai. Pali naha ni ramai a ningaru nau. O ramai kunana a ningaru vomu.”

<sup>40</sup>Muri i hamule mai a murimuri vona, i matai tou to mahita, lakea i nanea e Petrus, “Ra matou, moto keru ni matapara turagu na kilala i taku kunana? <sup>41</sup>Moto mamata, moto vasileki, ma moto go dili na nitoni. A hatene matou i ngaru ni ratea, pali a kakaine matou i uka ma i gao.”

<sup>42</sup>Lakea i vano i vasileki tabu, i ta maea, “O Tata, ra nimadihi iea, o masia i uka ma ge polo tavula, bara kalohoa. A ningaru vomu.”

<sup>43</sup>Muri i hamule mai tou, i matai tou to mahita tabu, a vuhuna to matatulu. <sup>44</sup>I mavonga i pe kunana tou, i vano i vasileki tabu, i manga a nivasileki vona muga.

<sup>45</sup>Muri i hamule lakea na murimuri vona, i taki tou, “Ra matou, moto tabana ni mahita, ni malo? Moto longo valai! A kilala i valai tabukoi pali. A Tuna Bakovi bara ni habi na limane huriki a bakovi hale. <sup>46</sup>\*Moto pesi rike te ge vano! A viri ge habi iau na limana pile i valai ngane!”

#### E Isu Ni Lakavu

*(Markus 14:43-50; Lukas 22:47-53; Ioanes 18:3-12)*

<sup>47</sup>E Isu i tabana ni ta, e Iudas, ra turana murimuri i ala ravulu a polona i rua, i bele. E huriki a prister dagi, e huriki a gare ne Israel ri rudu turane Iudas a bakovi ala kupo. Ria lobo ri nugu a lebo, a bainat. <sup>48</sup>Ra bakovi hale iea, ta ge habia e Isu na limane huriki a pile i taki puru ri gi matakilala navia e Isu, i ta maea, “A viri mu masia ga ngurua, ra bakovi iea kunana. Mu lakavua.” <sup>49</sup>I mavonga, i malaviriri kunana e Iudas i lakea ne Isu, i ta maea, “Mari ni tovo, a rodo!” Muri i ngurua.

<sup>50</sup>E Isu i koli i ta maea, “Turagu, o ratea a maki o valai vona.” Lakea e huriki a bakovi ri lakavua. <sup>51</sup>Ngane a bakovi tara i laho turane Isu i lalu talea a bainat vona, i voro, i palakudua a talingana vora na prister dagi.

<sup>52</sup>Lakea e Isu i takia, “O ru mulea na murina a bainat vomu, a vuhuna e rei a viri i vaubi na bainat bara i vurua na bainat. <sup>53</sup>Iau bara ngaru, bara takia e Tata, bara i rudu valai a tara bulolo ne huriki a agelo, ri gi kori iau. <sup>54</sup>Pali i uka ma ga rata mavonga, a vuhuna bara rata mavonga, ge bele muholi navai a ngava ni here puru na Hinere?”

<sup>55</sup>“Na tahuna iea kunana, i taki e huriki ri vapesihi vonga, i ta maea, “Mu rata manga iau a panaho, mu nugu a lebo a bainat, mu valai ni lakavu iau. Na parava lobo a made na roho na Vure, a vara vonga. Pali i uka ma mu lakavu iau. <sup>56</sup>Pali a maka nara nga ri bele ge bele muholi a ngava i here puru e huriki a propet.” E Isu i ta lobo, muri e huriki a murimuri ri ha taroa.

\* 26:46 Ion 14:31    † 26:51 Ion 18:26    ‡ 26:52 Vuh 9:6; Kap 13:10    § 26:55 Luk 19:47; 21:37

### E Isu Ni Pelekado

(Markus 14:53-65; Lukas 22:54-55,63-71; Ioanes 18:13-14,19-24)

<sup>57</sup>E huriki ri lakavua e Isu ri turaria lakea ne Kaipas, a prister dagi. E huriki a mari na vinara na lotu, e huriki a gare ne huriki a Israel ri vapopo pali vonga. <sup>58</sup>E Petrus i muri gosi basi popote vona, i lakea liu na mataruma na prister dagi. I dili pololilo, i made puru turane huriki a tagari, ge masia ri gi rata navia.

<sup>59</sup>E huriki a prister dagi turane huriki a tara na kot ne huriki a Iuda ri matakana a nitamina ngava ri gi padi virihia e Isu vona, ri gi rabalakia. <sup>60</sup>E huriki ala kupo ri valai ri rata a nitamina ngava, pali i uka ma ri matavisia tara ngava ge kamumu.

Muri a bakovi ala rua ru valai, <sup>61</sup><sup>b</sup>ru pukatala a ngava, ru ta maea, “Ra bakovi iea i ta maea, ‘I kara iau ga pukea a roho na Vure, muri ga hae mulea na parava i tolu kunana.’ ”

<sup>62</sup>Lakea a prister dagi i pesi rike, i ta maea, “I navai i uka ma o taratoto? O luhoi navai vona a ngava ni padi virihi ioe vona?”

<sup>63</sup><sup>c</sup>Pali e Isu i vulai mavonga. Lakea a prister dagi i nanea, “A taki ioe na rana Vure Mahuri, o vakalongo mia ngane, ioe e Kristo, a Tuna Vure?”

<sup>64</sup><sup>d</sup>E Isu i koli, i ta maea, “A ngava mu takia pali. Pali ngane ga vakalongo mua lobo, i vakatubu ngane mu gu masia a Tuna Bakovi i made na limana kanena na Viri i Tuhaka. Bara mu masia i pesi langa na bubu na hunu, i puru valai.”

<sup>65</sup><sup>e</sup>Na tahuna a prister dagi i longoa a ngavane Isu, i rapea a varakia vona, i ta maea, “Ra bakovi iea i ngaru ni bolea a murina Vure! E rei a viri si gi longo tabua? Mu longoa pali na ngavana, i ngaru ni bolea a murina Vure. <sup>66</sup><sup>f</sup>Mu luhoi navai?”

Ri koli, ri ta maea, “Ge mate.”

<sup>67</sup><sup>g</sup>Muri ri kalupe taho a matana, ri ubia. E huriki ranga ri tamarea a tulina, <sup>68</sup>ri ta maea, “Kristo, o ta propet ne mia ngane, e rei a viri i ubi ioe?”

### E Petrus i Nana Rovi ne Isu

(Markus 14:66-72; Lukas 22:56-62; Ioanes 18:15-18,25-27)

<sup>69</sup>E Petrus i made polovavo na mataruma. A vora ngatavine tara i valai maia, i takia, “Ioe tara o turane Isu, ra bakovi o Galili.”

<sup>70</sup>Pali i lavuni na matane ria lobo, i ta maea, “Iau i uka ma lohoka vona a ngava o takikia.”

<sup>b</sup> 26:61 Ion 2:19-21    <sup>c</sup> 26:63 Ais 53:7; Mat 27:12    <sup>d</sup> 26:64 Sng 110:1; Dan 7:13; Mat 24:30  
<sup>e</sup> 26:65 Mat 9:3; Ion 10:33    <sup>f</sup> 26:66 Levi 24:16; Ion 19:7    <sup>g</sup> 26:67 Ais 50:6; 53:5

<sup>71</sup>Muri e Petrus i vuru tala na logo, lakea a vora ngatavine tara i masia, i taki e huriki ri mamade vonga, “Ra bakovi iea i laho turane Isu, ra bakovi o Nasaret.”

<sup>72</sup>I lavuni tabu, i kaba, i ta maea, “Iau i uka ma lohoka vona a bakovi iea!”

<sup>73</sup>I uka ma i tabaka hateka, e huriki ri pepesi vonga ri takia e Petrus, ri ta maea, “Muholi hateka, ioe a turane ria. Mi longokilalea a tablemu.”

<sup>74</sup>Pali ngane e Petrus i taba rike na maki hale tara ge ratapilea, i kaba, i ta maea, “Iau i uka ma lohoka vona a bakovi iea!”

Malaviriri kunana a kureko i tangi. <sup>75</sup><sup>h</sup>Lakea e Petrus i longovisi a ngava e Isu i takia vona, “Muga na kureko ge tangi barama, bara o nana rovi iau balaka tolu.” Muri i pagitala i kilu, i upu rike a nangi, i tangi.

### E Isu Ni Turari Lakea ne Pilato

(Markus 15:1; Lukas 23:1-2; Ioanes 18:28-32)

**27** <sup>1</sup>Na hatelanga pokopoko e huriki a prister dagi, e huriki a gare ri valongo mai a ngava ri gi rabalakia e Isu. <sup>2</sup>Muri ri kolotatea, ri turaria lakea ne Pilato, ra bakovi i matakari a tabeke iea.

### E Iudas i Tomo

(Apostolo 1:18-19)

<sup>3</sup>Na tahuna e Iudas, ra viri i habia e Isu na limane huriki a pile, i masia ri gi rabalakia e Isu, i kilu vona a naro i ratea, lakea i habi mule ne huriki a prister dagi, a gare, a silva i ravulu tolu. <sup>4</sup>I taki ria, “A rata a naro hale. Ra viri a habia ne mua, a bakovi malamala.” Pali ri koli, ri ta maea, “A maki vomu.”

<sup>5</sup><sup>i</sup>Lakea i voro dili na roho na Vure a moni, muri i vano ia i vakatavore mule ia, i tomo.

<sup>6</sup>E huriki a prister dagi ri poi mule a moni, ri ta maea, “Ra moni iea, a mapana bakovi ni rabalaki. A vinara i taki i uka ma ge dili na tava na roho na Vure.” <sup>7</sup>Lakea ri valongo mai a ngava, ri bole a moni iea, ri konea a malala na mari ni ratana ulo, ge a murina ni tanu a podane huriki a mosi ri mate. <sup>8</sup>I mavonga ni gale liu a malala iea, “A Malala na Dara.” <sup>9</sup>Ngane a nita hosi na propet e Ieremaia i bele muholi. Ra ngava iea i maea, “Ri bole a moni silva i ravulu tolu, ra mapana nimate na viri e huriki e tune Israel ri ngarua ge mate. <sup>10</sup>Ri bole a moni iea, ri konea a malala na mari ni rata a ulo, i manga a hini e Bakovi Dag i taki iau vona.”

### A Hariki ne Huriki a Iuda

(Markus 15:2-5; Lukas 23:3-5; Ioanes 18:33-38)

<sup>11</sup>E Isu i pesi na matane Pilato, lakea a matakari i nanea, “Ra ioe, i muholi ioe a hariki ne huriki a Iuda?”

<sup>h</sup> 26:75 Mat 26:34 <sup>i</sup> 27:5 Mat 26:14-15; Apo 1:18-19 <sup>j</sup> 27:9-10 Sek 11:12-13

E Isu i koli i ta maea, “A ngava o takia pali.”

<sup>12</sup>Na tahuna e huriki a prister dagi, e huriki a gare ri padi virihia na ngava, i uka ma i taratoto. <sup>13</sup>Muri e Pilato i nanea, “Ra maka ngava ni padi virihi ioe vona, o longo?” <sup>14</sup>Pali e Isu i uka ma i taratoto. Lakea e Pilato i turutu hateka vona.

### E Barabas

*(Markus 15:6-15; Lukas 23:13-25; Ioanes 18:38–19:16)*

<sup>15</sup>Na pida lobo na parava na habu, a matakari bara i nana e huriki ne rei a bakovi ge vakapagetala tavulea na bavi. <sup>16</sup>Na tahuna iea i tahoka tara bakovi hale i made na bavi, a rana e Barabas. E huriki lobo ri lohoka vona. <sup>17</sup>Na tahuna e huriki ri vapopo na ruma ne Pilato, i nana ria, “E rei a viri mu ngarua ga vakapagetalea na bavi? E Barabas, o e Isu, ra bakovi ni gale e Kristo?” <sup>18</sup>E Pilato i nana ria, a vuhuna i lohoka vona ri turari vilia vona a vuhuna i madihi a hatene ria vona a hini e Isu i rangi ria.

<sup>19</sup>Pali e Pilato tara i mangenge, a vuhuna na tahuna e Isu i pesi na matana, e girihina i talo rike a ngava vona, i ta maea, “Naha ni ratea tara maki na bakovi malamala iea, a vuhuna a bole a nimadihi dagi mona na tahuna a masia baroko na vuregu.”

<sup>20</sup>Pali e huriki a prister dagi, a gare ri voro dili a ngava ne huriki ri gi ta hinituhana vona e Barabas ge pagitala, pali e Isu ni gi rabalaki.

<sup>21</sup>Lakea a matakari i nana ria, “E rei ne rua ga vakapagetalea na bavi? E Barabas o e Isu?”

Ri koli ria ri ta maea, “E Barabas.”

<sup>22</sup>E Pilato i nana tabu, “Pali ga rata navia ngane e Isu, ra ni gale e Kristo?”

Ria lobo ri koli, ri ta maea, “Ni gi paditata na kai tavalavala!”

<sup>23</sup>E Pilato i nana ria, “I navai ge mavonga? A ra rabu hale i ratea?” Pali ri gale dagi hateka, ri ta maea, “Ni gi paditata na kai tavalavala!”

<sup>24</sup>E Pilato i matakilala ngane i uka ma ri gi longo, a vuhuna e huriki ri gao hateka, ri vakatubu ni roro. Lakea i bolea a naru, i vahilolo a limana na matane huriki, i ta maea, “Iau a uka rarenga vona a nimatena bakovi iea. Mu rata virihia vona a maki mu ngarua vona!”

<sup>25</sup>E huriki lobo ri koli mule, ri ta maea, “Pali. Mia mi gi tahoka a rarenga vona. E huriki a hamone mia, ria ranga ri gi tahoka a rarenga vona!”

<sup>26</sup>Muri i vakapagetalea e Barabas, i taki e huriki a nugumaheto ri gi lagua e Isu, ri gi paditatea na kai tavalavala.

<sup>k</sup> 27:12 Ais 53:7 <sup>l</sup> 27:18 Ion 11:47-48; 12:19 <sup>m</sup> 27:24 Vin 21:6-9 <sup>n</sup> 27:25 Apo 5:28

**E Isu Ni Padikede***(Markus 15:16-20; Ioanes 19:2-3)*

<sup>27</sup>Muri e huriki a nugumaheto ne Pilato ri turaria e Isu i lakea na roho ne ria, lakea a tara lobo na nugumaheto ri vapopo na ngalana. <sup>28</sup>°Ri kali tala a varakia vona ri vakarodoa vona a varakia kuakua. <sup>29</sup>Ri padiviri a barakau i manga a tama hariki, ri vakakubea na gina. Ri vakabolea vona a kodo hariki, ri turume puru na ngalana, ri padikede a ri ta maea, “Ge made vakaroro a hariki ne huriki a Iuda!” <sup>30</sup>°Ri kalupe tahoa, ri bole mulea a kodo, ri ubi balaka kupo a gina. <sup>31</sup>Ri padikede a, muri ri kali talea a varakia, ra ri vakarodoa vona. Muri ri vakarodo tabu vona a varakia vona. Muri ri turari talea ni gi paditata na kai tavalavala.

**E Isu Ni Padiata***(Markus 15:21-32; Lukas 23:26-43; Ioanes 19:17-27)*

<sup>32</sup>Na tahuna ri pagitala, ri vakorokoro a bakovi o Sirene, a rana e Simon. Ri vakukua ge kaloho poloa a kai tavalavala ne Isu. <sup>33</sup>Ri bele na tabeke ni gale e Golgota. A rana tanga iea, ni vunuu muri mai a tuhana gina bakovi. <sup>34</sup>°Na tahuna ri bele vonga ri habi vona a vain ni pulo turana maki vagole ni gale a “gal” ge ninu. Pali na tahuna i dame kilangana, i marikoi vona. <sup>35</sup>°Ri padiata lobo, muri ri varangi vona tara rihiva na satu, pali e rei a viri ge mulangi bara i bole a varakia vona. <sup>36</sup>Muri ri made puru tabukoi vona, ri tagaria. <sup>37</sup>Ni here polomeli na gina a ngava ri padi virihia vona. A ngava iea i maea, “Ra bakovi iea, e Isu, a hariki ne huriki a Iuda.” <sup>38</sup>°A bakovi ru panaho ru rabalaki a viri, rua ranga ni padiata tabukoi ne Isu. I tavore na kanena tara, na maurina tara. <sup>39</sup>°E huriki ri laho polo ri mapakulu, ri harogi pilea, <sup>40</sup>°ri ta maea, “O taki ioe ta go pukea a roho na Vure, muri go hae rikea na parava i tolu. Ngane o korimule ioe ke! Ge ioe a Tuna Vure muholi, o puru valai na kai tavalavala!”

<sup>41</sup>E huriki a prister dagi, a mari na vinara na lotu, a gare, ria ranga ri padikede a, <sup>42</sup>ri ta maea, “I korimule e huriki ranga, pali i keri ni korimule ia! Ia a hariki ne Israel! Ge puru valai na kai tavalavala, bara si luhoi tora ia. <sup>43</sup>°I luhoi tora hateka a Vure. Pali ngane a Vure ge ngarua a bakovi iea, bara i korimulea, a vuhuna i ta maea, ‘Iau a Tuna Vure.’” <sup>44</sup>Ra bakovi ala rua ni padiata turana, rua ranga, ru harogi pilea e Isu.

---

° 27:28 Luk 23:11    P 27:30 Ais 50:6    ° 27:34 Sng 69:21    ° 27:35 Sng 22:18

° 27:38 Ais 53:12    ° 27:39 Sng 22:7; 109:25    ° 27:40 Mat 26:61; Ion 2:19

° 27:43 Sng 22:8

### E Isu i Mate

(Markus 15:33-41; Lukas 23:44-49; Ioanes 19:28-30)

<sup>45</sup>Ngane a uvo i kavitagua a malala, i vakatubu na kuru haro, i vano i lobo na kilala i tolu na malunga. <sup>46</sup>“I tabukoi na kilala i tolu ngane, e Isu i haloho dagi, i ta maea, “Eloi. Eloi, lama sabaktani?” A pelegona a ngava iea i maea, “Vure nau, Vure nau, i navai o lohopile iau?”

<sup>47</sup>E huriki ri pesi tabukoi vonga ri longoa ri ta maea, “I galea e Elaisa.”

<sup>48</sup>Malaviriri kunana a viri tara ne ria i nunu, i bolea tara maki, i lutua na vain, muri i koloa na kai, i toto rikea ne Isu, ge duvia. <sup>49</sup>Pali e huriki ranga ri ta maea, “O dava. Si gi masia e Elaisa ge valai ge korimulea, o ge uka.”

<sup>50</sup>E Isu i haloho tala dagi tabu. Muri a hanuna i pea, i mate.

<sup>51</sup>Malaviriri kunana a lavalava dagi na roho na Vure i mavida valai meli i puru tano, i bale rua. A vuruke i pori, i makeve a maka kedo dagi. <sup>52-53</sup>A maka lovo ne huriki ri mate ri matuba. Muri, na tahuna e Isu i mahuri mule na matenga, e huriki a bakovi malamala ri mate pali, ngane ri mahuri mule, ri pagitala na lovo, ri dili na tanga na Vure, re Ierusalem, ri bele ne huriki.

<sup>54</sup>Na tahuna a ubu turana e huriki ri tagaria e Isu ri hatakia a vuruke, ri matai a maka maki i bele, ri mangenge, i vakulu a tagane ria, ri ta maea, “Muholi hateka, ra bakovi iea a Tuna Vure!”

<sup>55</sup>E huriki a ngatavine ala kupo, ria ranga ri pesi basi popote ri matanono. Re huriki a ngatavine, i muga ri laho turane Isu, ri tuhorua na tahuna i pea e Galili. <sup>56</sup>A ngatavine ranga ne ria, a rane tou ra nga: e Maria Magdala, e Maria e kinane Iakop rua e Iosep, e kinane tune Sebedi ala rua.

### E Isu Ni Tanu

(Markus 15:42-47; Lukas 23:50-55; Ioanes 19:38-42)

<sup>57</sup>I rodo ngane a hini, i valai a bakovi na mahala o Arimatea, a rana e Iosep. Ia tara a murimuri ne Isu. <sup>58</sup>“I lakea ne Pilato i takia vona a podane Isu, ge bolea. Lakea e Pilato i longo maia, i taki e huriki a nugumaheto ri gi habia vona a podana. <sup>59</sup>E Iosep i bolea a podane Isu i sivua na lavalava keakea karaba, <sup>60</sup>lakea i bolea, i rua na babe i keli purua na kedo dagi ge ne vona. Muri i kulea a kedo dagi, i ru karia a matana, i vano ia. <sup>61</sup>E Maria Magdala turana e Maria tara ru made vonga, ru matanonoa a babe.

\* 27:46 Sng 22:1    x 27:48 Sng 69:21    y 27:51 Nim 26:31-33; Hib 10:19-20

z 27:55 Luk 8:2-3    a 27:58 Vin 21:22-23    b 27:60 Ais 53:9

### E Huriki a Nugu Maheto Ri Tagari na Babe

<sup>62</sup>Na parava muri, na Parava Nimalo, e huriki a prister dagi, e huriki a Pariseo ri vapopo turane Pilato, <sup>63</sup>ri ta maea, “Bakovi dagi, ra bakovi na taminga iea, mi longoa na tahuna i tabana na ni mahuri, i ta maea, ‘Muri na parava i tolu bara mahuri mule na matenga.’ <sup>64</sup>I mavonga, mi ngaru go vakuku ni gi tagari a babe ge vano ge harena na toluna parava. Mi mangenge, ma ge valai e huriki a murimuri vona, ri gi panahoa a podana. Muri bara ri taki e huriki ta i mahuri mule na nimate. Lakea ra ngava taminga karaba bara i hale hateka na ngava taminga muga.”

<sup>65</sup>Lakea e Pilato i ta maea, “A ru na limane mua a tara na nugumaheto. Mu vano mu taki e huriki a tagari ri gi tagaria a babe, ge ramai a niluhoi ne mua.” <sup>66</sup>Lakea ri vano ri tukaria a babe, ri ru a kilakila na kedo ni gi matakilaka vona, ni kule tala, o i uka. Muri ri taki e huriki a tagari ri gi tagaria a babe.

### E Isu i Mahuri Mule

(Markus 16:1-10; Lukas 24:1-10; Ioanes 20:1-18)

**28** <sup>1</sup>A Parava Nimalo i lobo. Na hatelanga pokopoko na mugana parava na vik, e Maria Magdala rua e Maria tara ru vano ru gu gosia a babe.

<sup>2</sup>I pori vakaturutu a vuruke, a vuhuna a agelo ne Bakovi Dagi i puru valai na hunu, i kule vurokia a kedo dagi ni tukari a matana babe vona. Muri i made langa vona. <sup>3</sup>A agelo i parahidi manga a vila. A varakia vona i kea manga a havu. <sup>4</sup>E huriki a tagari ri mangenge hateka, i vakulu a tagane ria, i vurea a matane ria, ri mate.

<sup>5</sup>Pali a agelo i taki rua, i ta maea, “Naha ni mangenge. A lohoka marua, muru matakanea e Isu, ra ni paditata na kai tavalavala. <sup>6</sup><sup>4</sup>I uka ma ia koea, a vuhuna i mahuri mule pali, i manga a hini i taki muga. Muru valai muru masia a murina i tabuli muga vona a podana. <sup>7</sup>Muri muru vano malaviriri, muru vakalongo e huriki a murimuri vona, muru ta maea, ‘E Isu i mahuri mule pali na nimate. I muga lakea o Galili. Mu vano, mu masia vonga.’ Ngane a vakalongo pali marua.”

<sup>8</sup>Ra ngatavine nga ru mangenge, pali ru vivi hateka. Ru pea a babe, ru nunu hamule lakea ne huriki a murimuri, ru vakalongo ria. <sup>9</sup>Ru tabana ni nunu na dala, e Isu i luve vakaturutu ne rua, i ta maea, “Hatelanga.” Lakea ru valai vona, ru nugutata a vahana, ru kavurikea. <sup>10</sup><sup>6</sup>Muri e Isu i taki rua, i ta maea, “Naha ni mangenge. Muru vano muru vakalongo e huriki a turagu ri gi lakea o Galili, ri gi matai iau vonga.”

<sup>c</sup> 27:63 Mat 12:40; 16:21; Mrk 9:31; 10:33-34; Luk 9:22; 18:31-33; Ion 2:19-21

<sup>d</sup> 28:6 Mat 12:40; 16:21    <sup>e</sup> 28:10 Mat 26:32

### A Nita ne Huriki a Tagari

<sup>11</sup>Ru tabana ni lalaho lokovonga, lakea e huriki a tagari ranga ri lakea o Ierusalem, ri vakalongo e huriki a prister dagi vona a maki i bele. <sup>12</sup>Lakea e huriki a prister dagi ri vapopo turana e huriki a gare, ri vata vona a maki ri gi ratea. Muri ri habi ne huriki a nugumaheto a moni dagi, <sup>13</sup>ri ta maea, “Mu taki e huriki, mu ta maea, ‘E huriki a murimuri vona ri vali na rodo ri panahoa a podana na tahuna mi mahita.’ <sup>14</sup>Ra ngava iea, ge longoa e Pilato, naha ni loho lege. Bara mi vano, mi vakalongo kamumua, bara mu uka ngava.” <sup>15</sup>Lakea e huriki a nugumaheto ri bole a moni, ri muri mai a ngava ni taki ria vona. Ra ngava taminga iea, i nunu viliha lae ne huriki a Iuda, i valai i harena mona.

### E Isu i Habi a Leho

*(Markus 16:14-18; Lukas 24:36-49; Ioanes 20:19-23)*

<sup>16</sup><sup>f</sup>Muri e huriki a murimuri ala ravulu a polona i taku ri lakea o Galili. Ri bele vona a lolo e Isu i taki ria ri gi luve vona. <sup>17</sup>Na tahuna ri masia e Isu, ri kavurikea. Pali e huriki ranga ne ria ri loho rua. <sup>18</sup><sup>g</sup>Muri e Isu i valai mai ria, i ta maea, “A Vure i habi nau a nitora lobo na hunu a malala. <sup>19-20</sup><sup>h</sup>I mavonga mu vano, mu lakea na tanga lobo na malala. Mu vahilolo e huriki na rane Tata, ne Tuna, na Hanu Kiripiripi. Mu tovo ria ri gi ramai a ngava lobo a habi ne mua. I mavonga bara mu rata ria ge ria e huriki a murimuri nau. Mu longo. Iau ga made vakaroro turane mua, ge vano ge harena na nilobona malala.”

---

<sup>f</sup> 28:16 Mat 26:32    <sup>g</sup> 28:18 Ion 13:3; Epe 1:20-22    <sup>h</sup> 28:19-20 Mrk 16:15-16; Apo 1:8